

M008: Straßburger Alexander

0,1 daz liet daz wir hier wirken
0,2 daz sulet ir rehte merken
0,3 sîn gevuoge ist vile gereht
0,4 iz tihte der pfaffe Lambreht
0,5 unde sagete uns ze mære
0,6 wer Alexander wære
0,7 Alexander was ein listic man
0,8 vile manige rîche er gewan
0,9 er zerstôrte manige lant
0,10 Philippus was sîn vater genant
0,11 daz müget ir wole hoeren
0,12 in – Macchabeorum
0,13 Èlberîch von Bisenzun
0,14 der brâhte uns diz liet zuo
0,15 der hæte iz in walhischen getihtet
0,16 ich hân ez uns in diutischen berihtet
0,17 nieman ne schuldige mich
0,18 also daz buoch saget sô sagen ouch ich
0,19 dô Èlberîch daz liet erhuop
0,20 dô hæte er einen Salomonis muot
0,21 in welichem gedanken Salomon saz
0,22 dô er rehte alsus sprach
0,23 “– –
0,24 – – –”
0,25 daz quît iz ist allez ein îtelicheit
0,26 daz di sunne umbegeit
0,27 daz hæte Salomon wole versuochet
0,28 durch daz swar ime sîn muot
0,29 er ne wolte niwet langer ledic sitzen
0,30 er schreip von grôzen witzen
0,31 wande des mannes müezicheit
0,32 zuo dem lîbe noch zuo der sêle niht ne versteit
0,33 dâr ane gedâhte meister Èlberîch
0,34 den selben gedanc haben ouch ich
0,35 ich ne wil mich niwet langer sparen
0,36 des liedes wil ich vollenvaren
0,37 ez quît rîchere kûninge was genuoc
0,38 daz ne saget uns aber nehein buoch

0,39 noch neheiner slahte mære
0,40 daz ie dechein sô rîche wære
0,41 der in alten gezîten
0,42 mit sturmen oder mit strîten
0,43 ie sô manige lant gewünne
0,44 oder sô manigen küninc betwünge
0,45 oder sô vile herzogen erslüege
0,46 unde anderere vürsten genuoge
0,47 sô der wunderlîche Alexander
0,48 ime ne gelîchet nehein ander
0,49 er was von Kriechen geboren
0,50 unde wart dâ ze küninge erkoren
0,51 unde was der allerhêreste man
0,52 den Krieche ze küninge ie gewan
0,53 ouch wâren küninge kreftic
0,54 hêr unde mehtic
0,55 über manige diet gewaltic
0,56 ire hêrheit manicvaltich
0,57 michel was ire wîsheit
0,58 ire list unde ire kündicheit
0,59 ire schatz was mære unde grôz
0,60 ir ne wart aber nie nehein sîn genôz
0,61 di mit listen oder mit mehten
0,62 iren willen ie sô vollenbrâhten
0,63 sô aber dirre selbe man
0,64 umbe den ich diser rede began
0,65 an eine andere rede wil ich nû vâhen
0,66 Salomon der was aleine ûz getân
0,67 der sich ûzer allen künigen nam
0,68 dô – – zuo ime quam
0,69 unde si sîne wunder
0,70 alle besunder
0,71 rehte merken began
0,72 starke si dô underquam
0,73 dô si sîne wîsheit
0,74 unde sîne grôze rîchheit
0,75 sîn vleisch unde sîne vische
0,76 unde di zierheit sîner tische
0,77 unde sîn – gesach
0,78 mit rehter wârheit si dô sprach
0,79 daz von mannes gebürte
0,80 vrümiger küninc nie ne würde
0,81 man muoste in wole ûz scheiden
0,82 wande Alexander was ein heiden
0,83 noch sprechent manige lügenære
0,84 daz er eines gouchelæres sun wære
0,85 Alexander dâr ich iu von sagen
0,86 si liegen alse boese zagen

0,87 alle di es ie gedâhten
0,88 wande er was rehte künincslahte
0,89 soliche lügenmære
0,90 sulen sîn unmære
0,91 iegelîchen vrumen manne
0,92 sîn geslehte ich wole gereiten kan
0,93 sîn geslehte was hêrlîch
0,94 über al Kriechlant gewaltic
0,95 Philippus hiez der vater sîn
0,96 al Macedonien was sîn
0,97 sîn ane der was ein guot kneht
0,98 über daz mere gienc sîn reht
0,99 er was geheizen Omîn
0,100 wîten gienc der gewalt sîn
0,101 michel was sîn heres kraft
0,102 vile manic volcwîc er vaht
0,103 wider den küninc Xersen
0,104 gewalticliche verwan er den
0,105 unde vile ellenthafte
0,106 mit sîner herkreft
0,107 Philippus der nam ein wîp
0,108 di truoc einen vile hêrlîchen lîp
0,109 ich sage iuch wie ire name was
0,110 si hiez di schoene Olympias
0,111 diu was Alexandris muoter
0,112 di vrouwe hæte einen bruoder
0,113 der was ouch Alexander genant
0,114 ze Persien hæte er daz lant
0,115 der was ein vürste alsô getân
0,116 er ne wolte werden undertân
0,117 nie neheineme küninge
0,118 daz sage ich iu âne lügene
0,119 er ne wolte ouch ze neheinen zîten
0,120 von sturmen noch von strîten
0,121 nie neheine wîs gevliehen
0,122 swie ime sîne dinc dâ ergiengen
0,123 er was ein tiurlîcher degen
0,124 unde wolte rehter hêrschefte pflegen
0,125 woltet ir alle nû gedagen
0,126 sô wolte ich iu sagen
0,127 von Alexandris gebürte
0,128 wie diu gewürde
0,129 sîn muoter vrouwe Olympias
0,130 ze stunte dô siu sîn genas
0,131 dô wart ein michel nôtval
0,132 di erde erbibete überal
0,133 der doner wart vile grôz
0,134 ein starkez wetter nider gôz

0,135 der himel verwandetele sich
0,136 unde di sunne vertunkelete sich
0,137 unde hæte vile nâch iren schîn verloren
0,138 dô Alexander wart geboren
0,139 nû ne vereischete ich êr nie noch sint
0,140 alsus geboren nie nehein kint
0,141 geloubet mir des ich iu sagen
0,142 er gedêch baz in drîn tagen
0,143 danne alle andere kint
0,144 sô si drîer mânôde alt sint
0,145 unde als ime iht des geschach
0,146 daz ime übele ze hügen was
0,147 sô sach er also der wolf teit
0,148 als er über sînem âse steit
0,149 daz ich von ime sagen daz ist wâr
0,150 strûp unde rôet was ime sîn hâr
0,151 nâch eineme vische getân
0,152 den man in den mere sihet gân
0,153 unde was ime ze mâzen dicke
0,154 unde krisp als eines wilden lewen löcke
0,155 umbe sîn gesiht
0,156 wil ich iuch ouch berihten
0,157 unde rehte bescheiden
0,158 ein ouge was ime weitîn
0,159 getân nâch einem trachen
0,160 daz quam von den sachen
0,161 dô in sîn muoter bestuont ze tragenne
0,162 dô quâmen ir vreisliche bilede engagene
0,163 daz was ein michel wunder
0,164 swarz was ime daz ander
0,165 nâch einem grîfen getân
0,166 daz sulet ir wizzen âne wân
0,167 sîn hals was ime wole geschaffen
0,168 sîn brust starc unde wole offen
0,169 sîne arme wâren ime von grôzer maht
0,170 alles sînes muotes was er wole bedâht
0,171 sîn bûch ne was ime niet ze lanc noch ze breit
0,172 vile wole daz deme jungelinge steit
0,173 beide über vuoze unde über bein
0,174 riterlich er ze tale schein
0,175 unde über allen sînen lîp
0,176 was er rehte hêrlich
0,177 daz sage ich iu ze wâre
0,178 in sînem êresten jâre
0,179 wuohs ime maht unde der lîp sîn
0,180 mêr danne einem anderen in drîn
0,181 nû hoeret wie er sich vûre nam
0,182 swâ ein vrûmic rîtær zuo ime quam

0,183 den bôt er lîp unde guot
0,184 unde ne kârte neheinen sînen muot
0,185 an neheinen tumben man
0,186 vile harte wole im daz gezam
0,187 ime was sîn gebære
0,188 als er ein vürste wære
0,189 über allez ertrîche
0,190 ich sage iu wêrlîche
0,191 di meistere di er dô gewan
0,192 di wâren kûnstige man
0,193 si begunden in wîsheit lêren
0,194 unde zugen in ze grôzen êren
0,195 si lârtên ime strîten
0,196 unde vermezzenlîchen rîten
0,197 in sturm unde in volcwîc
0,198 sô daz es nie ne wart sîn gelîch
0,199 der liste di er von in gewan
0,200 der wart er ein vile vûrenæme man
0,201 der êreste meister sîn
0,202 der lârtê in kriechisch unde latîn
0,203 unde schrîben ane pergament
0,204 nochdan was er ein lûtzel kint
0,205 unde lârtê in vile manige buoch
0,206 unde andere wîsheit genuoc
0,207 sîn meister den er dâr nâch gewan
0,208 der lârtê in wole –
0,209 unde lârtê in di seiten ziehen
0,210 daz alle doene dâr inne giengen
0,211 roten unde der lîren klanc
0,212 unde von ime selben heben den sanc
0,213 der dritte vrumete ime wole
0,214 er lârtê in aller dinge zale
0,215 unde lârtê in al di wîsheit
0,216 wie verre diu sunne von dem mânen geit
0,217 unde lârtê in ouch di list
0,218 wie verre von den wazzeren zuo den himelen ist
0,219 der meister den er dô gewan
0,220 was Aristoteles der wîse man
0,221 der lârtê in alle di kûndicheit
0,222 wie der himel umbe geit
0,223 unde stach ime di list in sînen gedanc
0,224 ze erkennenne daz gestirne unde sînen ganc
0,225 dâ sich di wîsen veren mite bewarent
0,226 dâ si in dem tiefen mere varent
0,227 einen meister gewan er aber sint
0,228 Alexander daz edele kint
0,229 der lârtê in mit gewæfene varen
0,230 wie er sich mit einem schilde solte bewarn

0,231 unde wie er sîn sper solte tragen
0,232 zuo deme dem er wolte schaden
0,233 unde wie er den erkiesen mohte
0,234 unde gestechen als iz ime tohte
0,235 unde alse der stich wære getân
0,236 wie er zuo dem swerte solte vâhen
0,237 unde dâ mite kündicliche slege slân
0,238 unde wie er sînen vîant solte vâhen
0,239 unde wie er sich selben solte bewaren
0,240 vore allen di ime wolten schaden
0,241 unde wie er sînen vîanden lâgen solte
0,242 di er danne entwirken wolte
0,243 unde wie er zuo den rîtæren solte gebâren
0,244 zuo diu daz si ime willic wæren
0,245 der sehste bestuont in mit grôzen wîzen
0,246 unte lârte in ze dinge sitzen
0,247 unde lârte in wie er daz erdæhte
0,248 wie er von dem unrehten
0,249 beschiede daz rehte
0,250 unde wie er lantreht bescheiden kunde
0,251 allen den er is gunde
0,252 umbe daz unde vile manic ander
0,253 alsus wart daz kint Alexander
0,254 listic gewaltic unde balt
0,255 nû allerêrest was er zwelif jâr alt
0,256 alsô stætic was ime sîn muot
0,257 durch allez werltlich guot
0,258 ne wolte er nie geliegen
0,259 unde niemanne betriegen
0,260 noch durch liep noch durch leit
0,261 geswachen di wârheit
0,262 einem sînem meistere daz wole schein
0,263 den stiez er ze tale über einen stein
0,264 daz ime sîn hals in zwei brach
0,265 wande er ime eine lûgene zuo sprach
0,266 nû sprechent manige lûgenære
0,267 daz der sîn vater wære
0,268 vile übele ich des gelouben mac
0,269 wande er ime den hals in zwei brach
0,270 von Philippis stüete wil ich iu nû sagen
0,271 dâr under was ein ros getragen
0,272 daz ros daz was wunderlich
0,273 irre unde vile strîtic
0,274 snel unde starc von geschefnisse
0,275 des sulet ir sîn gewisse
0,276 iz hæte unzallliche kraft
0,277 unde unmâzlliche maht
0,278 iz erbeiz di liute unde ersluoc

0,279 iz was vreislich genuoc
0,280 ime was sîn munt
0,281 daz wil ich iu tuon kunt
0,282 als eineme esele getân
0,283 di nasen wâren ime wîte ûf getân
0,284 sîne ôren wâren ime lanc
0,285 daz houbet mager unde slanc
0,286 sîne ougen wâren ime aller varwe
0,287 gelîch eineme vliegenden aren
0,288 sîn hals was ime lockehte
0,289 ich wæne iz wære lewen geslehte
0,290 ûf den goffen hâte iz rindes hâr
0,291 an den sîten lêbarten mâl
0,292 sô Sarrazîn joch kristen man
0,293 nie nehein bezzer ros gewan
0,294 daz ros wart mit îsene gebunden
0,295 also daz dâ tobet ze allen stunten
0,296 iz wart vore den küninc Philippum geleit
0,297 unde als er vernam sîne gelegenheit
0,298 Bucival hiez er ez namen
0,299 daz dûhte si guot alle samen
0,300 dô hiez man manigen starken man
0,301 daz selbe ros leiten dannen
0,302 unde in einen marstal betuon
0,303 daz man dâ vore mohte geruowen
0,304 zuo ime ne torste nieman gân
0,305 wan der alsô hæte getân
0,306 daz ime verteilet wart daz leben
0,307 den muose man deme rosse geben
0,308 deme künige wart ein bote dô gesant
0,309 von deme der daz ros hæte erkant
0,310 unde hiez iz sint baz bewarn
0,311 wande man solte dâr an ervarn
0,312 weme nâch sînem lîbe
0,313 sîn künincriche solte belîben
0,314 unde entbôt ime dâ bî
0,315 iz solte rehte dirre sîn
0,316 der iz allerêrest beschrite
0,317 wande iz noch diu nehein man ne gerite
0,318 unde also Alexander heim quam
0,319 di schrift er harte wole vernam
0,320 wîs was er ze unmâzen
0,321 sîne meistere hæte er verlâzen
0,322 dannoch ne hæte er niet vernomen
0,323 wie iz umbe daz ros was komen
0,324 eines tages dô der jungelinc
0,325 in der pfalenze gienc
0,326 dô volgete ime Vestian

0,327 der was ein edele juncman
0,328 daz ros hôrte er dô weien
0,329 unde tiuvellichen schrîen
0,330 vile starke er dô dâhte
0,331 waz daz wesen mohte
0,332 mit allen sînen sinne
0,333 wes wære di vreisliche stimme
0,334 zuo Vestiane er dô sprach
0,335 “nû sage mir waz daz sîn mac
0,336 daz mir schillet in mîne ôren
0,337 unde ne læzet mich niht gehoeren
0,338 iz gebâret vreisliche
0,339 sîn stimme di is geliche
0,340 einem vreislichem tiere”
0,341 dô antwurte ime schiere
0,342 Ptolomeus unde sprach
0,343 “ich sage dir waz daz wesen mac
0,344 iz ist ein ros vreislich
0,345 ime ne wart nie nehein gelich
0,346 in alle kriechische lant
0,347 Bucival ist iz genant
0,348 dîn vater hât iz in getân
0,349 iz ne dorfte bezzer nie gegân
0,350 under neheiner stüete
0,351 iz ne hât nieman in huote
0,352 wande iz ist vile vreislich
0,353 sîn stimme di ist eislich
0,354 iz erbîzet man unde wîp
0,355 nieman ne mac sînen lîp
0,356 vore ime gesunt behalten
0,357 swes iz muoz gewalten”
0,358 dô der hêrre diz vernam
0,359 schiere er zuo deme rosse quam
0,360 dô sîn daz ros wart geware
0,361 unde er iz begunde ane staren
0,362 iz vergaz aller sîner maht
0,363 unde wolte ime wesen diensthaft
0,364 iz kniewete vûre in dâr nider
0,365 unde ne unsitete niwet sider
0,366 ime wurden sîne gebære
0,367 als iz des kindes vile wole gewone wære
0,368 er begunde iz streichen
0,369 daz nieman geweichen
0,370 ne mohte neheine wîs
0,371 wande er was vile wîs
0,372 er ne legete zoum noch seil dâr ane
0,373 er begreif iz in sîne manen
0,374 ellenthaft was sîn gedanc

0,375 ûf den rügge er ime spranc
0,376 ûz dem marstalle er iz reit
0,377 daz was ein michel baltheit
0,378 dô wart daz langer niet verdaget
0,379 dem küninge wart dô gesaget
0,380 waz sîn sun hæte getân
0,381 der küninc der spranc ûf sân
0,382 unde zehenzic sînes gesindes
0,383 er vröuwete sich sînes kindes
0,384 di mære er gerne vernam
0,385 dô der küninc dar quam
0,386 unde in Alexander vernam
0,387 dô tet er als ime wole gezam
0,388 er warf sich nider unde gienc
0,389 Vestian daz ros entvienc
0,390 als iz Alexander wolte
0,391 mit einem breitele von golde
0,392 mit gesteine wole beslagen
0,393 sînen vater gienc er engagen
0,394 dô si zesamene quâmen
0,395 bî henden si sich nâmen
0,396 ire rede wart vile minnesam
0,397 als ir hier müget verstân
0,398 “heil dir” sprach er “sune mîn
0,399 mich dunket dû salt küninc sîn
0,400 diu gewalt sî dir vile gereit
0,401 alsô verre sô mîn rîche gêt”
0,402 Alexander sprach ze stunte
0,403 “vater got lâze iuch sîn gesunt
0,404 alles guotes ich iu wole getrûwen
0,405 got lâze iuch lange bûwen
0,406 mit vröuweden iuwer rîche
0,407 unde ouch sæliclîche
0,408 noch sulet ir vater mich geweren
0,409 eines dinges des ich sêre geren
0,410 nû bin ich vûnvzehen jâr alt
0,411 daz hân ich rehte gezalt
0,412 unde bin sô komen zuo mînen tagen
0,413 daz ich wole wâfen mac tragen
0,414 swer decheine tugent sol gewinnen
0,415 der sal es in sîner jugende beginnen
0,416 unde swer dir zins sol geben
0,417 wil er iht dâr wider streben
0,418 der muoz in dir mit schanden
0,419 senden von sînen landen
0,420 unde ouch lasterlîche”
0,421 dô ne wolte der küninc rîche
0,422 niwet langer beiten

0,423 er hiez daz kint bereiten
0,424 waz sol ich mêr dâr umbe sagen
0,425 er hiez ime wâfen vûre tragen
0,426 sô man si under des küninges gesinden
0,427 allerbezziste mohte vinden
0,428 unde verkûre si Alexander
0,429 man gewünne ime aber ander
0,430 dô daz kint nâch riterlîchen siten
0,431 wole gewâfenet was unde geriten
0,432 dô was er ein schoene jungelinc
0,433 si gruohten in alse einen küninc
0,434 er sprach wes si gedâhten
0,435 daz si ime küninges namen ane lehten
0,436 sô er künincrîches niet ne hæte
0,437 daz er sînen vinger ûf gesetzte
0,438 er sprach “woltet ir eine wîle geruowen
0,439 unze ich eine tugent mohte getuon
0,440 an einem küninc wil ich is beginnen
0,441 unde mac ich den verwinnen
0,442 unde ich ime di krônen abe geziehen
0,443 unde ûz den velde getuon vliehen
0,444 sô müget ir mir küninges namen geben
0,445 al di wîle di ich leben”
0,446 ein küninc was Nicolaus genant
0,447 Alexander vuor in sîn lant
0,448 ze Cesaream vûre di grôze stat
0,449 dâ wart der rîcher küninc entsatzt
0,450 Alexander vaht ime den sige ane
0,451 unde vuorte di krônen mit ime danne
0,452 dô er dô wider heim quam
0,453 ein vile leit mære er vernam
0,454 des gewan er ungemüete
0,455 iz was sîner muoter
0,456 sîn vater Philippus ab komen
0,457 unde hæte eine ander wîp genomen
0,458 di was Cleopatra genant
0,459 dô Alexander daz ervant
0,460 unde er ez rehte vernam
0,461 vûre sînen vater gienc er stân
0,462 er sazte di krônen dô
0,463 di er Nicolaô
0,464 hæte geroubet
0,465 sînem vater ûf daz houbet
0,466 “hêrr vater nemet diz ze minnen
0,467 daz ich mit sturme hân gewonnen
0,468 unz ich mêr mac getuon
0,469 des habet ir êre unde ruom
0,470 wene ein dinc daz ich iu klagen

0,471 unde in mînem herzen tragen
0,472 des hân ich vile swæren muot
0,473 ouch ne dunket iz mir niwet guot
0,474 daz ir mîne muoter
0,475 Olympiaden di guoten
0,476 mir ze leide verlâzen hât
0,477 unde einen überhuor begât
0,478 mit einem anderen wîbe
0,479 ich swere iu daz bî mîneme lîbe
0,480 swer disen rât hât gevromet
0,481 daz iz ime ze grôzen unstaten noch komet”
0,482 ein rîtær hiez Lysias
0,483 der stolz unde redehaft was
0,484 der was mit der briute dar komen
0,485 des gewan er lützel en vromen
0,486 deme was vile harte ungemach
0,487 daz Alexander sô vile sprach
0,488 unde antwurte ime smæhelîche
0,489 unde vrevellîche
0,490 des mohte er gerne haben entboren
0,491 des gewan daz kint grôzen zorn
0,492 einen guldînen napf grôz unde swâr
0,493 dâr ane stuonten blachmâl
0,494 hæte Alexander an di hande
0,495 den sluoc er Lysiam vüre di zande
0,496 daz si ime in di kele risen
0,497 unde sprach “lâ dîne boese rede wesen”
0,498 Philippus ûf di tavelen spranc
0,499 wande in sîn grôze zorn twanc
0,500 der strît ime niht wole geviel
0,501 dô trat er vürebaz unde viel
0,502 daz ime sîn schenkel zerbrach
0,503 lasterlîchen er dô lac
0,504 in ander halbe viel di brût
0,505 dâ ne wart neheiner gâbe lût
0,506 niergen nehein spileman
0,507 wande dô iz alsô quam
0,508 daz der küninc dâr nider viel
0,959 nû vernemet ouch ein ander
0,960 zuoze in sande Alexander
0,961 unde hiez sînem knehte
0,962 sagen in vile rehte
0,963 ob si in zuo künige wolten entvâhen
0,964 unde ime werden undertân
0,965 unde ime geben in sîne hant
0,966 di burc unde daz lant
0,967 er wolte si lâzen leben
0,968 unde wolte in mit êren geben

0,969 unde mit genâden lâzen
0,970 unde varen sîne strâze
0,971 ob si des niet ne wolten
0,972 er sagete in daz er solte
0,973 ire lant zervüeren
0,974 unde ire stat zerstoeren
0,975 unde nemen in allen daz leben
0,976 ob si ime wolten widerstreben
0,977 mit sicheiner gewalt
0,978 dô wâren dâr in helede balt
0,979 dô si di rede vernâmen
0,980 zesamene si quâmen
0,981 zuo Alexandrô si sanden
0,982 wande si sîn niht ne erkanten
0,983 unde hiezen ime sagen
0,984 er mohte gerne gedagen
0,985 wande si sîn niht ne vorhten
0,986 unde ze nihte ne bedorften
0,987 doch truogen si ime willigen muot
0,988 unde gâben ime gerne ire guot
0,989 ob er ez wolte durch minne
0,990 sus sprâchen si dâr inne
0,991 dô der bote wider quam
0,992 unde in Alexander vernam
0,993 unde er ime gesagete rehte
0,994 waz ime di guoten knehte
0,995 ûz von Tyren entbuten
0,996 von zorne begunde er roten
0,997 vore ungemuote er nider saz
0,998 bî sîneme lîbe er sich vermaz
0,999 iz gienge in allen an den leben
0,1000 daz si ime torsten widerstreben
0,1001 er solte sich wole gerechen
0,1002 unde ire stat zerbrechen
0,1003 dô nam er sîner vürsten drî
0,1004 ich ne weiz niht wie ire name sî
0,1005 unde sande si wider in di stat
0,1006 unde hiez den bezzisten sagen daz
0,1007 wâ si ire wîsheit tâten
0,1008 daz si in versmâhten
0,1009 der Rôme mit sîner kraft
0,1010 under sich hæte brâht
0,1011 unde alle kriechische lant
0,1012 hæte in sîner hant
0,1013 wes si wolten wænen
0,1014 durch waz er dare quæme
0,1015 daz si sich baz bedæhten
0,1016 si ne kanten in niet rehte

0,1017 er wolte mit sînen knehten
0,1018 ire starke stat ervehten
0,1019 unde iz ne solte in niemer gevromen
0,1020 iz solte in unrehte komen
0,1021 si ne wurden ime undertân
0,1022 nû vernemet wie iz dô quam
0,1023 dô di boten in quâmen
0,1024 unde di burgære vernâmen
0,1025 waz di boten sageten
0,1026 niet langer si ne dageten
0,1027 di boten si viengen
0,1028 schiere si sie verhiengen
0,1029 dô daz mære ûz quam
0,1030 unde iz Alexander vernam
0,1031 dô gewan der helt guot
0,1032 eines zornigen lewen muot
0,1033 dô hiez er sîn here
0,1034 mit schiffen varen in daz mere
0,1035 unde hiez di burc al umbevâhen
0,1036 daz wart schiere getân
0,1037 unde alse di Tyrære
0,1038 vernâmen dise mære
0,1039 dô schuofen si ire were
0,1040 wider daz kreftige here
0,1041 in der burc innen
0,1042 unde giengen an di zinnen
0,1043 Alexander truoc in übelen danc
0,1044 mit sturme er si sêre twanc
0,1045 unde di dâr inne wâren
0,1046 daz sage ich iu ze wâren
0,1047 di werten ire seledē
0,1048 alsô tiurlîchen heledē
0,1049 unde vuhten sêre her ze tale
0,1050 ich wil iu sagen ire zale
0,1051 man zalte si dâ ze stunte
0,1052 mêr danne an hundert tûsent
0,1053 des geloube swer sô wile
0,1054 si ersluogen sô vile
0,1055 Alexandris heres
0,1056 daz di ünden des meres
0,1057 von dem bluote wurden rôt
0,1058 der wint der tet in starke nôt
0,1059 wande er vile starc was
0,1060 der selbe der dâ Boreas
0,1061 in den buochen heizet
0,1062 unde die allermeist reizet
0,1063 daz mere mit den ünden
0,1064 der schiffe sluoc er ze grunde

0,1065 vile daz si versunken
0,1066 unde di liute dâr in vertrunken
0,1067 vile manic ouch dâ erslagen lac
0,1068 dô Alexander daz gesach
0,1069 des sturmes hiez er abe stân
0,1070 unde hiez balde wider gân
0,1071 di schif in di habe
0,1072 ob ich rehte vernomen habe
0,1073 dô klagete Alexander
0,1074 mêt danne sichein ander
0,1075 sînen schade grôze
0,1076 sîne liebe wîcgenôze
0,1077 doch muose er getroesten sich
0,1078 des schaden unmâzlich
0,1079 wande er was ein listic man
0,1080 vile grôze boume er gewan
0,1081 unde hiez si zesamene spannen
0,1082 von kündigen zimbermannen
0,1083 unde hiez si mit steinen vûllen
0,1084 daz was an sînem willen
0,1085 swanne er iz gevulte vollen hôhe
0,1086 daz er sîn ebenhoehe
0,1087 dâr ûf zuo den türmen bræhte
0,1088 unde lange boume dâr abe rihte
0,1089 di ûf di zinnen mohten gân
0,1090 mit nîde wolte er si bestân
0,1091 zwelif tûsent von sînem here
0,1092 sande er nâch boumen von den mere
0,1093 unde hiez di boume vellen
0,1094 unde bercvride stellen
0,1095 ûf einen berc heizet Libanus
0,1096 dâ ûf stêt manic –
0,1097 Libanus in Arabîen stêt
0,1098 dâ der Jordânes ûz gêt
0,1099 Libanus ist ouch der selbe walt
0,1100 den – der küninc Salomon galt
0,1101 wider einen küninc der hiez Hiram
0,1102 dem gap er halp Galileam
0,1103 wande ime di boume wole gevielen
0,1104 ze zimberenne unde ze kielen
0,1105 ze balken unde ze sûlen
0,1106 man saget daz holz gevûlen
0,1107 ne müge niemer mêt
0,1108 durch regen noch durch snê
0,1109 dô Arabes daz bevunten
0,1110 di Tyrô guotes gunden
0,1111 niet langer si ne twalten
0,1112 di iren walt valten

0,1113 unsanfte si ane quâmen
0,1114 ein pfant si in nâmen
0,1115 unde ersluogen ir dâ ze stunte
0,1116 mêt danne ein tûsent
0,1117 dô Alexander daz vernam
0,1118 vier tûsent er dô nam
0,1119 ûz von sînem here
0,1120 daz ander liez er bî dem mere
0,1121 unde bevalh iz zwein vûrsten
0,1122 di iz wole bewaren torsten
0,1123 di er mit ime brâht hatte
0,1124 der einer hiez Glatte
0,1125 der ander was Perdix genant
0,1126 den bevalch er mit sîner hant
0,1127 di er dâ wolte lâzen
0,1128 unde vuor dô sîne strâze
0,1129 hin zuo dem walde
0,1130 vile wunderlîchen balde
0,1131 unde bewarte sîne holden
0,1132 di ime dâ zimberen solten
0,1133 ebenhoehe unde bercvride
0,1134 di behuotte er mit vride
0,1135 biz daz werc bereitet wart
0,1136 dô kârte er an di widervart
0,1137 alle di wîle dô Alexandris her
0,1138 nâch den boumen vuor von dem mere
0,1139 dô wurden di Tyrære
0,1140 di rîchen burgære
0,1141 beide stolz unde balt
0,1142 si ranten ûz mit gewalt
0,1143 starke si sich râchen
0,1144 ein kastel si zerbrâchen
0,1145 under Alexandris mannen
0,1146 stolzliche huoben si ez an
0,1147 eines morgenes vruo
0,1148 mit viure giengen si ime zuo
0,1149 si sluogen unde viengen
0,1150 swaz si ir begiengen
0,1151 swem des bedûhte
0,1152 daz er entvliehen niet ne mohte
0,1153 der sankte sich an der stunte
0,1154 nider an des meres grunt
0,1155 vûre wâr ich iu daz sage
0,1156 daz man si in allem dem tage
0,1157 nie niergen gesach
0,1158 biz man di gruntveste brach
0,1159 dô vant man si an des meres grunde
0,1160 di quâmen wider ûz gesunt

0,1161 dô daz kastel zerbrochen wart
0,1162 dô huop sich dâ ein sturm hart
0,1163 dâ wart michel gedôz
0,1164 dâ was der strît vile grôz
0,1165 dâ si volgeten den vanen
0,1166 daz wart sêre ze banen
0,1167 dem der iz mit dem lîbe galt
0,1168 an zwei hundert wurden gezalt
0,1169 di den lîp dâ verluren
0,1170 unde den bitteren tôt kuren
0,1171 di dâ lâgen erslagen
0,1172 daz wil ich iu wærlîchen sagen
0,1173 di wâren Alexandris man
0,1174 als ich mich versinnen kan
0,1175 di von Tyre schieden dannen
0,1176 gesunt mit iren mannen
0,1177 vile lûtzel ir tôt beliben
0,1178 stolzlîche si triben
0,1179 di Kriechen von der vesten
0,1180 dô was dâ den gesten
0,1181 geschadet vile sêre
0,1182 dô êrest quam ire hêre
0,1183 ze strîte harte wole gare
0,1184 mit einer gewâfeneter schare
0,1185 dô entwichen ime di geste
0,1186 in di burc veste
0,1187 dô Alexander sich bedâhte
0,1188 waz er getuon mahte
0,1189 er hiez ensamet heften
0,1190 di schif mit mannes kreften
0,1191 er hiez si starke spannen
0,1192 mit îsenînen lannen
0,1193 ein beneben daz ander
0,1194 ouch hiez Alexander
0,1195 di schif mit hiuten beziehen
0,1196 daz di ûnden dâr in niet ne gien
0,1197 des nam man guote goume
0,1198 von den langesten boumen
0,1199 di si iergen hatten
0,1200 bercvride si dâr ûf sazten
0,1201 unde triben si zuo den zinnen
0,1202 alsus wolte er gewinnen
0,1203 Tyrum di hêre stat
0,1204 di dâ bî dem mere lac
0,1205 diz sulet ir rehte merken
0,1206 dô hiez er starc gewerken
0,1207 machen ûfe schîben
0,1208 unde zuo der stat trîben

0,1209 unde hiez di mûren houwen
0,1210 mit stehelînen gezouwen
0,1211 dô erhuop sich ein sturm grôz
0,1212 starke man warf unde schôz
0,1213 von den einen zuo den anderen
0,1214 sêre mohte es deme wunderen
0,1215 der ie decheinen sturm gesach
0,1216 von der werlte di dâ tôt lac
0,1217 wart daz mere al ein bluot
0,1218 des wuohs Alexandrô sîn muot
0,1219 er bestuont si mit nîde
0,1220 von den bercvriden
0,1221 di wâren hôher danne di türme
0,1222 dô bestuont er si mit sturme
0,1223 dâ wurden di schoenen swibogen
0,1224 in daz wazzer gezogen
0,1225 unde di gemoseten steine
0,1226 der mûren brach dô eine
0,1227 Alexander unde di geste
0,1228 di dâ was di bezziste
0,1229 dô si ze der anderen mûren quâmen
0,1230 zêderboume si nâmen
0,1231 unde lange tannen
0,1232 bercvride hiez man spannen
0,1233 unde rihte si ûf mit listen
0,1234 unde sazte si zuo der vesten
0,1235 dô steic Alexander
0,1236 unde manic man ander
0,1237 ûf di oberesten were
0,1238 unde hiez stürmen sîn here
0,1239 dâ nider an der erden
0,1240 hiez er den sturm werden
0,1241 dô hiez man werc ûf schîben
0,1242 zuo der mûren trîben
0,1243 mit gezouwe man di mûre brach
0,1244 vile manic man dâ tôt lac
0,1245 man mohte dâ schouwen wunder
0,1246 sêre vaht Alexander
0,1247 sîn schilt der was helfenbeinîn
0,1248 bezzer ne wart nie nehein
0,1249 sîn helm der was ouch alsô guot
0,1250 daz nehein swert dâr durch wuot
0,1251 ouch hæte er umbe di sîten
0,1252 ein swert von guoter snîden
0,1253 unde an der hant einen gêren
0,1254 er vrümete manigen sêren
0,1255 daz sage ich iu vûre ungelogen
0,1256 dô gesach er den herzogen

0,1257 dem Tyren was undertân
0,1258 vore sich ûf di mûren stân
0,1259 den schôz er mit dem gêren durch
0,1260 unde valte in tôt in di burc
0,1261 dô tete der küninc einen sprunc
0,1262 unde mit ime manic helt junc
0,1263 nider ûf di zinnen
0,1264 di burc wolten si winnen
0,1265 vier tûsent liutes mit ime spranc
0,1266 ellenthaft was ire gedanc
0,1267 mir ne betriege mîn wân
0,1268 dâ spranc eteslich man
0,1269 daz er nâch der stunte
0,1270 niemer mêr ne wart gesunt
0,1271 dâ was michele nôt
0,1272 hundert sneller helede tôt
0,1273 von dem springenne lac
0,1274 ouch liten michel ungemach
0,1275 die kriechischen geste
0,1276 dâ si brâchen di veste
0,1277 nider zuo der erden
0,1278 nie ne mohte werden
0,1279 ein mûre di bezzer wære
0,1280 daz sage ich iu ze wære
0,1281 dâ was daz velt vile wît
0,1282 dâ was der bittereste strît
0,1283 von dem ich ie gehôrte sagen
0,1284 man ne sach dâ niemannen verzagen
0,1285 man mohte dâ degene schouwen
0,1286 durch den helmen verhouwen
0,1287 man sach dâ manigen rîtær junc
0,1288 durch den halsberc sô verwunt
0,1289 daz er niet ne genas
0,1290 in dem strîte der dâ was
0,1291 durch di schilde vuor der gêr
0,1292 unde machete manigen helt sêr
0,1293 in dem selben nîtspile
0,1294 leit ungemaches vile
0,1295 der eine joch der ander
0,1296 der wunderlich Alexander
0,1297 der machete in den stunten
0,1298 vreisliche wunden
0,1299 er ersluoc des liutes die menige
0,1300 gebeizet was sîn brünje
0,1301 in eines wurmes bluote
0,1302 manigen helt guoten
0,1303 erlôste er des lîbes
0,1304 des sît âne zwîvel

0,1305 sîn brünje was hürnîn vile vast
0,1306 er hæte manige grôze list
0,1307 ich wil iu wærlîchen sagen
0,1308 vore den di dâ lâgen erslagen
0,1309 sô ne mohte nieman
0,1310 ûf die erden gegân
0,1311 sô vile lac ir dâ tôt
0,1312 daz dâ engagen wurden rôt
0,1313 des tiefen meres ünden
0,1314 in den selben stunten
0,1315 di helede von Tyre
0,1316 des lebenes vile gîre
0,1317 di vuhten sô di wilden swîn
0,1318 wene daz niet solte sîn
0,1319 ire lebenes dô mêr
0,1320 in was in beidenthalben wê
0,1321 eine vile lange wîle
0,1322 vlugen di pfile
0,1323 alse der snê unde der regen
0,1324 dâ beleip manic tiure degen
0,1325 dâ vuhten Alexandris man
0,1326 als iz heleden wole gezam
0,1327 doch brâchen si Tyrære durch
0,1328 unde wichen wider in di burc
0,1329 Alexander tet in unreht
0,1330 er verlôs dâ manigen tiuren kneht
0,1331 vile zornic ward er dô
0,1332 mit nîde gienc er der porten zuo
0,1333 di dâr ûfe wâren
0,1334 di tâten ime schaden mæren
0,1335 di porte hæte drî türme
0,1336 dâ geschiet er abe mit zorne
0,1337 wande ime dâ leides vile geschach
0,1338 mit sînen vürsten er dô sprach
0,1339 unde nam iren heimelîchen rât
0,1340 wie er gehandelte di tât
0,1341 er sprach “nû râtent mir des ist zît
0,1342 wande ir vile wîse liute sît
0,1343 nement nû dise di oberen hant
0,1344 sô spottet man unser in daz lant”
0,1345 ime rieten sîne vürsten
0,1346 di ime râten torsten
0,1347 daz er sande über sê
0,1348 unde lieze heres komen mêr
0,1349 unde hieze mangel rihten
0,1350 unde tæte di türme brechen
0,1351 mit sturmes gewalt
0,1352 schiere wurden dâ gestalt

0,1353 zwô unde sibenzic mangel
0,1354 mit hürden wole behangen
0,1355 gemannet unde geseilet
0,1356 di wurden in drî geteilet
0,1357 unde wurden getriben zuo der burc
0,1358 dô wære dâ eines vriden durft
0,1359 in di burc wurfen si dô
0,1360 beide spâte unde vruo
0,1361 kriechisch viur unde wite
0,1362 daz was Alexandris site
0,1363 kriechisch viur kunde er wirken
0,1364 unde ne liez daz niemanne merken
0,1365 von welichen listen daz quam
0,1366 daz iz in den wazzere bran
0,1367 daz warf er in zuo der burc
0,1368 dâ mite brante er di türme durch
0,1369 unde manigen vile herten stein
0,1370 dô ne beleip der burgære nehein
0,1371 si ne muosten von den zinnen gân
0,1372 wande si ne torsten dâ niwet langer stân
0,1373 vore des viures vorhten
0,1374 Alexander dranc zuo der porten
0,1375 mit nîde er si dâr nider brach
0,1376 sîner heleda vile dâ tât lac
0,1377 ime wære doch leides mêr geschiet
0,1378 ne vorhten si daz viur niet
0,1379 unde maniger mangel wurf
0,1380 sô solte ime ouch di burc
0,1381 wesen vile tiure
0,1382 ne hæte er si mit den viure
0,1383 unde mit den mangel niet bestân
0,1384 daz sulet ir wizen âne wân
0,1385 Alexander wolte sich vollen rechen
0,1386 er hiez di türme nider brechen
0,1387 di daz viur hæte verlâzen
0,1388 der rîchesten burgære di dâr inne sâzen
0,1390 hiez er drî tûsent vâhen
0,1391 unde blenden unde hâhen
0,1392 wider sînen vürsten drîn
0,1393 di er sande dâr in
0,1394 des siges des er dâr nam
0,1395 wære er ein wole bedâht man
0,1396 er ne würde es niemer vrô
0,1397 wande iz geschach ime alsô
0,1398 daz ime mêr liute tât beleip
0,1399 des sagen ich iu di wârheit
0,1400 danne der in Tyrô wære
0,1401 geste oder burgære

0,1402 zerstoeret lac dô Tyrus
0,1403 di stifte sint der küninc Apollonius
0,1404 von dem di buoch sagent noch
0,1405 den der küninc Antioch
0,1406 über mere jagete
0,1407 wande er ime sagete
0,1408 ein rætsele mit vorhten
0,1409 daz was mit bedecketen Worten
0,1410 geschriben in einen brieve
0,1411 daz er sînes selbes tochter beslief
0,1412 ouch ist Tyrus di selbe stat
0,1413 dâr Kanânea unsen hêrren bat
0,1414 daz er si getrôste
0,1415 unde ire tochter lôste
0,1416 mit sîner volleiste
0,1417 von dem übelen geiste
0,1418 dâ gewerte si unser hêrre
0,1419 durch sînes selbes êre
0,1420 unde machete dâ ze stunte
0,1421 ire tochter gesunt
0,1422 dô kunte Dariô ein man
0,1423 der ûz von Tyren entran
0,1424 wie der küninc Alexander
0,1425 hæte in sînem lande
0,1426 sîne liute gefangen
0,1427 geblendet unde erhangen
0,1428 unde gewüestet sîn lant
0,1429 unde daz ouch wære verbrant
0,1430 Tyrus unde læge in kolen
0,1431 unde daz er laster wolte dolen
0,1432 dâr umbe mohte er sich geschamen
0,1433 sînes küninclichen namen
0,1434 daz er in mit helfe
0,1435 niwet ze helfe
0,1436 schiere ne quæme
0,1437 dô er ire nôt vernæme
0,1438 der rîche küninc Darius
0,1439 der antwurte ime alsus
0,1440 der küene Alexander
0,1441 der tuot als ein tumber
0,1442 unde alse ein kindischer man
0,1443 der sich versinnen niet ne kan
0,1444 daz wirdet vile lîhte sîn val
0,1445 wande er dâr umbe sal
0,1446 sîne êre verliesen
0,1447 oder den bitteren tât kiesen
0,1448 er ne vare schiere wider heim
0,1449 doch wart er des enein

0,1450 dô er gienc ze râte
0,1451 daz er ime sande drâte
0,1452 einen guldînen bal
0,1453 schoene unde sinewel
0,1454 ouch sande er ime zehant
0,1455 zwêne hêrlîche schuochbant
0,1456 unde ein lützel goldes in einer laden
0,1457 er wânte daz er ime geschaden
0,1458 mit nihte ne mohte
0,1459 biz daz er ez besuochete
0,1460 unde hiez von disen drîn sachen
0,1461 ein brief machen
0,1462 der ime rehte bescheinte
0,1463 waz dise gâbe meinte
0,1464 mit dem balle meinte er daz
0,1465 daz ime gezæme micheles baz
0,1466 daz er mit anderen kinden
0,1467 des balles spilen gienge
0,1468 danne er sîne liute vienge
0,1469 unde di slüege oder hienge
0,1470 dâr zuo meinten die schuochbant
0,1471 di er ime ouch hæte gesant
0,1472 daz ime Alexander
0,1473 unde dâr zuo manic ander
0,1474 tagelîche dienen solte
0,1475 alsô vile sô er wolte
0,1476 ouch meinte daz golt
0,1477 daz ir vile rehte merken sulet
0,1478 daz sîn vater wære
0,1479 sîn rehter zinsære
0,1480 unde daz er ouch solte
0,1481 leben mit dem golde
0,1482 biz daz er heim quæme
0,1483 unde niemanne niht ne næme
0,1484 unde ouch schiere heim rite
0,1485 unde ob er iwit lange bite
0,1486 oder tæte wider sînen willen
0,1487 er hiez in mit besemen villen
0,1488 dô Alexander den brief gelas
0,1489 vile harte unmære ime was
0,1490 daz er in mit besemen wolte slân
0,1491 sîne boten hiez er alle hâhen
0,1492 der boten einer zuo ime sprach
0,1493 hêrre ne tuot uns nehein ungemach
0,1494 wande daz ne wære niwet reht
0,1495 swâ sichein iuwer kneht
0,1496 iuwer boteschaft tribe
0,1497 daz er dâr umbe tôt belibe

0,1498 ne schendet niwet iuweren namen
0,1499 wir jehen iu alle samen
0,1500 daz under disen künigen allen
0,1501 neheiner mac zuo iu gevallen
0,1502 der mit solicher vrümicheite
0,1503 sîn here über lant leite
0,1504 als ir hêrre küninc tuot
0,1505 nû betwinget iuweren muot
0,1506 unde habet unser mâze
0,1507 wie torsten wir lâzen
0,1508 daz unser hêrre uns gebôt
0,1509 durch sicheiner slahte nôt
0,1510 Alexander bedâhte sich
0,1511 den boten wart er genædic
0,1512 er ne weiz in niwet durch di schult
0,1513 er gap in wider daz selbe golt
0,1514 daz ime von Dariô quam
0,1515 er sprach vile übele daz gezam
0,1516 daz mich dröuwete ze slân
0,1517 Darius iuwer hêrre
0,1518 waz sol der rede mêre
0,1519 er ist ein unversunnen man
0,1520 er hât gelîche getân
0,1521 alse der bloede hovewart
0,1522 solich ist sîn art
0,1523 swenne er nahtes iht vernimet
0,1524 durch sîne bloedicheit wirdet er ergremet
0,1525 er ne tar dar nâher komen niet
0,1526 al bellente er vlihet
0,1527 alsô hât Darius getân
0,1528 er ne tar mir niemer bestân
0,1529 wande er ist ein tumber
0,1530 er zücket sich in einen kumber
0,1531 dâ er niet ûz ne mac komen
0,1532 sînen brief hân ich wole vernomen
0,1533 diu gâbe ein ander meinert
0,1534 danne mir der brief bescheinet
0,1535 den bal hât er mir gesant
0,1536 dâ mite hât er mir bekant
0,1537 daz iz allez an mir sol stân
0,1538 daz der himel hât umbevâhen
0,1539 unde ich hêrre sule werden
0,1540 noch an diser erden
0,1541 über alle di rîche
0,1542 di sint in ertrîche
0,1543 unde über alle di lant
0,1544 di ie wurden genant
0,1545 er sande mir ouch zwei schuochbant

0,1546 dâ mite hât er mir bekant
0,1547 daz er sich mir ze eigene wil geben
0,1548 unde mit mînen genâden leben
0,1549 unde mîn dienest wille sîn
0,1550 ze allen herverten mîn
0,1551 mit dem golde daz ir mir habet brâht
0,1552 dâ mite hât er gedâht
0,1553 daz mir eineme daz gezeme
0,1554 daz ich den zins von ime neme
0,1555 unde ouch alle irdische lant
0,1556 betwinge zuo mîner hant
0,1557 diz schreip Alexander dô
0,1558 unde sande iz Dariô
0,1559 unde entbôt ime dâ mite
0,1560 daz er noch drî mânôde bite
0,1561 er ne wolte iz niwet lengen
0,1562 zehenzic tûsent wolte er bringen
0,1563 über daz wazzer Eufraten
0,1564 vüre di mære Babilônien
0,1565 er sprach sint daz er zinses von mir geret
0,1566 er wirdet es al dâ gewert
0,1567 mit sô getâner mâzen
0,1568 daz er mir muoz lâzen
0,1569 ze pfânde sîn houbet
0,1570 oder ich werde beroubet
0,1571 mînes lîbes unde mîner manne
0,1572 unde ob ich zagelîche danne
0,1573 von dem volcwîge vliehe
0,1574 sô gelobe ich daz mir geschie
0,1575 danne vürder niemer mêre
0,1576 vröuwede guot noch êre
0,1577 alsus wil ich ez bestân
0,1578 unde alse Dariô der brieve quam
0,1579 unt er in gelas
0,1580 alse dâ geschriben was
0,1581 zornlîche er ûf vuor
0,1582 bî sîneme rîche er swuor
0,1583 iz würde ze schanden
0,1584 dem tumben Alexanderen
0,1585 daz er mich ie beschalt
0,1586 er ist worden ze balt
0,1587 er ne gewinnet es niemer vromen
0,1588 daz er ie getorste komen
0,1589 durch mîn laster in mîn lant
0,1590 des sol er werden geschant
0,1591 sô daz er ez niemer mêr ne getuo
0,1592 wande er erhebet sich ze vruo
0,1593 dô sande Darius einen brieve

0,1594 zwein herzogen di ime wâren liep
0,1595 der eine der hiez Marius
0,1596 der brieve nennet in alsus
0,1597 unde der ander Tybotes
0,1598 er hiez si sêre biten des
0,1599 daz si gegen Alexanderen kêrten
0,1600 unde im daz lant werten
0,1601 unde sînes hôchmuotes widerstiezen
0,1602 unde über daz wazzet niet ne liezen
0,1603 Eufraten heim ze lande varn
0,1604 daz si daz wolten bewaren
0,1605 unde mit strîte in bestuonten
0,1606 unde bræhten in gebunden
0,1607 nû er dâr nâch strebete
0,1608 daz er über allez daz dâ lebete
0,1609 iergen an der erden
0,1610 der hôheste wolte werden
0,1611 daz solte an einen galgen wesen
0,1612 dô der brieve wart gelesen
0,1613 dô sprâchen di herzogen
0,1614 “Darius ist harte betrogen
0,1615 er heizet uns den man vâhen
0,1616 dem alle di lant sint undertân
0,1617 unde der di vûrsten hât gevangen
0,1618 unde des wille ist ergangen
0,1619 über Jêrusalêm unde über Tyre
0,1620 sînes selbes ist er gîre
0,1621 Rôme unde Egiptelant
0,1622 stânt beide an sîner hant
0,1623 er betwanc Kartaginen di burc
0,1624 mit gewalt reit er dâ durch
0,1625 er hât ouch manic ander lant
0,1626 verwunnen unde verbrant
0,1627 betwungen unde zerstoeret
0,1628 der ein teil Dariô hoeret
0,1629 daz hât Darius al versezzen
0,1630 Alexander hât sich vermezzen
0,1631 iz gê ze schaden oder ze vromen
0,1632 wil ime Darius engagen komen
0,1633 er wil in manlîchen entvâhen
0,1634 unde mit volcwîge bestân
0,1635 er wil unsen hêrren
0,1636 aller sîner êren
0,1637 verstôzen oder krenken
0,1638 Darius sol sich bedenken
0,1639 unde handel iz noch mit sinnen
0,1640 er mac sîn lîhte gewinnen
0,1641 schaden unde schande

0,1642 in sînes selbes lande”
0,1643 von den zwein herzogen dô
0,1644 reit ein bote ze Dariô
0,1645 unde als er vûre ime quam
0,1646 unde dise boteschaf vernam
0,1647 sêre zûrnete er des
0,1648 einen herzogen der hiez Mennes
0,1649 unde dâr zuo hundred tûsent man
0,1650 er vile schiere gewan
0,1651 di sande er dô
0,1652 dem hêrren Alexandrô
0,1653 wole ze strîte gare engagen
0,1654 unde hiez den zwein herzogen sagen
0,1655 liezen si in über daz wazzer komen
0,1656 si ne gewunnen es niemer vromen
0,1657 “wen laster unde kumber
0,1658 daz wehset in dâr under
0,1659 unde schade unde schande
0,1660 ob der müelîche Alexander
0,1661 sînen willen dâ geendet
0,1662 si werdent es geschendet
0,1663 vile lîhte an iren lîbe
0,1664 unde an kinden unde an wîbe
0,1665 unde ouch an iren guote
0,1666 sus ist mir ze muote”
0,1667 den herzogen beiden
0,1668 wart vile leide
0,1669 dô in der bote sagete
0,1670 waz er vernomen habete
0,1671 si ne torsten es niwet lâzen
0,1672 si ne wereten di strâzen
0,1673 dem stolzen Alexandrô
0,1674 ze râte giengen si dô
0,1675 Marius unde Tybotes
0,1676 ze râte wurden si dô des
0,1677 daz si sanden algerihten
0,1678 über al ire gerihten
0,1679 di si zesamene brâhten
0,1680 di mohte man ahten
0,1681 ane vierzic tûsent
0,1682 dâr nâch in kurzer stunte
0,1683 genante sich Alexander
0,1684 unde mit ime manic ander
0,1685 wande si hâten stæten muot
0,1686 si schiffeten über di Eufrâtêischen vluot
0,1687 ze êrest si ze stade quâmen
0,1688 dô di herzogen daz vernâmen
0,1689 mit zorne vuoren si ime engagen

0,1690 unde wolten ime vlîzlîchen schaden
0,1691 dâ huop sich ein sturm grôz
0,1692 ein tûsent beleip dâ tôt
0,1693 von kriechischeme künne
0,1694 êr Alexander den vurt gewünne
0,1695 Alexandrô müejete daz
0,1696 ûf Bucivale er saz
0,1697 er ne wolte niwet bîten
0,1698 er begunde rîten
0,1699 ergremet was ime sîn muot
0,1700 er sluoc alse der doner tuot
0,1701 sîne vîande
0,1702 swaz ir ime quam ze hande
0,1703 der ne genas nie nehein muoterbarn
0,1704 sich ne mohte nieman bewarn
0,1705 von den slegen di er sluoc
0,1706 wande er ein tiure swert truoc
0,1707 ouch was sîn schaft starc unde grôz
0,1708 sweme sîn wart slac oder stôz
0,1709 der ne enbeiz niemer mêr brôtes
0,1710 wande er was des gewissen tôdes
0,1711 Mennes der wîgant
0,1712 den Darius hæte gesant
0,1713 Alexandrô engagen
0,1714 als ich daz buoch hôrte sagen
0,1715 der hæte manlîchen muot
0,1716 unde was ouch ein rîtær guot
0,1717 dô er di mære vernam
0,1718 stolzer rîtær er nam
0,1719 ze sich zehen hundert
0,1720 ûz sîneme here gesunderet
0,1721 di sîn solten hüeten
0,1722 mit ellenthaften müeten
0,1723 der kârte Alexandrô engagen
0,1724 dô daz Alexander hôrte sagen
0,1725 umbe kârte er sînen vanen
0,1726 unde begunde sîne helede manen
0,1727 Bucivale er verhangte
0,1728 Mennese er zuo sprangte
0,1729 durch sîne rîtære er dô brach
0,1730 ir iegeweder den anderen stach
0,1731 nider zuo der erden
0,1732 dô griffen si zuo den swerten
0,1733 dô sluogen di recken
0,1734 mit den brûnen eggen
0,1735 daz daz viur dâr ûz spranc
0,1736 ir iegeweder dranc
0,1737 vaste zuo dem anderen

0,1738 dô sluoc doch Alexanderen
0,1739 Mennes nider an daz gras
0,1740 ob di rede alsô was
0,1741 des mac uns al besunder
0,1742 nemen michel wunder
0,1743 dô huoben sich ire liute dare
0,1744 beidenthalben mit der schare
0,1745 dâ di helede junge
0,1746 mit nîde ensamet rungen
0,1747 dâ was michele nôt
0,1748 dâ beleip manic helt tôt
0,1749 sêre stoup dâ der melm
0,1750 dâ wart Alexandrô sîn helm
0,1751 von dem houbete gebrochen
0,1752 dâ was vile nâch gerochen
0,1753 Darius der tiure degen
0,1754 Alexandrô wart dâ gegeben
0,1755 manic stôz unde slac
0,1756 di wîle di er dâr nider lac
0,1757 leit er ein bittere nôt
0,1758 er was vile nâch tôt
0,1759 doch half in daz er genas
0,1760 daz er sô wole gewâfenet was
0,1761 vile schiere ime ouch ze helfenne quam
0,1762 Daclym ein rîtær lobesam
0,1763 der was mit Alexandrô dare komen
0,1764 der stuont ime ze grôzen vromen
0,1765 dâ er was bestanten
0,1766 von sînen vîanden
0,1767 sîn swert daz hæte er bare
0,1768 unde huop sich îlente dare
0,1769 der hiew umbe sich
0,1770 einem helede gelîch
0,1771 des dankete ime sint Alexander
0,1772 dô was ouch ein ander
0,1773 ein rîtær der hiez Jubal
0,1774 der sich ungerne verhal
0,1775 swâ iz in di nôt gienc
0,1776 der was ein edele jungelinc
0,1777 der was in anderere sîte
0,1778 in den selben strîte
0,1779 mit den zwein herzogen
0,1780 sîn swert hæte er erzogen
0,1781 der quam gedrunge dâr zuo
0,1782 unde wolte Alexandrô
0,1783 in den hals slân einen slac
0,1784 dâ er in blôz sach
0,1785 Daclym wart der êrre

0,1786 unde lôste sînen hêrre
0,1787 er sluoc Jubale
0,1788 zuo dem selben mâle
0,1789 obene von den zenden
0,1790 nidene durch di lenden
0,1791 unde machete zwêne halbe man
0,1792 vile michel lop er des gewan
0,1793 Daclym der ellenthafte man
0,1794 vile schiere er dô nam
0,1795 den helm mit sîner hant
0,1796 Alexandrô er in ûf bant
0,1797 sîn houbet was ime verschellet
0,1798 dâ er nider was gevellet
0,1799 von den michelen slegen
0,1800 ich wil iu wærlîchen sagen
0,1801 er ne erwîelt sich niwet sîner rede
0,1802 ime wâren zerblûwen sîne lide
0,1803 des wart Daclym innen
0,1804 unde rief mit hôher stimmen
0,1805 “Alexander hêrre küninc
0,1806 gedenket hiute an iuwer tugent
0,1807 unde manet iuwer gesellen
0,1808 daz si diz here erschellen
0,1809 wande ir ein tiure kneht sît
0,1810 nû reget daz swert des ist zît”
0,1811 dô Alexander wart lôs
0,1812 dô spranc er ûf sîn ros
0,1813 sîn gebære daz was eislich
0,1814 sîn ougen wâren vreislich
0,1815 dâr umbe vorhte in manic man
0,1816 dô er ze ime selben wider quam
0,1817 dô hæte er michelen zorn
0,1818 sîn ros nam er mit den sporen
0,1819 unde sagete Daclyme danc
0,1820 unde vrumete manigen swertes swanc
0,1821 under daz here daz dâ was
0,1822 daz sluoc er nider als ein gras
0,1823 di menige was vile grôz
0,1824 di er ersluoc unde erschôz
0,1825 unzallich wære uns ze sagenne
0,1826 umbe di dâ lâgen erslagen
0,1827 Persen unde Kriechen
0,1828 sunder gewunden unde siechen
0,1829 dâ was weinen unde klagen
0,1830 von einen volcwîge hoeren wir sagen
0,1831 der ûf Wûlpenwerde geschach
0,1832 dâr Hilten vater tôt lac
0,1833 enzwischen Hagenen unde Waten

0,1834 der ne mohte sich hier zuo niht gegaten
0,1835 Herwîc unde Wolvwîn
0,1836 ne mohten ime niwet gelîch sîn
0,1837 noch nehein man ander
0,1838 alsô vreislich was Alexander
0,1839 man saget von guoten knehten
0,1840 di wole getorsten vekten
0,1841 in der Trôjære liede
0,1842 êr der sturm geschiede
0,1843 Achilles unde Hektor
0,1844 Ajax unde Nestor
0,1845 di manic tûsent ersluogen
0,1846 unde ouch scharpfe gêre truogen
0,1847 iz ne mohte under in allen
0,1848 ze Alexandrô niht gevallen
0,1849 Pynchun was ein græve genant
0,1850 der vuorte den vanen an der hant
0,1851 den er Alexandrô abe brach
0,1852 dô in Mennes dâr nider stach
0,1853 dô in Alexander hæte erkoren
0,1854 er ruorte daz ros mit den sporen
0,1855 engagen den grâven er reit
0,1856 er sprach daz was michel kintheit
0,1857 daz mîn vane ie quam an dîner hant
0,1858 daz sol dir werden noch gewant
0,1859 ze leide unde ze riuwen
0,1860 des maht dû mir getrûwen
0,1861 der grâve dô er ez gehôrte
0,1862 Alexandrô er antwurte
0,1863 er sprach nû varet schône
0,1864 daz iu mîn trehtîn lône
0,1865 daz ich vüeren iuweren vanen
0,1866 daz sol iu werden ze banen
0,1867 muoz ich behalten mînen leben
0,1868 ich wil in iu sô wider geben
0,1869 daz man dâr vone reden mac
0,1870 biz an den jungesten tac
0,1871 er stach nâch dem worte
0,1872 Alexandrum mit dem orte
0,1873 daz an sînem spere was
0,1874 des stiches er wole genas
0,1875 wande er was ime getân
0,1876 obenwentige sînen oucbrâwen
0,1877 Alexander der sprach
0,1878 dô in Pynchun gestach
0,1879 “dû salt lügenære wesen
0,1880 ich sal des stiches wole genesen”
0,1881 mit dem selben worte

0,1882 sluoc er in mit dem swerte
0,1883 ûfe sîn houbet er in sluoc
0,1884 durch den stælinen huot
0,1885 einen sô vreislîchen slac
0,1886 daz er an der erden tôt lac
0,1887 dô nam Alexander sînen vanen
0,1888 unde reit riterlîche dannen
0,1889 dâ er wisse sîne man
0,1890 Mennes ime aber zuo quam
0,1891 der in dâ vore dâr nider stach
0,1892 er gap ime einen swertslac
0,1893 ûf den arm er in sluoc
0,1894 dâ er daz sper mite truoc
0,1895 er sluoc in mit grôzer kraft
0,1896 durch den arm unde durch den schaft
0,1897 quam daz swert gedrunge
0,1898 unde erwant ime an der lungen
0,1899 Mennes der viel dâ tôt nider
0,1900 di Perses vuhten niwet sider
0,1901 si vluhen von den velde
0,1902 unde ne getrûweten an sich selben
0,1903 neheiner manheite mêr
0,1904 unde riefen ach unde wê
0,1905 des wart Alexander vile balt
0,1906 aldâ beleip er mit gewalt
0,1907 biz zuo den stunten
0,1908 daz ime geheileten sîne wunden
0,1909 er nâhete sich Dariô baz
0,1910 eine burc er ime besaz
0,1911 di was Sardis genant
0,1912 schiere wart si verbrant
0,1913 dô er si gewan
0,1914 der hêrre dâr ûf nam
0,1915 michel silber unde golt
0,1916 unde machete ime sîne heledē holt
0,1917 di burc di heizet Sardis
0,1918 von ir saget apokalipsis
0,1919 daz si der sibē bûrge ein wære
0,1920 di unser heilære
0,1921 in dem himelrîche nante
0,1922 unde dare er ze boten sande
0,1923 Johannem den heiligen man
0,1924 apostolum et evangelistam
0,1925 dô man Dariô diz gesagete
0,1926 niwet langer er gedagete
0,1927 er tete durch sînen übermuot
0,1928 alse der stolze man tuot
0,1929 der sich ze sêre verhebet

0,1930 unde ze jungeste in dem laster liget
0,1931 er swuor bî sînem rîche
0,1932 daz er vile lasterlîche
0,1933 Alexander wolte vâhen
0,1934 unde ûf einen ast hâhen
0,1935 unde schantlîche nemen im daz leben
0,1936 unde wolte ouch sîn vleisch geben
0,1937 den vogelen ze ezzenne
0,1938 daz er sich ie torste vermezzen
0,1939 wider sînen hêrren
0,1940 daz würde ime ze unêren
0,1941 Darius sîne boten sande
0,1942 in wazzer unde in lande
0,1943 unde hiez daz sînen vûrsten sagen
0,1944 unde vlîzlîchen klagen
0,1945 den kûningen di schande
0,1946 di ime tete Alexander
0,1947 er bat herzogen unde grâven
0,1948 daz si ime rât gâben
0,1949 unde ime mit gelfe
0,1950 quâmen ze helfen
0,1951 mit alsô tiuren knehten
0,1952 di wole getorsten vehnten
0,1953 mit aller ire menige
0,1954 ze Mesopotamie
0,1955 in der breiten ouwen
0,1956 wolte er daz here beschouwen
0,1957 wande er gerne vernæme
0,1958 wie manic schare ime quæme
0,1959 nû wil ich iu kûnden überal
0,1960 wie vile einer schare wesen sal
0,1961 als ich ez in den buochen hân gelesen
0,1962 der sal sehs tûsent wesen
0,1963 unde sehs hundert unde sehszic manne
0,1964 als ich mich versinnen kan
0,1965 alsô vile sal sîn in einer scharen
0,1966 gagen Dariô quâmen gevaren
0,1967 zwô unde drîzic kûninge
0,1968 daz wizzet âne lûgene
0,1969 di sîne nôt vernâmen
0,1970 herzogen ime ouch quâmen
0,1971 zwei hundert unde sibenzic
0,1972 unde dâr zuo manic grâve rîche
0,1973 di zuo ime kêrten
0,1974 unde sîne reise mêrten
0,1975 di quâmen alle mit gewalt
0,1976 di grâven wâren gezalt
0,1977 rehte an einlif hundert

0,1978 ob iu der hêrren wunderet
0,1979 des ne sulet ir mir wîzen niet
0,1980 wande iz kûndet uns daz liet
0,1981 unde daz buoch dâ ich ez ane las
0,1982 daz ir alsus vile was
0,1983 von Persien wurden ime gesant
0,1984 heledē sibenzic tûsent
0,1985 ouch quâmen Cenonenses dare
0,1986 mit einer hêrlîcher vare
0,1987 mit vûnfzic tûsent knehten
0,1988 di wole getorsten vehten
0,1989 Pamphilienses quâmen ouch wale
0,1990 unde brâhten ime di selben zale
0,1991 dâr nâch quam ime ein here grôz
0,1992 dem wîges lûtzel verdrôz
0,1993 daz kûninges reisen wole gezam
0,1994 von Medentrîche daz quam
0,1995 Meden ist daz selbe lant
0,1996 dâ der engel wart mit Tobîen gesant
0,1997 vûnvzic tûsent si brâhten
0,1998 alsus hôrte ich si ahten
0,1999 von Ninivê wurden ime gesant
0,2000 zwei unde zweinzic tûsent
0,2001 ime brâhten di von Armenie
0,2002 ahte tûsent in einer menige
0,2003 vile sneller jungelinge
0,2004 zuo sînem tagedinge
0,2005 Armenien ist daz rîche
0,2006 daz sage ich iu wærlîche
0,2007 dâ daz wazzer di arcam treip
0,2008 dâ Nôê lebente inne beleip
0,2009 in den bergen si dâ besaz
0,2010 vûre wâr solet ir wizzen daz
0,2011 ouch sanden dâr zuo
0,2012 dem rîcheme kûninge Dariô
0,2013 di übermüetige Gazen
0,2014 di über Philistim sâzen
0,2015 zehen hundert starker risen
0,2016 di ime ze trôste solten wesen
0,2017 ime sanden sîne vrîe man
0,2018 di dâ sâzen in Phrygiam
0,2019 mit vile guoten willen
0,2020 zweinzic tûsent gesellen
0,2021 si gunden ime wole sîner êren
0,2022 ouch begunden dar kêren
0,2023 von India di vûrsten
0,2024 di wole vehten torsten
0,2025 dô si ez vernâmen

0,2026 mit zwelif tûsenden si quâmen
0,2027 dannoch quam ime ein lützel here
0,2028 daz vuor von dem rôten mere
0,2029 ein tûsent sneller helede
0,2030 ze wîge wole erwelete
0,2031 nû merket wie vile dises heres was
0,2032 als ich ez an den buochen las
0,2033 sô ahte man iz dâ ze stunte
0,2034 an sehs hundert unde drîzic tûsent
0,2035 daz allez Dariô quam
0,2036 unde alse Alexander vernam
0,2037 daz ime Darius mit here
0,2038 daz lant ze Persiam wolte weren
0,2039 dô besande er sîne man
0,2040 di von Macedoniam
0,2041 di quâmen ime gereite
0,2042 dô hiez er here leiten
0,2043 über ein wazzer daz was breit
0,2044 Darius under des schreip
0,2045 einen brieve Alexandrô
0,2046 unde hiez ime dâr zuo
0,2047 eine wâge mâhenes vûre tragen
0,2048 unde hiez ime sagen
0,2049 daz er zalte di korn
0,2050 iz wære ime leit oder zorn
0,2051 er ne konde si niet gezelen
0,2052 alsô ne mohte er sîne gesellen
0,2053 gezelen noch sîne heres kraft
0,2054 di er ime gagen hæte brâht
0,2055 ouch sagete ime der brieve
0,2056 Dariô ne wære niwet liep
0,2057 daz er mit solicher gewalt
0,2058 wolte ze Persiam in daz lant
0,2059 er ne wolte iz ime rûmen
0,2060 er vernæme ein solich gestriume
0,2061 dâ er iemer vone mohte zellen
0,2062 in liede unde in bîspellen
0,2063 dô Alexander gelas
0,2064 daz an den brieve geschriben was
0,2065 der wole geborene jungelinc
0,2066 den mâhen er vroelîche entvienc
0,2067 unde warf in der stunte
0,2068 in sînes selbes munt
0,2069 unde az sîn ein vile michel teil
0,2070 unde sprach “wir haben guot heil
0,2071 dise kôrner sint sô manicvalt
0,2072 si ne werdent von mir niemer gezalt”
0,2073 in sînen munt er si streich

0,2074 unde sprach “si sint sô weich
0,2075 unde smeckent sô wole
0,2076 ich hoffe daz ich sîn here sole
0,2077 harte wole verwinnen
0,2078 mit mînen jungelingen”
0,2079 sîn bote quam under des gerant
0,2080 dâ er Alexandrum vant
0,2081 der sagete ime daz Olympias
0,2082 sîn muoter vile siech was
0,2083 unde bat in vile harte
0,2084 daz er dâ hine kârte
0,2085 wande si des jæhe
0,2086 ob si in gesæhe
0,2087 si genæse kurzlîche
0,2088 Alexander der rîche
0,2089 der schreip dô selbe einen brief
0,2090 di hant er in sînen biutel stiez
0,2091 als iz ime in den muot quam
0,2092 sîne hant vol pfefferes er nam
0,2093 ze Darien boten er dô sprach
0,2094 “diz ezze dîn hêrre ob er mac
0,2095 dise kôrner sint niht manicvalt
0,2096 si sint vile schiere gezalt
0,2097 alsus bitter ist mîn hêre
0,2098 er ne mac sich niemer mich erwerben
0,2099 ouch sage dû dîneme hêren
0,2100 ich wil nû wider kêren
0,2101 alse mir mîn muoter entbôt
0,2102 anders durch neheine nôt
0,2103 iz sî ime leit oder liep
0,2104 dâr umbe ne lâze ich is niet
0,2105 ich wil schiere wider komen
0,2106 des gewinnet er lützel vromen
0,2107 di wîle mac er bî dem mere
0,2108 gesamenen ein grôz here
0,2109 daz er mir vrûmelîche
0,2110 erwere sîne rîche”
0,2111 dô reit der bote von Alexandrô
0,2112 wider hin ze Dariô
0,2113 unde sagete ime daz
0,2114 daz Alexander den mâhen az
0,2115 den er ime hæte gesant
0,2116 unde gap ime den pfeffer in di hant
0,2117 den entvienc er mit zorne
0,2118 unde warf di pfefferkôrner
0,2119 nîtlichen in sînen munt
0,2120 unde beiz si an der stunte
0,2121 dô begunde er sich krempfen

0,2122 unde di nase rempfen
0,2123 wande in der pfeffer sêre beiz
0,2124 sîn lîp di wart ime aller heiz
0,2125 er neigete sich nidere
0,2126 unde wolte daz Alexander widere
0,2127 wære âne sîne schande
0,2128 heim in sînem lande
0,2129 an dem wege dâ Alexander
0,2130 heim reit ze lande
0,2131 enmitten Arabia
0,2132 dâ bestuont in Amenta
0,2133 der was Daries man
0,2134 unde was ein herzoge lobesam
0,2135 des næhesten morgenes vruo
0,2136 mit volcwîge reit er ime zuo
0,2137 unde vuhten allen einen tac
0,2138 sô dâ nieman gesach
0,2139 neheinen man entwîchen
0,2140 si vuhten vreislîchen
0,2141 zwêne tage al in ein
0,2142 daz di sunne niet ne geschein
0,2143 wande si ne wolte beluhten niht den mort
0,2144 alsus vâhten si vort
0,2145 unze di helede guote
0,2146 wuoten in den bluote
0,2147 vaste biz an di kniewe
0,2148 si vuhten langer tage drî
0,2149 vile manic in dem bluote ertranc
0,2150 daz ime nie nehein swanc
0,2151 ne wart von swerte noch von spere
0,2152 manic tûsent was dere
0,2153 di dâ erslagen lâgen
0,2154 dô Arabite daz gesâgen
0,2155 si entwîchen Alexandrô
0,2156 unde vluhen wider ze Dariô
0,2157 Alexander der rîche
0,2158 hiez dô vlîzlîche
0,2159 sîne liebe wîcgenôze begraben
0,2160 di dâ lâgen erslagen
0,2161 di gewunteten hiez er binden
0,2162 unde arzâte in gewinnen
0,2163 unde hiez daz man ir wole pflæge
0,2164 biz daz er gesæge
0,2165 ob si mohten genesen
0,2166 alsô lange wolte er dâr wesen
0,2167 des siges was er vile vrô
0,2168 riuwic was er dâr zuo
0,2169 wande er dâ habete verloren

0,2170 di ime dicke dâ bevorn
0,2171 hulfen sîner êren
0,2172 zuo Tyre der mæren
0,2173 dô di wole genâren
0,2174 di dâ gewuntet wâren
0,2175 dô vuor Alexander vûre sich
0,2176 manige burc hêrlich
0,2177 under wegen er zerbrach
0,2178 er tete michel ungemach
0,2179 sînen vîanden
0,2180 in vremeden landen
0,2181 sêre rach er sînen zorn
0,2182 wande er hæte verloren
0,2183 di küenen Macedônes
0,2184 sus getânes muotes
0,2185 gesach er sîne muoter
0,2186 des genas di vrouwe guote
0,2187 vile vrôen muot er des gewan
0,2188 dô besande er sîne man
0,2189 in allenthalben bî dem mere
0,2190 er hæte gerne ein grôz here
0,2191 des gewan genuoc der helt balt
0,2192 ze hundert tûsenden wâren gezalt
0,2193 di helede di ime quâmen
0,2194 di sîne reise vernâmen
0,2195 di wole vehten kunden
0,2196 dô si sich is underwunten
0,2197 dô vuor von Macedonia
0,2198 Alexander wider in Persia
0,2199 under wegen er betwanc
0,2200 manige burc unde lant
0,2201 gewalticliche ze sînen handen
0,2202 Abdirus sich besande
0,2203 nâch iren holden
0,2204 wande si weren wolten
0,2205 di strâze Alexandrô
0,2206 si wâren holt Dariô
0,2207 Abdirus was ein michel stat
0,2208 under den bergen si lac
0,2209 swer in Persen wolte
0,2210 dâ durch er varen solte
0,2211 dâ wâren rîtære gemeit
0,2212 unde wâren ze aller zît gereit
0,2213 ze wîge unde ze sturme
0,2214 si besluzzen ire bûrge
0,2215 unde giengen vaste an di were
0,2216 Alexander unde sîn here
0,2217 gewonnen schiere daz wal

0,2218 si macheten viur überal
0,2219 si branten di hûs in den graben
0,2220 daz wart den burgæren ze schaden
0,2221 wande dô si daz gesâhen
0,2222 dô suochten si genâde
0,2223 dô sprach Alexander
0,2224 ich ne gelobe iu niwet anderes
0,2225 lâzent ir mich rîten hier durch
0,2226 iuwe lant unde iuwe burc
0,2227 daz lâze ich unverbrennet
0,2228 nû ir iuch mir bekennet
0,2229 swanne ich Darium betwinge
0,2230 unde in gefangen bringe
0,2231 sô wil ich her wider kêren
0,2232 unde sprechen mit iuch hêrren
0,2233 sô wil ich zervûeren iuwer stat
0,2234 sô gezeige ich iu waz ich getuon mac
0,2235 dô di burgære
0,2236 vernâmen dise mære
0,2237 si underquâmen vile harte
0,2238 unde entsluzzen ire porte
0,2239 si liezen in rîten mit vride
0,2240 mit in ne vaht er niwet sider
0,2241 durch sîne küninclîche wort
0,2242 beleip di stat unzustört
0,2243 dannen vuor er ze Thêben
0,2244 unde hiez dâr in gebieten
0,2245 daz si ime sanden dare
0,2246 di wole ze wîge wâren gare
0,2247 vier tûsent erwelede man
0,2248 er wolte Darium bestân
0,2249 dô di Thêbære
0,2250 vernâmen daz mære
0,2251 daz in Alexander entbôt
0,2252 iz dûhte si ein hôchmuot
0,2253 unde kârten ez ime ze schanden
0,2254 daz er ie dar gesande
0,2255 nâch iren wineholden
0,2256 wande si selben wolten
0,2257 mit ime vehten vore der stat
0,2258 dô Alexander daz gesach
0,2259 di burc bevienc er mit here
0,2260 si ne mohten sich niwet erwerben
0,2261 vore ime decheine wîle
0,2262 di armbrust unde di pfile
0,2263 tâten ime vile grôzen schaden
0,2264 in ander halbe hiez er zuo tragen
0,2265 sinewelle steine

0,2266 grôz unde kleine
0,2267 mit mangeln wurfen si in di burc
0,2268 dô wære in guotes râtes durft
0,2269 mit sus getânen grimmen
0,2270 begunde er si twingen
0,2271 si ne mohten ime niwet vore bestân
0,2272 si muosen den lîp verloren hân
0,2273 dô hiez der wunderlîche man
0,2274 vier tûsent dare gân
0,2275 mit îsenînen stangen
0,2276 zerbrâchen si di spangen
0,2277 di dâ lâgen vore den tûren
0,2278 dô ne beleip dâ nieman vore
0,2279 mit grimme giengen si in di burc
0,2280 dâ wære eines vriden durft
0,2281 den gap in dâ nieman
0,2282 si sluogen wîp unde man
0,2283 unde branten si al in eine gluot
0,2284 dô gestillete deme künige sîn muot
0,2285 dô Alexander der küene man
0,2286 di stat ze Thêben gewan
0,2287 unde si gare was verbrant
0,2288 dô gebôt der küene wîgant
0,2289 sînen mannen an der stunte
0,2290 daz si brâchen daz fullemunt
0,2291 durch daz di burc hêre
0,2292 ne mohte niemer mêre
0,2293 nieman gebûwen
0,2294 des mügent ir wole getrûwen
0,2295 dô daz alsus was getân
0,2296 Alexander huop sich sîn
0,2297 unde vuor dannen
0,2298 vroelîche mit sînen mannen
0,2299 des landes er vile gewan
0,2300 Chorintia sînes vrides gesan
0,2301 unde kuren in an der stunte
0,2302 unde gâben ime vûnvzic pfunt
0,2303 unde silber unde golt
0,2304 des wart ime der küninc holt
0,2305 Korinthia was ein michel stat
0,2306 di bekârte von der heidenschaf
0,2307 dâr nâch sanctus Paulus
0,2308 Alexander huop sich dâr ûz
0,2309 unde vuor at Athenas
0,2310 di des vermæret was
0,2311 daz nehein liut ne mohte wesen
0,2312 von dem ich ie gehôrte lesen
0,2313 wîser ze allen dingen

0,2314 ze râte si dô giengen
0,2315 waz si tuon mahten
0,2316 schiere si sich bedâhten
0,2317 si wolten gerne vride hân
0,2318 unde wurden ime alle undertân
0,2319 di küenen Lacedemones
0,2320 di verhuoben sich des
0,2321 daz si sâzen bî dem mere
0,2322 unde hæten ein kreftigez here
0,2323 unde vâhten manic volcwîc
0,2324 unde verwunnen einen küninc rîche
0,2325 den gewaltigen Xersem
0,2326 des wâren si vermezzen
0,2327 si entbuten Alexandrô
0,2328 wolte er schaden Dariô
0,2329 daz dûhte si unmâze
0,2330 si wereten ime di strâze
0,2331 si widersageten ime den vride
0,2332 unde wolten vehten mit ime
0,2333 dô gereitte sich in den strît
0,2334 beide man unde wîp
0,2335 unde giengen vaste an di were
0,2336 wande si hæten in dem mere
0,2337 behalten grôze heres kraft
0,2338 dâ mite hæten si gedâht
0,2339 ze vehtenne von den schiffen
0,2340 ire bercvride si ûf rihten
0,2341 unde macheten ire were
0,2342 gegen Alexandris here
0,2343 alse Alexander daz gesach
0,2344 dô entbôt er in di stat
0,2345 weme si daz wazzer wolten weren
0,2346 er ne wolte niwet über mere
0,2347 er hiez si halten ire burc
0,2348 des wære in nôt unde durft
0,2349 er wolte an in daz rechen
0,2350 daz si den küninc Xersem
0,2351 mit wîge torsten bestân
0,2352 dô viel er umbe di burc sân
0,2353 mit sînen jungelingen
0,2354 ze sturme si dô giengen
0,2355 daz einmüetige here
0,2356 vaste unz an di burcwere
0,2357 Alexander was ze vorderest
0,2358 unde gap sînen heleden trôst
0,2359 mit sîner ellenthaften hant
0,2360 verhiu er maniges schildes rant
0,2361 unde manigen helm vile vast

0,2362 der jener nie nehein genas
0,2363 dâ er mit nîde ûfe sluoc
0,2364 er hæte eines lewen muot
0,2365 di dâ lâgen erslagen
0,2366 di ne kunde iu nieman gesagen
0,2367 ist iz alse daz buoch quît
0,2368 di naht di schiet dâ den strît
0,2369 des næhesten morgenes vile vruo
0,2370 der stat giengen si aber zuo
0,2371 unde alse di burgære
0,2372 gesâhen sîne gebære
0,2373 si wurfen ûf ire tore
0,2374 unde stuonten vaste dâr vore
0,2375 si sluogen unde stâchen
0,2376 daz di vesten ringe brâchen
0,2377 dâ wart manic helt guot
0,2378 gewunt durch den stâlhuot
0,2379 sô daz ime daz bluot vlôz ze tale
0,2380 di swert striten vile wale
0,2381 di veigen vielen dâr nider
0,2382 di anderen vâhten vaste sider
0,2383 dâ mohte der schilt lützel gevromen
0,2384 si wâren durch ruom ûz komen
0,2385 di küenen Macedônes
0,2386 gegen di Lacedemônes
0,2387 in was lieber daz si sturben
0,2388 danne si verwunnen wurden
0,2389 durch disen grimmigen muot
0,2390 quam gevlozzen daz bluot
0,2391 vaste unz in daz mere
0,2392 dô geschiet sich daz here
0,2393 beidenthalben âne sige
0,2394 ir nehein ne suochte neheinen vride
0,2395 unde alse Alexander den schaden gesach
0,2396 der ime dâr geschien was
0,2397 an sînen jungelingen
0,2398 dô hiez er ime gewinnen
0,2399 balde daz kriechische viur
0,2400 daz wart den burgâren vile sûr
0,2401 er brante di schif in dem mere
0,2402 daz ne mohte daz wazzer niht erweren
0,2403 daz sage ich iu ze wâren
0,2404 di in den schiffen wâren
0,2405 dô si des viures wurden innen
0,2406 dô wolten si ûz swimmen
0,2407 des liten si michele nôt
0,2408 wande si vorhten den tôt
0,2409 daz lebent wart in vile sûr

0,2410 wande si brante daz wilde viur
0,2411 in der selben wîlen
0,2412 sturben si von den pîlen
0,2413 di man in engagen schôz
0,2414 vile manic sînen genôz
0,2415 in daz mere ertrankte
0,2416 als er sîn niht ne erkante
0,2417 dô branten di wîchûs
0,2418 di gîsele gap man dâr ûz
0,2419 leider alze spâte
0,2420 wande si verloren hâten
0,2421 di allerkûenesten man
0,2422 als ich mich versinnen kan
0,2423 die ie beschein di sunne
0,2424 oder iemer mêr gewonnen
0,2425 di kûenen Macedônes
0,2426 di bûrgen bâten si des
0,2427 daz si in vride wolten geben
0,2428 daz si behielten daz leben
0,2429 unde liezen stân ire stat
0,2430 Alexander in dô vride gap
0,2431 daz er in niht ne schadete
0,2432 an allen des si habeten
0,2433 dô vuor er dannen in Persiam
0,2434 unde alse daz Darius vernam
0,2435 er sprach zuo sînen râtgeben
0,2436 nû mac mich riuwen daz ich leben
0,2437 wande mir dise roubære
0,2438 müejet alsus sêre
0,2439 di sælde volget sînen vanen
0,2440 ich vûrhte er wirdet mir ze banen
0,2441 er vihtet in allenthalben sige
0,2442 wolte er mich lâzen mit vride
0,2443 haben mîne rîche
0,2444 ich gelobete ime wærlîche
0,2445 daz ich ze Kriechlante
0,2446 nâch zinse gesande
0,2447 von disen tage niemer mêr
0,2448 mir werde wole oder wê
0,2449 dô sprâchen sîne vûrsten
0,2450 di ime wole râten torsten
0,2451 “Darius vile lieber hêrre
0,2452 dû hâst sô wole dîn êre
0,2453 ienoch unze here brâht
0,2454 den zins den dir sîn vater gap
0,2455 den sal dir ouch der sun geben
0,2456 oder wir verliesen den leben
0,2457 swenne er dînes heres kraft

0,2458 di dû vile wole geleisten maht
0,2459 sihet engagen ime varn
0,2460 sô wirdet er des wole geware
0,2461 daz dû wole mit êren
0,2462 maht wesen dîn zinsære”
0,2463 dô sprach Occeatyr
0,2464 Darieses bruoder
0,2465 “dû hâs des grôze schande
0,2466 daz dû Alexandre
0,2467 dem ungetriuwen roubære
0,2468 ie gebütes êre
0,2469 dû hâst gehoeht sînen muot
0,2470 jô ne dûhte mich ez nie guot
0,2471 daz dû ie getættes di klage
0,2472 daz er dir mohte geschaden
0,2473 in dîneme rîche
0,2474 dir ne wollen danne geswîchen
0,2475 beide vriunde unde man
0,2476 er hât eine reise getân
0,2477 der er niemer mêre
0,2478 ne komet an sîne êre
0,2479 ouch wil ich dir sagen
0,2480 dû salt des sînen site haben
0,2481 umbe ieteslîche dinc
0,2482 di dir vile guot sint
0,2483 swâ er ane di nôt komet
0,2484 nieman soliches niet ne vromet
0,2485 ze sturme noch ze wîge
0,2486 sô er mit sînen lîbe
0,2487 er ne sî iemer ze vorderest
0,2488 dâ vone hânt si den trôst
0,2489 di edelen wîgande
0,2490 man mac an den vîanden
0,2491 nemen guot bilede
0,2492 dâ iz gêt an di tugende”
0,2493 dô sprach ein ander râtgebe
0,2494 “hêre dû salt mir vernemen
0,2495 unde salt vile rehte verstân
0,2496 wie sîne site sint getân
0,2497 wande ich ez dir wole gesagen kan
0,2498 umbe den wunderlîchen man
0,2499 iz ist mir allerbezziste kunt
0,2500 ich was wîlen ze einer stunte
0,2501 mit dînen mannen gesant
0,2502 in sînes vateres lant
0,2503 dô solten wir holen den zins
0,2504 dannoch was er ein lützel kint
0,2505 unde was doch wîser

0,2506 danne dechein man grîser
0,2507 er quam dicke drâte
0,2508 ze sînes vateres râte
0,2509 dâ er rât habete
0,2510 vile sêre er daz klagete
0,2511 daz sîn vater wære
0,2512 dîn zinsære
0,2513 er swuor sô ime sîn lîp
0,2514 gelebete iemer di zît
0,2515 daz gewalticliche
0,2516 sînes vateres rîche
0,2517 an ime quæme
0,2518 des zinses er sich benæme
0,2519 nû ist er alsô here komen
0,2520 hân ich ez rehte vernomen
0,2521 er wil iz vollenbringen
0,2522 nû salt dû dich besenden
0,2523 nâch dînen mannen
0,2524 di dû hâst in den landen
0,2525 di dir sint undertân
0,2526 daz dir ne müge nehein man
0,2527 den sige an erwerben
0,2528 er ne wille sterben
0,2529 daz ist der rât mîn
0,2530 ich wæne iz mac ouch wole sîn”
0,2531 dô sprach ein ander râtman
0,2532 des ich genennen niet ne kan
0,2533 “der rât mir vile wole behaget
0,2534 mir ist dicke daz gesaget
0,2535 daz er mêr mit wîsheite
0,2536 danne mit degenheite
0,2537 dich küninc wil betwingen
0,2538 unde den zins an dir gewinnen
0,2539 wande eines hundes bellen
0,2540 mac vile schâfe erschellen
0,2541 ob si rehtes hûetæres niht ne haben
0,2542 er tuot in michelen schaden”
0,2543 dâ mite meinte er daz
0,2544 daz iz ein unstæte volc was
0,2545 allez Daries here
0,2546 dâ er sich mite wolte weren
0,2547 hinnen disen râte
0,2548 den der küninc hâte
0,2549 quam Alexander
0,2550 ze Dariuses lande
0,2551 einhalben bî dem mere
0,2552 dâ liez er ruowen sîn here
0,2553 di sunne schein vile heiz

0,2554 harte müejete si der sweiz
0,2555 dô gienc Alexander
0,2556 unde mit ime manic ander
0,2557 baden in den wâc
0,2558 der rite bestuont in dâr nâch
0,2559 des gewan sîn here grôz
0,2560 vile michelen untrôst
0,2561 si vorhten vile sêre
0,2562 ob iz Darius vernæme
0,2563 daz dannen niemer ir nehein
0,2564 ne quæme lebente heim
0,2565 von disem untrôste
0,2566 ein arzât si erlôste
0,2567 Philippus hiez der junge man
0,2568 ein vürste was ime gram
0,2569 geheizen Perminus
0,2570 einen brieve schreip er alsus
0,2571 er sprach “Alexander hêre
0,2572 vile liep sint mir dîne êre
0,2573 niwet ne nim dû den tranc
0,2574 den dir der arzât hât gesant
0,2575 iz ist Dariuses rât
0,2576 wande er ime gelobet hât
0,2577 ze gebenne sîne swester
0,2578 er wil in ze einem vürsten
0,2579 in sînen lande machen
0,2580 swenne er daz geschaffe
0,2581 daz er dir den tût gegebe
0,2582 des trankes ne salt dû niwet nemen”
0,2583 Alexander las disen brieve
0,2584 er ne liez iz umbe daz niet
0,2585 er ne næme den tranc
0,2586 unde gienc dâ er Philippum vant
0,2587 er sprach “geselle vile liep
0,2588 wie gevellet dir dirre brieve”
0,2589 “übele” sprach der jungelinc
0,2590 dû weist wole hêre mîne dinc
0,2591 her zuo wær ich ze guot
0,2592 ich ne gewan des nie neheinen muot
0,2593 daz ich dir tæte den tût
0,2594 daz hætes dû unverschuldiget
0,2595 doch wær iz ime liep
0,2596 der dir sande disen brieve
0,2597 ob dû des næmes grôzen schaden
0,2598 er wolte dich lîhte verklagen
0,2599 nû heiz in dir gewinnen
0,2600 unde danke im der minnen
0,2601 di er dir küninc tæte

0,2602 dô er dich warnete
0,2603 dô Alexander genas
0,2604 unde des wole gewis was
0,2605 daz ime der tranc wole bequam
0,2606 Perminen hiez er slân
0,2607 ze sîner anesihte
0,2608 Philippô er dô rihte
0,2609 wande er in habete belogen
0,2610 dô hiez er sîne herzogen
0,2611 sîn here leiten
0,2612 des wâren si ime gereite
0,2613 in daz lant ze Armeniâ
0,2614 zimberen begunde er dâ
0,2615 eine burc unde eine stat
0,2616 dannen vuor er vûrebaz
0,2617 an eine breiten heide
0,2618 dâ was übel weide
0,2619 rossen unde mannen
0,2620 dô huoben si sich dannen
0,2621 in kurzen stunten dâr nâh
0,2622 in eine stat di heizet Andriâ
0,2623 dâr quâmen si ze einem wâge
0,2624 dâ geschach in genâde
0,2625 wande si sich gelabeten
0,2626 von dem durste den si habeten
0,2627 der wâc hiez Eufrates
0,2628 in ein wurden si des
0,2629 daz der küninc hiez sîne man
0,2630 grôze boume houwen
0,2631 unde eine brügge machen
0,2632 dô daz was geschaffet
0,2633 unde di brügge was gemachet
0,2634 alle zwîveleten si dâr an
0,2635 wande dâr ne was nieman
0,2636 der in den selben zîten
0,2637 dâr über torste rîten
0,2638 Alexander sich genante
0,2639 über die brüggen her rante
0,2640 den sînen wart vile gâch
0,2641 unde ranten ime allez nâch
0,2642 dô si quâmen übere
0,2643 Alexander kârte widere
0,2644 unde zerhiu alle di spangen
0,2645 dâ di brügge was ane gehangen
0,2646 dô vlôz di brügge ze tale
0,2647 daz ne geviel dâ niemanne wole
0,2648 si redeten albesunder
0,2649 si næme des michel wunder

0,2650 durch waz der wunderlîche man
0,2651 daz habete getân
0,2652 ouch sprâchen si mêr
0,2653 “uns sol werden vile wê
0,2654 werden wir hier sigelôs
0,2655 sô ne haben wir neheinen trôst
0,2656 heim ze unseme rîche
0,2657 sô sterben wir jâmerlîche”
0,2658 sân an der stunte
0,2659 sô wart diu rede kund
0,2660 deme künige Alexandrô
0,2661 vile wole behaite iz ime dô
0,2662 er sprach ze sînen überal
0,2663 “diz gevellet mir wole
0,2664 daz ir mînen gedanc
0,2665 alsô rehte hât erkant
0,2666 unde mîne liste
0,2667 unde ir sô gerne wistet
0,2668 durch waz ich dise brüggen brach
0,2669 daz tet ich allez umbe daz
0,2670 ob man uns jagete
0,2671 daz wir neheinen trôst ne habeten
0,2672 heim zuo unseme lande
0,2673 sô gedæhten wir wole ze den handen
0,2674 unde vuhten alse helede
0,2675 vrumes mannes seledē
0,2676 di sint in lande gelîch
0,2677 nû weret helede den lîp
0,2678 wande quæme daz heim mære
0,2679 daz wir hin entrunnen wæren
0,2680 wir müesen danne von den wîben
0,2681 solichen spot lîden
0,2682 daz uns lieber mohte wesen
0,2683 verlûren wir alle hier den leben
0,2684 nû gedenket helede dâr zuo
0,2685 wie wir sô leide getuon
0,2686 unsen widerwinnen
0,2687 daz wir si gevrumen hinnen
0,2688 ze iren wîben unde ze iren kinden
0,2689 daz si wole bevinden
0,2690 daz di von Macedoniam
0,2691 den zins here brâht hân
0,2692 wande iz ne wirdet niemer gesehen
0,2693 daz wir hinnen gevliehen
0,2694 alhier wil ich êr sterben
0,2695 oder sigē erwerben
0,2696 wir vergelten den schatz
0,2697 den mîn vater here gap

0,2698 diseme guoten knehte
0,2699 mit grôzeme unrehte”
0,2700 von disen grimmen Worten
0,2701 Darius sich ervorhte
0,2702 des wart er bescholten
0,2703 sêre von sînen holden
0,2704 dô gewan der helt guot
0,2705 ein manlîchen muot
0,2706 unde trôste sîne man
0,2707 dô kârte daz here danne
0,2708 mit den rîchen vürsten
0,2709 di wole vehten torsten
0,2710 quâmen si zuo deme wâge
0,2711 vile wole sich dô besâgen
0,2712 der zwîer kûninge wartman
0,2713 als ich mich versinnen kan
0,2714 in den selben stunten
0,2715 ire vanen si ûf bunden
0,2716 unde iegewederme here
0,2717 si grummen alse daz mere
0,2718 sô iz di starken winde
0,2719 trîbent an den ünden
0,2720 unde quâmen zesamene
0,2721 mit micheler menige
0,2722 Alexander mit den Kriechen
0,2723 liez dâr zuo strîchen
0,2724 Darius unde sîne vürsten
0,2725 di wole vehten torsten
0,2726 di armen unde di rîchen
0,2727 vâhten vreislichen
0,2728 si sluogen unde stâchen
0,2729 iren schaden si dâ râchen
0,2730 wande si hâten grimmigen muot
0,2731 under des daz sich der sturm huop
0,2732 sô quam ein Daries man
0,2733 kriechische wâfen truoc er an
0,2734 unde dranc mit liste
0,2735 dâ er Alexandrum wiste
0,2736 in allen dem gebære
0,2737 als er der sîner wære
0,2738 unde gienc hinder in stân
0,2739 unde gap ime einen slac sân
0,2740 durch den stehelînen huot
0,2741 verwundete er den helt guot
0,2742 er hæte es gerne mêr getân
0,2743 wen daz in geviengen sîne man
0,2744 Alexander hinder sich gesach
0,2745 zuo dem heledē er sprach

0,2746 wâr umbe woltet ir mir slân
0,2747 dô sprach Darieses man
0,2748 “ich ne bin dûnes heres niet
0,2749 mîn stolzheit mich her zuo verriet
0,2750 ich bin von Persia geboren
0,2751 mich hæte Darius erkoren
0,2752 ze einen guoten knehte
0,2753 er sprach ob ich ime bræhte
0,2754 dîn houbet abe geslagen
0,2755 daz wil ich dir ze wære sagen
0,2756 er gæbe mir ze lône
0,2757 sîne tohter schoene
0,2758 di gâbe dûhte mir guot
0,2759 dâr zuo stuont mir der muot
0,2760 daz ich si gerne erwürbe
0,2761 oder degentlîchen stürbe
0,2762 nû ne mac des niwet wesen
0,2763 sol ich verliesen daz leben
0,2764 sô riuwet mich daz schoene wîp
0,2765 mêr danne mînes selbes lîp
0,2766 ouch ne bin ich der êreste niet
0,2767 der durch herzelîchez liep
0,2768 sîn lîp sazte in wâge
0,2769 grôz wære mîn genâde
0,2770 müeste ich di selbe vrouwen
0,2771 vore mîn ende noch beschouwen”
0,2772 dô liez Alexander den selben man
0,2773 wider zuo sînem here gân
0,2774 durch daz si mohten gesehen
0,2775 waz dâr wære geschên
0,2776 er vuor mit vride in sîn lant
0,2777 Alexander sagete ime grôzen danc
0,2778 daz er ez ie torste getuon
0,2779 sîne hulde gap er ime dâr zuo
0,2780 unde sprach zuo sînen überal
0,2781 diz gezimet jungelingen wal
0,2782 daz sus getâne boteschaft
0,2783 von ime ze lande werde brâht
0,2784 swâ daz komet mære
0,2785 dâ beginnet man in êren
0,2786 beide wîp unde man
0,2787 sîne lêhen gemêret man ime danne
0,2788 ouch mugent in di vrouwen
0,2789 deste gerner minnen tougen
0,2790 er liez den degen kêren wider
0,2791 nâch den sige warp er sider
0,2792 dô vaht Alexander
0,2793 mêr danne ein ander

0,2794 er hæte grimmigen muot
0,2795 alse der zornige bere tuot
0,2796 sô in di hunde bestân
0,2797 swaz er ir mit den klâwen mac gevâhen
0,2798 dâr ane richet er sînen zorn
0,2799 der küninc vaht iemer vore
0,2800 er sluoc ros unde man
0,2801 unde allez daz ime zuo quam
0,2802 an den berc unde in daz tal
0,2803 daz gesâhen überal
0,2804 sîne vîande
0,2805 schiere huoben si sich danne
0,2806 unde vluchen hine ze Batrâ
0,2807 vile schiere besaz er si dâ
0,2808 dô gesweich ime der tac
0,2809 umbe di burc lac er al di naht
0,2810 sân des morgenes vruo
0,2811 mit grimme gienc er in zuo
0,2812 schiere gewan er di stat
0,2813 er nam swaz dâr inne was
0,2814 er nam dâ hêrlîche dinc
0,2815 alle Darieses kint
0,2816 dâr zuo sîne muoter
0,2817 di hæte er in schoener huote
0,2818 ouch vienc er Darien wîp
0,2819 Alexander vröuwete sich
0,2820 wande iz was ein küninlich roup
0,2821 dâr zuo betwanc er ouch
0,2822 manige burc unde lant
0,2823 unde gewan iz allez zuo sîner hant
0,2824 under des quam ein vürste
0,2825 swie er ez getuon torste
0,2826 von Persienlante
0,2827 er sprach ze Alexandre
0,2828 “ich bin Darien man
0,2829 unde hân ime dicke getân
0,2830 manic dienst schoene
0,2831 des ist mir ungelônnet
0,2832 durch daz vernim waz ich dir sagen
0,2833 wilt dû es mînen rât haben
0,2834 unde wilt dû es mir wole lôn
0,2835 als ich mich zuo dir verwænen
0,2836 mit helfe dîner manne
0,2837 bringe ich in dir gefangen
0,2838 unde sîne vürsten dâ mite
0,2839 sint maht dû iemer sîn mit vride”
0,2840 Alexander antwurte ime sân
0,2841 “niht ne gerent mîne man

0,2842 dînere helfe
0,2843 sint dû âne nôt selbe
0,2844 dîne hêrren wilt verrâten
0,2845 di dir dicke liebe tâten
0,2846 sô vare mit unêren
0,2847 wider zuo dînem hêrren
0,2848 unde hilf ime weren sîn lant
0,2849 iz wirdet dir ze lastere bewant
0,2850 dir ne sulen hêrren noch vrouwen
0,2851 niemer mêr getrûwen”
0,2852 dô quam Dariô ein brieu
0,2853 der ne was ime niwet liep
0,2854 dô er in überlas
0,2855 daz der strît ergangen was
0,2856 daz stuont dâr inne geschriben
0,2857 unde wer dâr tât was beliben
0,2858 unde wer dannen wære komen
0,2859 mit schaden unde niht mit vromen
0,2860 unde wie Batrân di mære
0,2861 gare beroubet wære
0,2862 unde wie sîn muoter unde sîn wîp
0,2863 di ime wâren sô der lîp
0,2864 unde sîne kint wâren gefangen
0,2865 unde wie ez dâ was ergangen
0,2866 daz entbuten ime sîne man
0,2867 unde daz iz Alexander hæte getân
0,2868 unde hiezen ime klagen
0,2869 iren vile michelen schaden
0,2870 unde swanne er daz vernæme
0,2871 daz er in quæme
0,2872 schiere ze helfe
0,2873 unde selbe mit gelfe
0,2874 ræche sîn ande
0,2875 er lite grôze schande
0,2876 Darius schreip einen brieu dô
0,2877 unde sande in Alexandrô
0,2878 dâr stuont alsus geschriben an
0,2879 als ich ez vernomen hân
0,2880 “mir ist ze wizzenne getân
0,2881 wie dû hâst mîne man
0,2882 beide gefangen unde erslagen
0,2883 ich ne mac iz langer niet vertragen
0,2884 wande iz mir wê tuot
0,2885 ich genidere dînen hôhmuot
0,2886 daz dû des ie gedâhtes
0,2887 daz dû mir gestrîten mahtes
0,2888 unde ie torstes gejechen
0,2889 daz dû mich woltes sehen

0,2890 ûf einen velde mit mînem here
0,2891 maht dû dich mich erwerben
0,2892 sô mügen von himele mîne gote
0,2893 zuo der helle wesen bote”
0,2894 ouch entbôt Darius
0,2895 Alexandrô alsus
0,2896 “daz dû mîneme gesinde
0,2897 mînen wîbe unde mînen kinden
0,2898 unde mîner muoter
0,2899 hâs getân ze guote
0,2900 daz hâst dû übele gewant
0,2901 ich ne weiz dir es niet bezzeren danc
0,2902 wene alse dû si hætes erslagen
0,2903 ich wil dir wærlîchen sagen
0,2904 ich ne werde niemer dîn vriunt
0,2905 die wîle ich dich weiz gesunt
0,2906 wande ich dich von rehte hazzen sol
0,2907 mir ne ist niwet wole
0,2908 zuo dir ze muote
0,2909 nû schaffe dîne huote
0,2910 dû hâs einen sturm an dîner hant”
0,2911 Alexander der wîgant
0,2912 der entvienc disen brief
0,2913 unde ne vorhte in betalle niet
0,2914 einen anderen hiez er schrîben
0,2915 unde sprach “daz ich dînem wîbe
0,2916 habe getân ze guote
0,2917 dâ genôz si mîner muoter
0,2918 wande ich durch ire liebe
0,2919 allen wîben gerne diene
0,2920 von diu hân ich ez gerne getân
0,2921 ich ne wil von dir envâhen
0,2922 neheinen lôn dâr umbe
0,2923 dû entbiutes mir als ein tumble”
0,2924 dô quam ein brief Dariô
0,2925 von dem künige Porô
0,2926 vile verre ûz von Indiam
0,2927 unde bat daz er ime sîne man
0,2928 ze helfen wolte senden
0,2929 wande in di inlenden
0,2930 in sîneme lande
0,2931 mit roube joch mit brande
0,2932 hæten starke bestân
0,2933 dô entbôt er ime wider sân
0,2934 daz er ime gerne quæme
0,2935 ob ime niet ne benæme
0,2936 urlouge unde Alexanders heres kraft
0,2937 di in lange hæte belaht

0,2938 doch wolte er sich genenden
0,2939 unde wolte im senden
0,2940 von persischen lande
0,2941 sîne wîgande
0,2942 di ime helfen solten
0,2943 swes sô er wolte
0,2944 dâr nâch huoben sich sân
0,2945 Alexander unde sîne man
0,2946 ze Persen in di rîche
0,2947 er gedâhte wîslîche
0,2948 wie er daz mohte bewaren
0,2949 daz di vîande sîne scharen
0,2950 niht ne konden gemerken
0,2951 dô verhiu er manige birken
0,2952 unde manic öleboumes rîs
0,2953 wande er was listic unde wîs
0,2954 zuo der rosse zagelen man si bant
0,2955 der melm der stoup über lant
0,2956 daz der Persen wartman
0,2957 grôz wunder des nam
0,2958 wannen der melm mohte wesen
0,2959 ir nehein ne trûwete genesen
0,2960 Alexander was von der stat
0,2961 dâ Darius mit here lac
0,2962 vûnf tageweide
0,2963 dâ enzwischen was ein heide
0,2964 unde ein vile tiefer wâc
0,2965 mit sînen vürsten nam er rât
0,2966 wâ er einen man vûnte
0,2967 den er ze boten sande
0,2968 deme künînge Dariô
0,2969 unde ime sagete dâr zuo
0,2970 daz er daz wole vernæme
0,2971 daz er ime quæme
0,2972 mit dem kriechischeme here
0,2973 ob er sîn lant wolte weren
0,2974 daz er griffe dâr zuo
0,2975 beide spâte unde vruo
0,2976 wande er wære sicherlîche
0,2977 mitten in sînem rîche
0,2978 der rât der wart ûf gelaht
0,2979 twerhes über di naht
0,2980 dô troumete Alexandrô wie ein man
0,2981 gienge vore ime stân
0,2982 in allen dem gebære
0,2983 als er sîn vater wære
0,2984 in den buochen hân ich gelesen
0,2985 daz ouch sîn vater solte wesen

0,2986 ein gewaltiger got
0,2987 daz ist der leien spot
0,2988 di des niht ne wizzen
0,2989 waz man tuot mit listen
0,2990 manic list ist sô getân
0,2991 swer es vlîz wille hân
0,2992 wil der got verkiesen
0,2993 unde die sêle verliesen
0,2994 der tiuvel hilfet ime dâr zuo
0,2995 daz er spâte unde vruo
0,2996 tuon mac besunder
0,2997 vile manicvalten wunder
0,2998 vile manicvalter liste
0,2999 Philippus vile wiste
0,3000 der Alexandris vater was
0,3001 als ich ez an den buochen las
0,3002 dâ er an sînem bette lac
0,3003 in dem troume er ime zuo sprach
0,3004 Alexander liebe sune
0,3005 durch dich bin ich here komen
0,3006 ich wil dir lâzen schîn
0,3007 daz ich ein gewaltic got bin
0,3008 ich wil dir sîn bereite
0,3009 zuo dîner arbeite
0,3010 dir ne mac nieman geschaden
0,3011 die wîle ich dir holt herze tragen
0,3012 tuo dû den rât mîn
0,3013 dû salt selbe bote sîn
0,3014 hin zuo Dariô
0,3015 in rihte erwachete er dô
0,3016 unde sagete iz sînen mannen
0,3017 dô rieten si ime alle
0,3018 daz er wære dem gote
0,3019 gevolgic ze sînem gebote
0,3020 Alexander dô mit ime nam
0,3021 einen einigen man
0,3022 der hiez Eomulus
0,3023 si riten zwei snelle ros
0,3024 unde vuorten daz dritte in der hant
0,3025 unde riten sêre über lant
0,3026 unde quâmen zuo einem wâge
0,3027 der was geheizen Strâge
0,3028 der vliuzet allen den tac
0,3029 unde ervriuset inne der naht
0,3030 daz man dâr über mohte rîten
0,3031 Alexander hiez dô bîten
0,3032 sînen man mit einen volen
0,3033 aleine reit er dâr über

0,3034 unde quam des tages an di stat
0,3035 dâ Darius lac
0,3036 mit sînem grôzen here
0,3037 jene sprâchen “wer ist der
0,3038 er gelîchet sêre einem gote”
0,3039 er sprach wider “ich bin ein bote
0,3040 mîn hêrre ist Alexander
0,3041 den nimet michel wunder
0,3042 wes Darius sûme
0,3043 wande er gebeitet sîn vile kûme”
0,3044 dô liez ein Daries man
0,3045 den boten vûre den küninc gân
0,3046 daz er wûrbe sîne boteschaf
0,3047 zuo Dariô er dô sprach
0,3048 “man saget Daries edele küninc
0,3049 dû sîs gewaltic unde vrûmic
0,3050 unde stolz dînes gemüetes
0,3051 unde milte dînes guotes
0,3052 daz ne schînet niwet wole
0,3053 vernim waz ich dir sagen sol
0,3054 dir entbiutet Alexander
0,3055 unde manic man ander
0,3056 entbietent dir besunder
0,3057 si næme des michel wunder
0,3058 wes dû sô lange bîtes
0,3059 daz dû niht ne rîtes
0,3060 unde riches di schande
0,3061 di dîne vîande
0,3062 dir tuon allertagelîche
0,3063 dû sûmes zagelîche
0,3064 dir sint di bûrge unde daz lant
0,3065 beroubet unde verbrant
0,3066 unde dîn liut gefangen
0,3067 dû sûmes alze lange
0,3068 diz ist dir guot vernomen
0,3069 mîn hêrre heizet dir komen
0,3070 bî den Strâge an einem velde
0,3071 den zins wil er dir gelten
0,3072 den er hât versezzen
0,3073 dâ wil er dich es ergetzen
0,3074 er unde sîne recken
0,3075 mit iren scharpfen eggen
0,3076 mit solicher mâzen
0,3077 daz dû si müezes lâzen
0,3078 iemer mêr âne nôt
0,3079 diz ist daz er dir entbôt”
0,3080 Darius der rîche
0,3081 der tet hêrlîche

0,3082 er nam den boten bî der hant
0,3083 unde sprach nû dû here bist gesant
0,3084 sô muost dû guoten vride hân
0,3085 in mînen sal solt dû gân
0,3086 unde wesen ze mîner wirtschaf
0,3087 dîn hêrre des selben sites pflac
0,3088 alsô dicke sô ich sande
0,3089 zuo sîneme lande
0,3090 sô liez er di boten mîn
0,3091 zuo sîner wirtschefte sîn
0,3092 Alexander vröuwete sînen muot
0,3093 daz geleite dûhte ime alsô guot
0,3094 daz in der rîche Darius
0,3095 selbe leitte in sîn hûs
0,3096 zuo sîner wirtschaf
0,3097 dâ was eine michele maht
0,3098 der hêrren von manigen landen
0,3099 dô hiez man Alexanderen
0,3100 engegen den küninc sitzen gân
0,3101 daz wart umbe daz getân
0,3102 daz Darius selbe sæhe
0,3103 daz man sîn wole pflæge
0,3104 den vürsten was daz ungemach
0,3105 daz man sîn sô wole pflac
0,3106 ich wil iu sagen umbe waz
0,3107 si versmâheten in umbe daz
0,3108 wande er was sô kleine
0,3109 si sprâchen algemeine
0,3110 er wære ein wênic twirgelîn
0,3111 waz boten er mohte sîn
0,3112 eines alsô rîchen mannes
0,3113 dannoch wisten si lützel des
0,3114 daz an ime was gereit
0,3115 alsô manic vrümicheit
0,3116 vile wole der hêrre diz vernam
0,3117 der vile wunderlîche man
0,3118 iz quam in rehte in den gedanc
0,3119 diu goltvaz dâ er abe tranc
0,3120 di warf er al in sîne schôz
0,3121 dô den schenken des verdrôz
0,3122 daz er ime mêr brâhte
0,3123 dô stuont er unde dâhte
0,3124 daz er ein diep wære
0,3125 unde sagete iz sînem hêrren
0,3126 daz der bote der dâ saz
0,3127 verstæle sîne goltvaz
0,3128 Darius sprach dem boten zuo
0,3129 “wie torstes dû daz getuon

0,3130 daz dû stæle mîne goltvaz”
0,3131 Alexander dâr wider sprach
0,3132 daz der site wære
0,3133 zuo dem tische sînes hêrren
0,3134 daz allermannegeleich
0,3135 di vaz næme zuo sich
0,3136 dâ er ûz trünke
0,3137 “vile wole mich des bedunket
0,3138 man ne pflege hier des siten niet
0,3139 nû diz alsus ist geschiet
0,3140 nû heiz nemen dîne goltvaz
0,3141 ze wâren sagen ich dir daz
0,3142 daz mir vile unmare sîn
0,3143 dîne goltvaz unde dîn wîn”
0,3144 under disen worten
0,3145 ein vürste merkete harte
0,3146 an des boten gebære
0,3147 wie iz Alexander selbe wære
0,3148 er hæte in wîlen bekant
0,3149 dô in Darius hæte gesant
0,3150 nâch deme zinse zuo Philippô
0,3151 dô sprach er ze Dariô
0,3152 “hêrre ich wil dir sagen
0,3153 ein dinc daz ich gemerket habe
0,3154 den boten den wir hier gesehen
0,3155 wole ne wil er es niht bejehen
0,3156 daz is selbe Alexander
0,3157 nû rich dînen anden
0,3158 an den wunderlîchen man
0,3159 sô maht dû iemer mêre vride hân”
0,3160 vile wole der listige man
0,3161 der hêrren geriune vernam
0,3162 unde rûmete von deme sale
0,3163 des gehalf ime vile wole
0,3164 ein brinnente vackele di er nam
0,3165 einen persischen manne
0,3166 den sluoc er vüre di zande
0,3167 daz er sich verwânte
0,3168 daz er êr solte sterben
0,3169 êr er quæme zuo der erden
0,3170 er dranc durch Darien man
0,3171 schiere er vüre di türe quam
0,3172 ûf sîn ros er gespranc
0,3173 âne ir aller danc
0,3174 reit er zuo dem Strâge
0,3175 êr er dâr über quæme
0,3176 gewan er michel arbeit
0,3177 daz îs under ime spleiz

0,3178 daz ime sîn ros dâ entvlôz
0,3179 sîner kraft er dâ genôz
0,3180 daz er den anderen stat gewan
0,3181 ouch half ime wole sîn man
0,3182 dô reit er hine zuo sînem here
0,3183 hundert tûsent was dere
0,3184 unde zweinzic tûsent dâr zuo
0,3185 vile wole entviengen si in dô
0,3186 unde hiezen in willekome sîn
0,3187 alsus antwurte er in
0,3188 ô wole iuch kriechische man
0,3189 ze heile muoz iz iu ergân
0,3190 ich ne wille niwet liegen
0,3191 noch niemanne betriegen
0,3192 wir ne mügen niwet gelîchen
0,3193 Dariô dem rîchen
0,3194 ich wæne daz ûf der erden
0,3195 nieman mohte geworden
0,3196 der zuo ime gestüente
0,3197 oder alsô grôz here gewünne
0,3198 dâ bî wil ich iu sagen
0,3199 ein her vliegen mac niet geschaden
0,3200 zwein wênigen wespen
0,3201 dâ si varen ze neste
0,3202 Alexandris gesellen
0,3203 wurden von disen bîspellen
0,3204 vile wunderlîchen vrô
0,3205 vile kûme erbeitten si dô
0,3206 biz man begunde stürmen
0,3207 Darius von sînen bûrgen
0,3208 reit zuo dem wâge
0,3209 der dâ heizet Strâge
0,3210 des nahtes vuoren si dâr über
0,3211 der quam aber lützel wider
0,3212 wande si wurden erslagen
0,3213 ich wil iu ze wâren sagen
0,3214 sân des morgenes vruo
0,3215 ze wîge garweten si sich dô
0,3216 beidenthalben di here
0,3217 unde brummen alse daz mere
0,3218 di alten mit den jungen
0,3219 dâ si zesamene drungen
0,3220 Alexander der hêrre
0,3221 der was der êrre
0,3222 der dâ zuo der zît
0,3223 erhuop den vreislîchen strît
0,3224 ûf Bucivale er reit
0,3225 nieman ne beschreit

0,3226 dechein ros alsô guot
0,3227 dâr zuo stuont ime der muot
0,3228 daz er den sige erwürbe
0,3229 oder degentlîchen stürbe
0,3230 vile wole half ime daz
0,3231 daz er sô wole gare was
0,3232 nâch deme kriechische site
0,3233 di engegen im quâmen geriten
0,3234 di sprâchen er wære ein got
0,3235 von beidenthalben vlouc daz schoz
0,3236 alsô dicke sô der snê
0,3237 den recken wart dâ vile wê
0,3238 dâ wart ein michel schal
0,3239 man blies di herehorn überal
0,3240 unde di trummen zuo dem wîge
0,3241 Darius mit den sînen
0,3242 muoste durch nôt vehten
0,3243 er brâhte manigen Persen
0,3244 zuo deme strîte
0,3245 di wâren gesamenet wîte
0,3246 unde hæten manlîchen muot
0,3247 unde alse der helt guot
0,3248 Alexander diz vernam
0,3249 dô manete er sîne getriuwe man
0,3250 di ime wâren einmuote
0,3251 ze aller sîner noete
0,3252 daz si sich wole bedæhten
0,3253 unde wæren guote knehte
0,3254 wande si mit rehte
0,3255 umbe den zins solten vehten
0,3256 dâ si Darius zuo twanc
0,3257 dô huop sich zehant
0,3258 di kriechische menige
0,3259 den Persen engegene
0,3260 mit micheler vrevele
0,3261 quâmen si zesamene
0,3262 bî dem Strâge an der ouwen
0,3263 wer mohte ie beschouwen
0,3264 zwei sô hêrlîchen scharen
0,3265 dâ was maniger muoter barn
0,3266 dâ si zesamene quâmen
0,3267 unde grôzen schaden nâmen
0,3268 dâ was daz velt vile breit
0,3269 mit den tôten überspreit
0,3270 si sluogen unde stâchen
0,3271 sô daz di schefte brâchen
0,3272 dô griffen di recken
0,3273 zuo den scharpfen eggen

0,3274 unde vuhten mit nîde
0,3275 alle di volcwîge
0,3276 sturme unde strîte
0,3277 di von Darien gezîte
0,3278 al biz her sint geschiet
0,3279 di ne gelîchen dâr zuo niet
0,3280 dâ Alexander der helt balt
0,3281 Dariô den zins galt
0,3282 daz der zins ie gedâht wart
0,3283 daz gerou manigen in der vart
0,3284 wande si in dem bluote swebeten
0,3285 di dannoch gerne lebeten
0,3286 der sturm was grimme unde hart
0,3287 dâ wart manic helm schart
0,3288 unde manige brünje durchstochen
0,3289 daz dâ durch quam gevlozzen
0,3290 daz bluot den lîp al ze tale
0,3291 man sach dâ in dem wale
0,3292 manigen schilt verhouwen
0,3293 dâ mohte man schouwen
0,3294 di kriechischen recken
0,3295 mit den scharpfen eggen
0,3296 di helme verschrôten
0,3297 si vrumeten manigen tôten
0,3298 dem rîchem künige Dariô
0,3299 der vile starke klagete dô
0,3300 daz er ze Kriechlante
0,3301 nâch deme zinse ie gesande
0,3302 der Persen küninc hêre
0,3303 der vile grôzer êre
0,3304 wîelt über manic rîche
0,3305 der trûrte grôzlîche
0,3306 daz der wunderlîche man
0,3307 durch sîn laster ûz quam
0,3308 daz begunde er sêre klagen
0,3309 wande er sach in den walpfade
0,3310 manigen helt guoten
0,3311 bevlozzen mit dem bluote
0,3312 sîne tiurlîchen recken
0,3313 di ime dâ vore dicke
0,3314 hulfen sîner êren
0,3315 sint niemer mêre
0,3316 ne wart Darius vrô
0,3317 daz buoch saget uns alsô
0,3318 wande dâ viel manic man
0,3319 der nie wunde ne gewan
0,3320 von stiche noch von slage
0,3321 ich wil iu wærlîchen sagen

0,3322 si wâren guote knehte
0,3323 unde sturben durch ire vehten
0,3324 in Darien halbe
0,3325 dô man si gezalte
0,3326 zwei hundert tûsent der was
0,3327 der nie nehein ne genas
0,3328 âne di di in den Strâge
0,3329 ouch vertrunken lâgen
0,3330 der ne mohte man neheine zale
0,3331 geschrîben noch gesagen wole
0,3332 alse Darius gesach
0,3333 daz sîner sô vile tôt lac
0,3334 beide gewunt unde erslagen
0,3335 dô begunde er erzagen
0,3336 er was der êreste man
0,3337 der dâ vliehen began
0,3338 des gewan sîn her grôz
0,3339 vile michelen untrôst
0,3340 si vluhen algemeine
0,3341 man mac noch hiute weinen
0,3342 den mort der dâ geschach
0,3343 Alexander reit in allez nâch
0,3344 unde sluoc si nider als ein vê
0,3345 si schriuwen ach unde wê
0,3346 dô daz mære dô quam
0,3347 über alle Persiam
0,3348 daz der küninc wære sigelôs
0,3349 dô wart dâ michel untrôst
0,3350 über alle di lant
0,3351 dâ der küninc was bekant
0,3352 der jâmer wart dâ vile grôz
0,3353 vile manic sînen genôz
0,3354 weinete unde klagete
0,3355 den er verloren habete
0,3356 der vater weinete sîn kint
0,3357 daz wâren jâmerlîche dinc
0,3358 manic man sînen eidem
0,3359 wande ime was vile leide
0,3360 di swester iren bruoder
0,3361 iren lieben sun di muoter
0,3362 ouch weinte di iren amîs
0,3363 di dâ stille was gehîwet
0,3364 di vrouwen weinten iren trût
0,3365 den si minneten überlût
0,3366 di man ze manne solte geben
0,3367 der leidete daz leben
0,3368 si weinte alsô sêre
0,3369 alse si gehîwet wære

0,3370 di jungen an der strâzen
0,3371 dâ si ze spile sâzen
0,3372 di weineten vile sêre
0,3373 ire mâge unde ire hêren
0,3374 di kint an den wagen
0,3375 sô si weinen sâgen
0,3376 unde alse man ez in gezalte
0,3377 si weineten alse di alte
0,3378 unde lebeten âne wünne
0,3379 di mâne unde di sunne
0,3380 di verwandeleten ire lieht
0,3381 unde ne wolten schînen nicht
0,3382 unde ne wolten niet besehen
0,3383 den mort der dâ was geschehen
0,3384 Darius der bloede man
0,3385 starke vliehente quam
0,3386 von mannen unde von mâgen
0,3387 über den wâc Strâgen
0,3388 unde sînes heres ein michel teil
0,3389 verloren hæte er daz heil
0,3390 er quam ûf sînen sal
0,3391 daz liut weinte überal
0,3392 unde klagete grôzlîchen
0,3393 Darium den rîchen
0,3394 ûf sînen esterîch er sich warf
0,3395 er klagete daz er niet ne starp
0,3396 ime wære lieber der tôt
0,3397 danne er sus wære gelasteret
0,3398 er klagete daz er ie genas
0,3399 unde sprach “waz hilfet mir daz ich was
0,3400 küninc über manige lant
0,3401 di ich selbe betwanc
0,3402 wîlen mit mîner vrûmicheit
0,3403 zuo mîneme dieneste was gereit
0,3404 manic lant in dem mere
0,3405 manic tûsent was dere
0,3406 di mir zins gâben
0,3407 unde mich doch nie gesâgen
0,3408 swâ si gehôrten mînen namen
0,3409 dâ dieneten si mir alle samen
0,3410 nû bin ich verwunnen
0,3411 vile kûme her entrunnen
0,3412 von einen kriechischen manne
0,3413 von mînen sünden daz leider quam
0,3414 unde durch mînen übermuot
0,3415 ungelücke waz ir mir leides tuot
0,3416 Fortuna di ist sô getân
0,3417 ire schîbe læzet si umbe gân

0,3418 si hilfet den armen sô si wile
0,3419 den rîchen hât si ze spile
0,3420 umbe löufet ire rat
0,3421 dicke vellet der dâ vaste saz”
0,3422 Darius sich dô ûf huop
0,3423 unde trôste sînen muot
0,3424 er tihte selbe einen brieve
0,3425 mit sîner hant er in schreip
0,3426 er sande in Alexandrô
0,3427 dâr ane stuont geschriben sô
0,3428 “vrô wis unde gesunt
0,3429 Alexander ze aller stunte
0,3430 iz ist mir nû alsô komen
0,3431 wilt dû mir schaden oder vromen
0,3432 des hâs dû guoten gewalt
0,3433 mir ist dicke gezalt
0,3434 daz iz dem manne wole stât
0,3435 als ime sîn heil vore gât
0,3436 daz er sîne mâze
0,3437 an guoten dingen lâze
0,3438 niet ne verhebe dû des dich
0,3439 daz dû hâs verwunnen mich
0,3440 iz kumet dir rehte
0,3441 nû gedenke ane mîn geslehte
0,3442 unde an mînen gewalt
0,3443 swer mir daz hæte gezalt
0,3444 daz mir sus solte geschên
0,3445 ich ne hæte es ime niet gejechen
0,3446 wande ich ne mohte es niht getrûwen
0,3447 mir muoz nû balde riuwen
0,3448 daz ich unde mîne man
0,3449 den küninc Xersem ie verwan
0,3450 den rîchen unde den vrûmigen
0,3451 unde andere manige küninge
0,3452 ich nam in lant unde guot
0,3453 ô wê wie wê mir nû daz tuot
0,3454 daz ich sol lîden
0,3455 den spot von den wîben
0,3456 iedoch sô verwæne ich mich
0,3457 daz dû tuost sô küninclîche
0,3458 swen sô dû verwinnes
0,3459 wande dû dich wole versinnes
0,3460 di lâzes dû sunderlingen
0,3461 an dîne genâde dingen
0,3462 unde lâzes si dir sîn undertân
0,3463 unde di lant vore dir hân
0,3464 wilt dû alsus mit mir tuon
0,3465 des hâs dû êre unde ruom

0,3466 sô gebe ich dir den meisten schatz
0,3467 der mîner vorderen was
0,3468 den si zesamene truogen
0,3469 unde in der erde gruoben
0,3470 der liget zuo Mynjatan
0,3471 ze Susis unde ze Batram
0,3472 daz salt dû wizzen âne wân
0,3473 daz nie nehein man
0,3474 der ie an diser werlt quam
0,3475 sô vile schatzes gewan
0,3476 dâr zuo vernim noch mêre
0,3477 ich wil dich machen hêren
0,3478 ze Medentrîche über daz lant
0,3479 Persiam gebe ich an dîne hant
0,3480 dû maht dich vrôuwen dirre geben
0,3481 di wîle di dû solt leben
0,3482 dâr zuo jihen ich dir des siges
0,3483 nû bite ich alze spâte vrides”
0,3484 Alexander las disen brieve
0,3485 ein vürste ime al di wîle riet
0,3486 daz er næme allez daz
0,3487 beide lant unde schatz
0,3488 unde Darium lieze leben
0,3489 unde hieze ime wider sîn wîp geben
0,3490 unde sîne muoter dâr zuo
0,3491 Alexander sprach dô
0,3492 daz er des niet ne tæte
0,3493 wande ime des wunder hæte
0,3494 ob er si ime sande
0,3495 wider heim ze lande
0,3496 ob er si nemen wolte
0,3497 diz sprach er durch di schulde
0,3498 durch anderes neheine nôt
0,3499 wande er ime dâ vore entbôt
0,3500 er zûge is wole ze râte
0,3501 waz er dâ mite tæte
0,3502 aber sprach Alexander sus
0,3503 “ob der küninc Darius
0,3504 nû ist verwunnen
0,3505 sô nimet mich michel wunder
0,3506 wes er sich noch wil erheben
0,3507 oder waz er mir wille geben
0,3508 nû stênt doch an mîner hant
0,3509 beide bürge unde lant
0,3510 unde gewant unde schatz
0,3511 ich mac ime geben michel baz
0,3512 wande velt unde walt
0,3513 stêt an mîner gewalt

0,3514 wil er aber vehten
0,3515 unde mac er sich gerechen
0,3516 gewinnet er danne daz heil
0,3517 sô wirdet ime wider âne teil
0,3518 wîp muoter unde kint
0,3519 læzet er mich danne leben sint
0,3520 sô muoz ime sîn undertân
0,3521 unde den lîp von sînen genâden hân
0,3522 unde leben nâch sînen gebote”
0,3523 dô îlete danne der bote
0,3524 unde reit dannen
0,3525 âne vride doch ungevangen
0,3526 danne nâch diser boteschaf
0,3527 Alexander reit an di walstat
0,3528 unde begruop sîne tôten
0,3529 unde di dâ lâgen in noeten
0,3530 gewuntet unde mohten genesen
0,3531 den hiez er vile guot wesen
0,3532 biz si wurden gesunt
0,3533 aldâ beleip der hêrre junc
0,3534 des winteres eine wîle
0,3535 dô gebôt er den sînen
0,3536 daz si bræchen den palas
0,3537 der des küninges Xersen was
0,3538 der sal der was alsô guot
0,3539 sô nie nehein bezzer gestuont
0,3540 in aller dirre werelte
0,3541 di sîne wâren gerente
0,3542 daz er den sal lieze stân
0,3543 des wart er in gehôrsam
0,3544 unde gesanfte sînen muot
0,3545 er liez in belîben daz was guot
0,3546 als ich mich versinnen kan
0,3547 dâ gruoben grebere sînen man
0,3548 dâ si zuo den stunten
0,3549 inne genuoc vunten
0,3550 guldîner nepfe
0,3551 di ie verborgen hæten
0,3552 di êr dâr wâren
0,3553 ouch vunten si ze wâren
0,3554 einen sarc glesen
0,3555 an den buochen hân ich gelesen
0,3556 er wære sô schoene unde sô klâr
0,3557 daz sulet ir wizzen vûre wâr
0,3558 daz man dâr durch wole gesach
0,3559 einen tôten der dâr inne lac
0,3560 si besâhen vile garwe
0,3561 sîn hâr unde sîne varwe

0,3562 unde wie er getân was
0,3563 der sarc was grüene alse ein gras
0,3564 des selben tôten mannes name
0,3565 was gegraben dâr ane
0,3566 er hiez Evilmerodach
0,3567 der küninc in Babilônia was
0,3568 ouch vunt si ze lezzeste
0,3569 eine hêrlîche veste
0,3570 dâ inne lâgen di man
0,3571 di Darius hæte gevâhen
0,3572 gestümbelet unde geblendet
0,3573 si wâren dar versendet
0,3574 ze pînlicher huote
0,3575 Alexander der guote
0,3576 dô er ire nôt an gesach
0,3577 harte erbarmete ime daz
0,3578 er liez si alle ledic wesen
0,3579 unde hiez in küninclîchen geben
0,3580 golt unde silber
0,3581 der tugent was er milter
0,3582 unde gebôt daz ir iegelich
0,3583 sîn eigen wider zuo sich
0,3584 næme unde vürder mêre
0,3585 lebete mit êren
0,3586 ein briev quam dô von Dariô
0,3587 dem küninge Porô
0,3588 vile verre hin in Indiam
0,3589 dâr stuont geschriben an
0,3590 “di vile michele nôt
0,3591 di mir Alexander tuot
0,3592 di hiez ich dir klagen
0,3593 unde wolte dîne helfe haben
0,3594 daz ich mich erwerete
0,3595 wande er mich starke herete
0,3596 dô ne quæme dû mir niet
0,3597 des is mir übele geschiet
0,3598 ouch bin ich dâr umbe vröuwedelôs
0,3599 mîn here wart dâ sigelôs
0,3600 dâ wir vâhten ensamen
0,3601 des mac ich mich sêre schamen
0,3602 daz ich ez dir muoz sagen
0,3603 dô begunde er mich jagen
0,3604 der mîner beleip dâ vile erslagen
0,3605 di mac ich niemer verklagen
0,3606 dô quam ich vliehente heim
0,3607 vile harte wole mir daz schein
0,3608 daz dû dâ niergene wære
0,3609 des ist mîn herze swære

0,3610 mit unvröuweden geladen
0,3611 lâ dir erbarmen mînen schaden
0,3612 unde kom mir gereite
0,3613 ze grôzer arbeite
0,3614 sal man got vlêhen
0,3615 unde stæte vriuntschaf besehen
0,3616 wilt dû mir ze helfe komen
0,3617 unde maht dû mir noch gevromen
0,3618 sô ne wis niwet træge
0,3619 ich gibe dir âne wâge
0,3620 golt unde michelen schatz
0,3621 daz dû dîn zouwes deste baz
0,3622 sorclîche stânt mir mîne dinc
0,3623 mîne muoter unde mîne kint
0,3624 unde dâr zuo mîn wîp
0,3625 di mir ist sô der lîp
0,3626 di hât er gefangen
0,3627 solte ich noch lîden langer
0,3628 dise lasterlîche nôt
0,3629 sô wære mir lieber der tôt
0,3630 vore dir ne wil ich niwet sparen
0,3631 ahtzic tûsent in einer scharen
0,3632 sende ich dir gegen vrouwen
0,3633 di maht dû gerne schouwen
0,3634 daz sint megede unde wîp
0,3635 di sulen vröuwen dînen lîp
0,3636 unde dîner heledē alle
0,3637 swaz sô dir gevalle
0,3638 daz schaffē in mînem lande
0,3639 wande mir tuot Alexander
0,3640 leit ze manigen mâle
0,3641 sîn ros Bucivale
0,3642 unde sîne küninclîche wât
0,3643 di ime alsô wole stât
0,3644 di gibe ich dir ze eigen
0,3645 unde swere dir mit eiden
0,3646 daz nie nehein man
0,3647 bezzer ros ne gewan
0,3648 noch bezzere wâfen
0,3649 dû ne salt des niwet lâzen
0,3650 dû sules mir bereite wesen
0,3651 sô dû den briev hâs gelesen
0,3652 den ich dir sende
0,3653 sô vindes dû an den ende
0,3654 helt niht ne sûme
0,3655 wande ich erbeite dîn kûme
0,3656 ze Caspenporten
0,3657 dâ wil ich dîn warten

0,3658 unde lâz mir werden schîn
0,3659 ob in der werlt mûgen sîn
0,3660 iergen dechein triuwe
0,3661 wande ich lîde grôzen riuwen”
0,3662 dô Porus disen brieu gelas
0,3663 als ime dâr inne geschriben was
0,3664 Dariô er sus entbôt
0,3665 “gehabe dich wole helt guot
0,3666 dû gesehest êr iwit lanc
0,3667 daz ich dir brenge in dîn lant
0,3668 sô manigen snellen swertdegen
0,3669 daz ich mich wille verpflegen
0,3670 daz er dir leides hât getân
0,3671 daz sol ime an daz leben gân
0,3672 ich antwûrte in dir gevangen
0,3673 unde vaste gebunden
0,3674 sîne allerkûeneste man
0,3675 di ich in den wîge erkennen kan
0,3676 di vûere ich mit mir in Indiam
0,3677 dâ sulen si mir sîn undertân
0,3678 ze Caspenporten
0,3679 dâ salt dû mîn warten
0,3680 dâ kume ich dir engegene
0,3681 mit manigen snellen heledē”
0,3682 dise rede die wart dô
0,3683 vermeldet Alexandrô
0,3684 dô huop er sich dannen
0,3685 mit allen sînen mannen
0,3686 ze Caspenporten
0,3687 wande er sagen hôrte
0,3688 daz Darius mit sînen holden
0,3689 dar komen wolte
0,3690 under des wâren zwêne man
0,3691 Bysan unde Arbazan
0,3692 Dariseses undertânen
0,3693 zesamene si beide quâmen
0,3694 ire triuwe si des gâben
0,3695 daz si Darium ersluogen
0,3696 sô mir got von himelrîche
0,3697 si tâten untriuwelîche
0,3698 si tâten alse tumbe
0,3699 si verwæneten sich dâr umbe
0,3700 von Alexandrô grôzes vromen
0,3701 alsus hân ich ez vernomen
0,3702 si giengen in daz palas
0,3703 dâ Darius eine inne was
0,3704 unde truogen in ire hant
0,3705 verholene under ire gewande

0,3706 ire swert allebare
0,3707 dô wart des Darius geware
0,3708 unde sprach in jæmerlîche zuo
0,3709 “ô wê waz wollent ir nû tuon
0,3710 waz hân ich wider iuch getân
0,3711 daz ir mich willet erslân
0,3712 lâzet mich leben hêrren
0,3713 unde helfet mir mîner êren
0,3714 unde slahet Alexanderen
0,3715 di uns in disen lande
0,3716 mit brande müejet unde heret
0,3717 unde dâr in mit sînen Kriechen veret
0,3718 gedenket heledede dâr an
0,3719 daz ir sît beide mîne man
0,3720 unde merket rehte mîne wort
0,3721 wande begêt ir an mir nû disen mort
0,3722 unde ne lâzet ir mir niet genesen
0,3723 sô ne mac daz neheine wîs wesen
0,3724 ir ne werdet es vermeldet
0,3725 vile sêre ir es danne entgeltet
0,3726 wande als ir es lützel wænet
0,3727 sô werdet es gehoenet
0,3728 waz wollet ir ane mich rechen
0,3729 man sal iu dâr umbe sprechen
0,3730 laster unde schande
0,3731 wîten after lande
0,3732 lâzet mich heledede genesen
0,3733 unde lâzet iu des genuoc wesen
0,3734 daz ich bin verwunnen
0,3735 waz müget ir mir vergunnen
0,3736 daz ich sus jæmerlîche leben
0,3737 ich wil iu ze wære verpflegen
0,3738 slahet ir mich mortlîche
0,3739 Alexander der rîche
0,3740 der sol mich an iuch rechen
0,3741 vüre wâr wil ich daz sprechen
0,3742 ich getrûwe an sîner vrûmicheit
0,3743 mordet ir mich daz is ime leit”
0,3744 zehant dô er diz gesprach
0,3745 ir iegeweder sluoc ime einen slac
0,3746 zwô verchwunden
0,3747 si liezen in ungesunden
0,3748 ligen an der erden
0,3749 schiere si dannen kârtten
0,3750 iedoch mit sorgen
0,3751 ire wâfen si verburgen
0,3752 unde giengen offenbære
0,3753 also si unschuldic wæren

0,3754 unde klaget en jamerlîchen
0,3755 Darium den rîchen
0,3756 unde redeten jamerlîche wort
0,3757 disen vreislîchen mort
0,3758 eine wîle si verhâlen
0,3759 er wart in doch sint ze quâlen
0,3760 Alexander unde sîn here breit
0,3761 al di wîle über den Strâge reit
0,3762 mit vile grôzer gewalt
0,3763 dô wart ime gezalt
0,3764 wie iz Dariô was ergân
0,3765 zuo dem palase rante er sân
0,3766 unde gienc ûfe daz hûs
0,3767 dô vlôz zuo den wunden ûz
0,3768 daz bluot deme künige Dariô
0,3769 Alexander sprach ime zuo
0,3770 weinente jamerlîche
0,3771 unde sprach “helt rîche
0,3772 dû bist starke gewunt
0,3773 möhtes dû noch werden gesunt
0,3774 ich lieze dir dîne rîche
0,3775 iemer mêr vridelîche
0,3776 unverhert unde unverbrant
0,3777 küniges name ist an dir geschant
0,3778 weste ich wer daz hæte getân
0,3779 iz solte ime an daz leben gân
0,3780 dû riuwes mich ze unmâzen
0,3781 wie wâres dû verlâzen
0,3782 sus eine in diseme palase
0,3783 ein michel ungelücke iz was
0,3784 daz dîn nieman ne pflac
0,3785 ô wê daz ich disen tac
0,3786 ie solte geleben
0,3787 daz ich dich tiurlîcher degen
0,3788 alsus solte sehen verslagen
0,3789 wie mohte ich iemer verklagen
0,3790 disen vreislîchen mort”
0,3791 dise küninlîche wort
0,3792 begunden wole gevallen
0,3793 sînen mannen allen
0,3794 aber sprach Alexander
0,3795 “nû ne weiz nieman anderes
0,3796 wene got alterseine
0,3797 helt wie ich dich meine
0,3798 unde mit welichen triuwen
0,3799 dû muost mir iemer riuwen
0,3800 ouch ne wil ich dich niemer verklagen
0,3801 daz mac ich wærlîche sagen

0,3802 wande dû wâres biderbe unde guot
0,3803 unde hætes manlîchen muot
0,3804 dû wære vile milte
0,3805 gevüege zuo dînem schilde
0,3806 getriuwe unde wârhaft
0,3807 hübisich unde êrhaft
0,3808 wolegeboren unde rîche
0,3809 ich sage dir wærlîche
0,3810 möhtes dû behalten noch den leben
0,3811 sô wolte ich dir mîne triuwe geben
0,3812 daz ich dir küninc hêre
0,3813 ne schadete niemer mêre
0,3814 hætes dû aber noch di kraft
0,3815 unde an dem lîbe soliche maht
0,3816 unde tætes ûf dînen munt
0,3817 unde tætes mir kunt
0,3818 umbe dise mordære
0,3819 rehte wi si wæren
0,3820 woltes dû si nennen
0,3821 unde möhte ich si erkennen
0,3822 sô mac ich daz wole sprechen
0,3823 ich wolte dich rechen
0,3824 oder ze wære ich wolte geben
0,3825 umbe ire lîp mînen leben
0,3826 unde ob ich daz lieze
0,3827 sô wolte ich daz mich verwieze
0,3828 got von sînem rîche
0,3829 iemer êwiclîche”
0,3830 dô Alexander diz sprach
0,3831 Darius aldâ er lac
0,3832 berunnen mit dem bluote
0,3833 unde mit trûrigem muote
0,3834 ûf rihte sich der wîgant
0,3835 unde kuste Alexandris hant
0,3836 mit vile grôzer unmaht
0,3837 unde vergaz aller vîantschaft
0,3838 er sprach jæmerlîche
0,3839 “gedenke küninc rîche
0,3840 Alexander wer ich wære
0,3841 wer was gewaltigere
0,3842 der ie geboren würde
0,3843 liutes unde bürge
0,3844 waz mac mir aber daz gevromen
0,3845 nû iz alsus ist komen
0,3846 nû râte ich dir unde mane
0,3847 unde gedenke vaste dâr ane
0,3848 daz dir alsame niet geschê
0,3849 mir tuont mîne wunden vile wê

0,3850 unde smerzent mir sêre
0,3851 noch sagen ich dir mêre
0,3852 nû stânt an dîner hant
0,3853 Kriechen unde mîn lant
0,3854 mache vride under den zwein
0,3855 unde lâz si wesen beide al ein
0,3856 sô ne mac dir nieman widerstân
0,3857 mîner vriunde salt dû genâde hân
0,3858 durch dînes selbes gûete
0,3859 wis genædic mîner muoter
0,3860 mîn wîp wil ich dir ouch bevelhen
0,3861 ô wê wie sêre ich nû quilen
0,3862 sweder ich stirben unde genisen
0,3863 sô sol mîn liebe tochter wesen
0,3864 dîn êliche wîp
0,3865 di bevelhe ich dir an dînen lîp
0,3866 wande si is von adele geboren
0,3867 aller vîantschaft hân ich verkoren”
0,3868 unde als er diz vollensprach
0,3869 vile schiere er dâr nider lac
0,3870 von dem bluote daz ime ûz vlôz
0,3871 tôt in Alexandris schôz
0,3872 Alexander weinte den hêren
0,3873 mit vile grôzen êren
0,3874 wart di bâre bereit
0,3875 unde der lîchame dâr ûf geleit
0,3876 mit pfelle unde mit golde
0,3877 als iz Alexander wolte
0,3878 nâch den kriechisch site
0,3879 gewâfenet gienc man dâ mite
0,3880 unde mit trûrigen muote
0,3881 Alexander der guote
0,3882 truoc selbe di bâren
0,3883 di vûrsten di dâ wâren
0,3884 jâmerete des sêre
0,3885 daz si iren hêren
0,3886 sâgen weinen sînen vîant
0,3887 daz wart al dâ bewant
0,3888 Alexandrô dem mæren
0,3889 zuo vile michelen êren
0,3890 dô Darius was begraben
0,3891 Alexander hiez überal sagen
0,3892 vride unde genâde
0,3893 herzogen unde grâven
0,3894 bevalch er di rîche
0,3895 harte küninclîche
0,3896 unde liez wîp unde man
0,3897 ir iegelich sîn reht hân

0,3898 unde tete di wâfen alle tragen
0,3899 di er behalten wolte haben
0,3900 hôhe ûf ein palas
0,3901 unde alse daz getân was
0,3902 dô gebôt er den vürsten
0,3903 lâzen si ez niet ne torsten
0,3904 daz si vride swuoren
0,3905 den di durch daz lant vuoren
0,3906 koufmannen unde gebûren
0,3907 unde hiez daz iz ze sûre
0,3908 würde ime swer in zerbræche
0,3909 unde daz man ez ræche
0,3910 an sînen hals unde an sîn lîp
0,3911 er wære man oder wîp
0,3912 dô bôt er michelen schatz
0,3913 allen den di gerieten daz
0,3914 daz man Darium erslüege
0,3915 unde swuor in des genuoge
0,3916 bî sîner muoter heile
0,3917 er wolte mit in teilen
0,3918 sîn lant unde sîn rîche
0,3919 dô tâten tumpliche
0,3920 di dâ schuldic wâren
0,3921 daz sage ich iu ze wâren
0,3922 daz si vüre quâmen
0,3923 dô si vernâmen
0,3924 daz man in genuoc wolte geben
0,3925 si wâren zwêne geneven
0,3926 unde strebeten nâch gifte
0,3927 unde brâhten algeriht
0,3928 sich selben des ze mæren
0,3929 daz si daz beide wæren
0,3930 di den mort hæten getân
0,3931 mit rehte solte iz in ergân
0,3932 alse si hæten geworben
0,3933 mit schanden si wurden
0,3934 von dem lîbe getân
0,3935 nû hoeret wie iz dâr zuo bequam
0,3936 si giengen vüre Alexanderen stân
0,3937 dô si des mordes verjâhen
0,3938 der küninc ne wolte niht beiten
0,3939 er hiez dannen leiten
0,3940 unde daz man si erslüege
0,3941 si bâten in genuoge
0,3942 si ne gerten neheiner geben
0,3943 wen daz er si lieze leben
0,3944 wande er daz selbe spræche
0,3945 daz er ez niemer ne geræche

0,3946 mit neheiner slahte leide
0,3947 unde maneten im sîner eide
0,3948 daz er si lieze genesen
0,3949 unde lieze si iemer arm wesen
0,3950 in anderen rîchen
0,3951 er sprach wærlîchen
0,3952 “ir müezet mit deme tôde streben
0,3953 wande ir sulet kurze wîle leben”
0,3954 ire geschrei unde ire gedôz
0,3955 daz wart michel unde grôz
0,3956 dô man si ze einem galgen
0,3957 zôch dâ behalben
0,3958 an eine vile unreine stat
0,3959 alse der küninc hiez unde bat
0,3960 er hiez si schantlîchen hâhen
0,3961 unde sprach “hoeret alle mîne man
0,3962 iuwer eteslich hât gesprochen
0,3963 ich habe nû zerbrochen
0,3964 mîne triuwe unde mînen eit
0,3965 nein ich mir wære vile leit
0,3966 daz meineide swüere
0,3967 ich swuor daz ich ervüere
0,3968 wer den mort hæte getân
0,3969 man ne sal dem untriuwen manne
0,3970 neheine triuwe leisten
0,3971 swâ man in mac vereischen
0,3972 man sol in brennen unde slân
0,3973 radebrechen oder hâhen
0,3974 alse dise zwêne boese man
0,3975 di disen mort haben getân
0,3976 di ne erbarmen mir niet”
0,3977 daz was gemeinlîchen liep
0,3978 den Persen unde den Kriechen
0,3979 lop si ime dô riefen
0,3980 unde sprâchen daz er wære
0,3981 ein rehter rihtære
0,3982 Alexander warp mit sinnen
0,3983 unde hiez ime gewinnen
0,3984 Darien tohter
0,3985 vile wole er gedâhte
0,3986 wes ime der rîche küninc bat
0,3987 dô er an sînem ende lac
0,3988 swie ez mit ime quæme
0,3989 daz er ze wîbe næme
0,3990 Roxanien di schoenen
0,3991 unde satzte ir ûf di krônen
0,3992 Alexanderen des bedûhte
0,3993 daz iz wole wesen mohte

0,3994 unde dô daz brütlouft was bereit
0,3995 Alexander einen brieve schreip
0,3996 sîner muoter heim ze lande
0,3997 er in vile schiere sande
0,3998 unde entbôt ir wie ez im was ergân
0,3999 daz er ze wîbe solte hân
0,4000 Darien tohter
0,4001 zuo sînem brütloufte
0,4002 bat er daz si quæme
0,4003 swanne er sîn wîp næme
0,4004 unde dâr nâch gelîche
0,4005 di armen unde di rîche
0,4006 sîne boten er ouch sande
0,4007 heim ze Kriechlante
0,4008 unde hiez daz lant berihten
0,4009 unde ein brütloufte stiften
0,4010 in allen dem gebære
0,4011 als er dâ selbe wære
0,4012 daz tet er allez umbe daz
0,4013 daz man wiste deste baz
0,4014 über manige rîche mære
0,4015 wie ez ime ergangen wære
0,4016 in persischen rîche
0,4017 vile küninliche
0,4018 stifte man di wirtschaf
0,4019 als uns daz buoch hât innen brâht
0,4020 drîzic tage unde ouch mêr
0,4021 weder sint noch êr
0,4022 ne wart nehein wirtschaf
0,4023 mit solichen êren vollenbrâht
0,4024 iz ne tæte der küninc Salemon
0,4025 vile michel was sîn rîchtuom
0,4026 über manige künige rîche
0,4027 er lebete keiserliche
0,4028 wande er kunde iz wole bedenken
0,4029 drî hundert schenken
0,4030 hâte er allertagelich
0,4031 daz wære ungeloubelich
0,4032 iemanne ze sagenne
0,4033 ne wær iz uns vile ebene
0,4034 in den buochen niht geschriben
0,4035 unde von der wârheite beliben
0,4036 ouch hæte er ze sînen tische
0,4037 vleisch unde vische
0,4038 sô unmâzlichen vile
0,4039 daz man is gelouben niht ne wile
0,4040 wande er was hêr unde rîch
0,4041 ouch hæte er allertagelich

0,4042 drîzic malter simelen
0,4043 des beriet in got von himele
0,4044 ze sîner küchenen man ouch gap
0,4045 des neheines tages ne gebrach
0,4046 zehen sumersâzen
0,4047 veiz unde grôzen
0,4047a unde dâr zuo drîzic rinder
0,4047b mërre unde minner
0,4048 unde dâ zuo hundert widere
0,4049 sîn dienest daz stuont ebene
0,4050 an vogeles unde wiltbrâte
0,4051 der hêrre hæte sînen rât
0,4052 geschaffet wole mit liste
0,4053 wande er genuoc wiste
0,4054 diz muose man ime gewinnen
0,4055 mit liebe unde mit minnen
0,4056 âne roup unde âne ungemach
0,4057 daz ime nihtes ne gebrach
0,4058 dô di brût louft was gelant
0,4059 dô quam ein bote alzehant
0,4060 der sagete Alexandrô sus
0,4061 “hier komet der küninc Porus
0,4062 mit micheleme gelfe
0,4063 Dariô ze helfe”
0,4064 daz was Alexandrô ungemach
0,4065 dô der bote diz gesprach
0,4066 dô samenete er sîne heres kraft
0,4067 unde vuor mit micheler kraft
0,4068 engagen im in Indiam
0,4069 über eine heide vreissam
0,4070 dâ liden si michel ungemach
0,4071 von der sunnen den tac
0,4072 unde des nahtes von den wûrmen
0,4073 ze râte si dô wurden
0,4074 si ne möhten dise leit
0,4075 unde solich arbeit
0,4076 langer niht verliden
0,4077 ze kinden unde ze wîben
0,4078 wolten si heim kêren
0,4079 si sprâchen ire hêrre
0,4080 wære ein wunderlich man
0,4081 waz er suochte in Indiam
0,4082 si sprâchen almeistic
0,4083 si hæten geleistet
0,4084 daz si ime swuoren
0,4085 dô si von lande vuoren
0,4086 si hulpen ime betwingen
0,4087 mit ire jungelingen

0,4088 Darium den rîchen
0,4089 vile ernestlîchen
0,4090 beide vâhen oder slân
0,4091 “nû haben wir diz getân”
0,4092 sprâchen si algemeine
0,4093 grôz unde kleine
0,4094 “nû gebrichet uns des lîbes
0,4095 ouch verdriuzet uns des wîges
0,4096 unse lant stêt unbewart
0,4097 waz ob man ez brennet unde heret
0,4098 sô ne ist dâ nieman der iz were”
0,4099 dô wolte daz here
0,4100 almeistic wider kêren
0,4101 unde geswîchen ire hêren
0,4102 ouch sprâchen si gelîche
0,4103 wolte er dechein rîche
0,4104 vûrder mêr betwingen
0,4105 sô müeste er gewinnen
0,4106 niuwe urlouges man
0,4107 si hæten es sô vile getân
0,4108 daz man ez wole mohte schouwen
0,4109 si sprâchen “wir sîn sô verhouwen
0,4110 daz uns verdriuzet daz wir leben
0,4111 er mac uns wole urloup geben
0,4112 unde lâze uns wider kêren”
0,4113 Alexander der hêre
0,4114 der vernam ire gebære
0,4115 des wart sîn herze swære
0,4116 unde gienc ûf einen berc stân
0,4117 unde bat dâr zuo ime gân
0,4118 di mit ime wâren komen
0,4119 wande er hæte vernomen
0,4120 rehte ire aller willen
0,4121 er sprach “vile liebe gesellen
0,4122 saget mir durch iuwer güete
0,4123 rehte iuwer gemüete
0,4124 wollet ir von mir scheiden
0,4125 an dirre wüesten heiden
0,4126 daz ist mir herzelîchen leit
0,4127 wande ir lâzet mich hier in arbeit
0,4128 uns sint di Perses sô gram
0,4129 wir hân in leides vile getân
0,4130 des ne hânt si niht vergezzen
0,4131 helede vermezzen
0,4132 nû ich ez sol sprechen
0,4133 mügen si sich gerechen
0,4134 dâr zuo sint si vile gereit
0,4135 ich sage iz iu mit der wârheit

0,4136 vernement si disen unmuot
0,4137 den ir âne nôt tuot
0,4138 sô sîn wir alle verloren
0,4139 iz sî uns liep oder zorn
0,4140 ich ne spriche diz dâr umbe niet
0,4141 ist iu heim ze lande liep
0,4142 ich muoz iu varen lâzen
0,4143 ich ne were iu niht di strâzen
0,4144 doch gedenket dâr ane
0,4145 wes ich iu nû hier mane
0,4146 ob ir dâ heime iuwet saget
0,4147 des ir hier getân habet
0,4148 daz ist allez ein wiht
0,4149 ir ne habet hier getân niht
0,4150 ich was jener der dâ vaht
0,4151 sît ir rehte bedâht
0,4152 ir müezet der wârheite jehen
0,4153 wande ir hât iz allez wole gesên
0,4154 daz iz allez was mîn rât
0,4155 swaz ir hier getân hât
0,4156 mir ne sach nie nehein man
0,4157 in dem sturme über hôher gân
0,4158 noch über rügge ziehen
0,4159 noch zagelîchen dannen vliehen
0,4160 ich vaht iemer zevorn
0,4161 âne schult hân ich verloren
0,4162 iuwer aller vriuntschaft
0,4163 er was übele bedâht
0,4164 der iuch dâr ane brâht hât
0,4165 nû sol es werden der rât
0,4166 der es nû werden mac
0,4167 ich gelebe lîhte noch den tac
0,4168 muoz ich dâr under genesen
0,4169 unde muoz ich danne mit genâden wesen
0,4170 sô gewinne ich noch di man
0,4171 di mir sulen bî stân”
0,4172 dô Alexander diz gesprach
0,4173 al sîn here daz dâ lac
0,4174 schamete sich durch nôt
0,4175 iz ward bleich unde rôht
0,4176 wande si wolten kêren
0,4177 von irem lieben hêrren
0,4178 si bejâhen ire schulde
0,4179 unde er gap in sîne hulde
0,4180 zehant si ûf sprungen
0,4181 vroelîchen si sunge
0,4182 ane bunden si ire vanen
0,4183 unde sprâchen alle samen

0,4184 si ne wolten von der stunte
0,4185 die wîle si wâren gesunt
0,4186 ime niemer mêr geswîchen
0,4187 si huoben sich vroelîchen
0,4188 unde vuoren hin in Indiam
0,4189 zegegen si dô quam
0,4190 ein bote starke gerant
0,4191 unde vuorte brieve in daz lant
0,4192 di sande dâr in Porus
0,4193 dâr ane stuont geschriben sus
0,4194 “hier veret after lande
0,4195 der roubære Alexander
0,4196 unde gewinnet lützele stetelîn
0,4197 si mügen wole verdorben sîn
0,4198 di ime daz weren solten
0,4199 vile ungerne ich es ime wolte
0,4200 ze langer wîle gestaten
0,4201 ich wæne ich wil in gesaten
0,4202 sturmes unde vehten
0,4203 mit manigem snellen knehte
0,4204 kome ich ime engegene
0,4205 mit mînen snellen degenen
0,4206 ich wil in bringen inne
0,4207 daz ich sîne minne
0,4208 niemer ne gesuoche
0,4209 wande ich ir niet ne ruoche
0,4210 mir ne geswîchen di mîne
0,4211 ich trîbe in unde di sîne
0,4212 wider heim ze lande
0,4213 wes wænet Alexander
0,4214 ich ahte ûfe sîne rede
0,4215 lützel unde ûf sînen vride
0,4216 her vuor ouch wîlen in diz lant
0,4217 Dionisius der wîgant
0,4218 ein küninc mit grôzeme here
0,4219 manic tûsent was dere
0,4220 di mit ime quâmen
0,4221 unde schaden hier nâmen
0,4222 si wurden alle sigelôs
0,4223 des heres des er hier verlôs
0,4224 des was unmâzlîchen vile
0,4225 ich wil bestân mit nîtspile
0,4226 disen selben roubære
0,4227 joch müejet mich vile sêre
0,4228 daz ich dise rede tuon sal
0,4229 iz weiz doch di werlt al
0,4230 daz di Macedonien
0,4231 deme hêrren von Indien

0,4232 hier vore zins sanden
0,4233 von iren landen
0,4234 biz Crelus wart geboren
0,4235 daz wir den zins dâ verluren
0,4236 daz was uns unmære
0,4237 wir sprâchen daz dâ ne wære
0,4238 niht soliches sô wir wolten
0,4239 durch daz wir setzen solten
0,4240 lîp unde unde guot an ein heil
0,4241 unde ouch an ein urteil
0,4242 umbe dise rede wæne ich
0,4243 wurden wir des zinses ænic
0,4244 Alexander ich dir doch râte
0,4245 baz danne dû mir tæte
0,4246 ob mir es durft wære
0,4247 ich râte dir ze wære
0,4248 daz dû mich êres
0,4249 unde wider kêres
0,4250 heim zuo dînem lande
0,4251 êr dir dechein schande
0,4252 begagene von mir
0,4253 daz râte ich triuwelîche dir
0,4254 ne kêres dû niwet widere
0,4255 ich gesetze dich vile nidere
0,4256 von allen dînen êren
0,4257 unde dâ dû hêre
0,4258 niwet an ne maht wesen
0,4259 daz lâz nâch mînem râte wesen
0,4260 ouch sage ich dir wærlîche
0,4261 daz dû mir mîn rîche
0,4262 wænes an gewinnen
0,4263 daz komet von unsinnen
0,4264 dû muost mir ez doch lâzen
0,4265 ich müeze sîn verwâzen
0,4266 ob ich ez dir niht ne were
0,4267 mit mînem kreftigen here”
0,4268 dô Alexander der küene man
0,4269 Poren boteschaft vernam
0,4270 unde er sînen brieu gelas
0,4271 vile harte smæhe iz ime was
0,4272 er sprach zuo sînen allen
0,4273 “wie sol uns diz gevallen
0,4274 wollt ir tuon mînen rât
0,4275 tuot ane iuwer sarwât
0,4276 wir sulen dem stolzen Poren
0,4277 mit den swerten lôn
0,4278 daz er Dîonîsen
0,4279 den vrûmigen unde den wîsen

0,4280 ie torste bestân
0,4281 daz sol ime an den leben gân
0,4282 ouch was des lützele nô
0,4283 daz er uns her entbôt
0,4284 sô smæhelîche eine boteschaft
0,4285 mir ne geswîche mîne kraft
0,4286 er sol es ze wandele stân”
0,4287 daz lobeten alle sîne man
0,4288 dô dise rede was getân
0,4289 Alexander schreip sân
0,4290 deme künînge Porô einen brief
0,4291 starke er in dâr in berief
0,4292 als er wole mohte
0,4293 von sîner unzûhte
0,4294 wande er hæte gehôrt
0,4295 an sînem brieve scheltwort
0,4296 er entbôt ime ouch mêre
0,4297 daz daz übel wære
0,4298 daz sichein edele man
0,4299 solte wesen hônsam
0,4300 er sprach daz brûn îsen
0,4301 daz solte wole gewîsen
0,4302 wâ der helt mære
0,4303 in der nô wære
0,4304 dâ man solte stechen
0,4305 unde spere brechen
0,4306 unde di schilde houwen
0,4307 dâ mohte man schouwen
0,4308 mannegelîches ellen
0,4309 under den gesellen
0,4310 unde degenes gebære
0,4311 ime wære vile unmare
0,4312 waz der hunt gebülle
0,4313 unde grîne unde schülle
0,4314 der ime als ime dûhte
0,4315 geschaden niht ne mohte
0,4316 dô Porus disen brief gesach
0,4317 dô was ime daz vile ungemach
0,4318 daz dâr ane stuont geschriben
0,4319 ime wære lieber wær er beliben
0,4320 er ne sande Alexandrô sider
0,4321 neheinen anderen wider
0,4322 wande in twanc der grôze zorn
0,4323 den sin hæte er nâch verloren
0,4324 doch gebôt er sîne hervart
0,4325 dô quam ime manic môr swarz
0,4326 di ime wolten helfen
0,4327 si brâhten manic elfant

0,4328 von den wil ich iu sagen
0,4329 weliche sterke si haben
0,4330 si ne hânt in ire gebeine
0,4331 nû merket waz ich meinen
0,4332 niergen nehein marc
0,4333 si sint ûzer mâze starc
0,4334 man mac ûf si bûwen
0,4335 willet ir es getrûwen
0,4336 türme unde bercvride
0,4337 vile starc sint in di lide
0,4338 ouch sint selbe vile grôz
0,4339 si ne vûrhten slac noch stôz
0,4340 in neheinen stunten
0,4341 man ne mac si niwet wunden
0,4342 wan in den nabel under
0,4343 daz ist ein michel wunder
0,4344 ist aber ieman sô tump
0,4345 er sî alt oder junc
0,4346 der iz in den nabel wil erslahen
0,4347 der mac niemer sô gegâhen
0,4348 er ne gewinne es grôze nôt
0,4349 unde den bitteren tôt
0,4350 wande swenne sô er ez stichet
0,4351 schiere iz sich selben richet
0,4352 unde vellet ûf in dâr nider
0,4353 unde ne lebet niwet langer sider
0,4354 sus wirdet in beiden der lîp benomen
0,4355 ob ich ez rehte hân vernomen
0,4356 ouch hât iz eine natûre
0,4357 daz wirdet ze sûre
0,4358 den alten joch den jungen
0,4359 swen ez mit sîner zungen
0,4360 in dem sturme mac erlangen
0,4361 des leben ist ergangen
0,4362 als iz gevellet ouch dâr nider
0,4363 ûf ne komet iz niwet sider
0,4364 iz muoz dâ ligente belîben
0,4365 wande iz ne hât niht knieschîben
0,4366 wellent ir es gelouben
0,4367 des ne mac iz niht gebougen
0,4368 an den schenkelen sîn gebeine
0,4369 iz ist vile harte reine
0,4370 an allen sînen lîbe
0,4371 iz treget wole âne zwîvel
0,4372 in strîte unde in sturme
0,4373 bercvriden unde türme
0,4374 unde rîtær dâr inne
0,4375 iz wîset mit grôzeme sinne

0,4376 sîn meister der dâ mite kan
0,4377 iz ne mac niergen gegân
0,4378 daz lant ne sî dâr ebene
0,4379 beginnet man ime ze gebenne
0,4380 rôten wîn oder bluot
0,4381 des gewinnet iz vreislîchen muot
0,4382 sus mac man iz betwingen
0,4383 unde dâr zuo bringen
0,4384 daz man ez wîset swâ man wile
0,4385 ze vröuweden unde ze nîtspile
0,4386 Alexander der rîche
0,4387 gedâhte wunderlîche
0,4388 zehant dô er vernam
0,4389 daz Porus gegen ime quam
0,4390 unde elefande brâhte
0,4391 wîslîchen er dâhte
0,4392 mit listiclîchen sachen
0,4393 hiez der hêrre machen
0,4394 êrîne bilede
0,4395 geschaffen alse helede
0,4396 enbinnen wâren si hol
0,4397 unde wâren kriechisches viures vol
0,4398 mit den bileden hiez er laden
0,4399 manigen îsenînen wagen
0,4400 unde schuoof sîne gewarheit
0,4401 gegen Poren here breit
0,4402 unde hiez sîne holden
0,4403 di ime helfen wolten
0,4404 daz si dâhten dâr an
0,4405 er wolte Porum bestân
0,4406 des morgenes als iz tagete
0,4407 di wartman ûz dô drabeten
0,4408 von iewederere menige
0,4409 unde beschouweten di degene
0,4410 sân des morgenes vruo
0,4411 dô gereitte sich dâr zuo
0,4412 di menige in beiden sîten
0,4413 alse si wolten strîten
0,4414 Porus dâ vûre sande
0,4415 sîne elefande
0,4416 ze vorderest vore sîner schare
0,4417 des wart Alexander geware
0,4418 unde schickete dâ engegene
0,4419 di brinnente bileden
0,4420 vore sînen wîganden
0,4421 man gap den elfanden
0,4422 rôten wîn unde bluot
0,4423 des wart ergremet in der muot

0,4424 des hügeten wole ze dem sturme
0,4425 di dâ wâren in di türme
0,4426 über di elfande
0,4427 di küenen wîgande
0,4428 unde di tiurlîche recken
0,4429 dô begunden lecken
0,4430 elfande di bilede
0,4431 si wânten daz iz helede
0,4432 wæren sicherlîchen
0,4433 si gebârtten vreislîchen
0,4434 wande si hæten grôze nôt
0,4435 der tiere beleip dâ vile tôt
0,4436 wande si branten ire mûlen
0,4437 an den glüentigen sûlen
0,4438 von des viures vlammen
0,4439 di dâ quâmen dannen
0,4440 di vluchen durch daz here wider
0,4441 si ne schadeten niwet mêt sider
0,4442 wen daz si di vriunde ertrâten
0,4443 dâ si dannen gâheten
0,4444 dô begunde iz gân an di nôt
0,4445 dâ mannelich den tôt
0,4446 vore sînen ougen sach gereit
0,4447 mit vile grôzer arbeit
0,4448 Alexander den sînen half
0,4449 Porus in ander halbe
0,4450 manete di môre
0,4451 als ir wole müget gehoeren
0,4452 “dirre tiuveles Alexander
0,4453 stellet michel wunder
0,4454 er ist ein ungehiure man
0,4455 vile manige boese list er kan
0,4456 er tuot uns grôze schande
0,4457 er hât unse elefande
0,4458 verbrant unde verjaget
0,4459 sehet daz ir niet ne verzaget
0,4460 denket zuo den handen
0,4461 tiure wîgande
0,4462 wande er ne mac uns niht geschaden
0,4463 wir sulen strîtes gesaten
0,4464 in unde sîne recken
0,4465 mit den brûnen eggen
0,4466 vile bloede sint di Kriechen
0,4467 si ne sulen es niht geniezen
0,4468 daz si luoderære
0,4469 ie durch unse unêre
0,4470 in diz lant torsten komen
0,4471 si ne gewinnen es niemer vromen

0,4472 mir ne gebreche daz swert in der hant
0,4473 si müezen rûmen mir diz lant
0,4474 si wænent tumpliche
0,4475 daz in unsem rîche
0,4476 niht ne sîn sô tiure recken
0,4477 zuo den scharpfen eggen
0,4478 noch sô küene wîgande
0,4479 alse in Kriechlante
0,4480 ich verliese swaz ich hân
0,4481 oder ich verleide in den wân
0,4482 unde bringe si dâr nider
0,4483 oder ich ne bringe niemer wider
0,4484 heim gesunt mînen lîp
0,4485 oder ich mache siuftente wîp
0,4486 dâ heime in iren landen
0,4487 si müezen mit schanden
0,4488 von uns hinne rûmen
0,4489 ouch gebeite ich vile kûme”
0,4490 dô der wîse Alexander
0,4491 an den elefanden
0,4492 den sige mit listen gewan
0,4493 des vröuwete sich der stolze man
0,4494 ouch gewan es sîn here grôz
0,4495 einen michelen trôst
0,4496 di Indî begunden verzagen
0,4497 si hæten michelen schaden
0,4498 vile nâch dâr gewonnen
0,4499 zesamene si dô sprungen
0,4500 unde begunden sich weren
0,4501 engegen dem kriechischen here
0,4502 unde spienen ire hornbogen
0,4503 uns ne habe daz buoch danne gelogen
0,4504 sô wæren di Kriechen sigelôs
0,4505 ne wære Alexander ire trôst
0,4506 mit den bileden niwet komen
0,4507 iz komet dicke ze vromen
0,4508 daz der hêrre sîne man
0,4509 ze noete wole getroesten kan
0,4510 unde williget mit dem guote
0,4511 daz machet in stolz gemüete
0,4512 unde er wider si süeze
0,4513 mit minnelîcher gruoze
0,4514 unde er ze vorderest an der scharen
0,4515 sîn here selbe tar bewarn
0,4516 dô Indî solten verzagen
0,4517 unde man si begunde jagen
0,4518 dô gewan Porus der helt guot
0,4519 einen grimmigen muot

0,4520 der tiurlîche wîgant
0,4521 under sîn here er dô spranc
0,4522 unde manete si vaste zuo der nôt
0,4523 milticliche er in bôt
0,4524 pfellel unde sîde
0,4525 golt unde gesmîde
0,4526 er sprach “untrôst ne ist niet guot
0,4527 habet manlîchen muot
0,4528 unde weret alse helede
0,4529 iuwer lant unde iuwer seledē
0,4530 beide guot unde lîp
0,4531 unde kint unde wîp
0,4532 unde erwerbet êre unde ruom
0,4533 ne wollent ir des niwet tuon
0,4534 sô solet ir des gelouben
0,4535 si sulen vore iuweren ougen
0,4536 iuwere liebe kint schenden
0,4537 unde uns in ellende
0,4538 trîben ûzer dem lande
0,4539 in ze êren unde uns ze schanden
0,4540 durch waz solten wir diz dolē
0,4541 wir mûgen vile wole
0,4542 in wîges gestaten
0,4543 weiz got wir sulen si gesaten
0,4544 strîtes unde vehte
0,4545 wir haben sô guote knehte
0,4546 unde sô manigen dietdegen
0,4547 wir sulen mit starken swertslegen
0,4548 uns an in rechen
0,4549 unde ire schare durchbrechen
0,4550 si mûgen sich uns niet erwerben
0,4551 noch den lîp vore uns generen
0,4552 wir sulen in ûf ire laster
0,4553 widerstân michel vaster
0,4554 danne Darius habe getân
0,4555 den Alexander hiez slân
0,4556 mortlîchen in sîn palase
0,4557 hei wie grôz untriuwe daz was
0,4558 weret iuch helede guot
0,4559 unde haltet manlîchen muot
0,4560 ir sulet in wîsen
0,4561 daz scharpfe brûn îsen
0,4562 tiure wîgande
0,4563 gedenket wole zuo den handen
0,4564 unde lâzet iu riuwen
0,4565 Darium mit triuwen
0,4566 unde rechet sînen tôt
0,4567 wâr umbe solten wir dise nôt

0,4568 von in langer liden
0,4569 joch willent si uns vertriben
0,4570 ûz von unsem rîche
0,4571 weret iuch sô vrûmicliche
0,4572 daz man von den môren
0,4573 her nâch sagen hoere
0,4574 wie si ire lant werten
0,4575 dô si di Kriechen hereten
0,4576 ir sulet slân unde stechen
0,4577 unde ire schare durchbrechen
0,4578 swer daz heil gewinnet
0,4579 daz er hin entrinnet
0,4580 daz er dâ heime müge sagen
0,4581 waz er hier gesehen habe
0,4582 wie si wurden entvangen
0,4583 in indischen landen”
0,4584 dô Porus dise rede
0,4585 zuo sînen heleden getete
0,4586 dô gewunnen si einen stæten muot
0,4587 dô was dâ manic helt guot
0,4588 den niht sô liebes ne was
0,4589 sô daz si di scharpfen sahs
0,4590 teilten mit den gesten
0,4591 ze wîge si sich dô rusten
0,4592 wande allermannegeleich
0,4593 gehügete an daz volcwîc
0,4594 manic erwarp dâ den tût
0,4595 dâ mohte man schouwen daz bluot
0,4596 von den Kriechen vliezen
0,4597 di môre ouch dâ liezen
0,4598 manigen urlouges man
0,4599 swer mit dem lîbe dannen quam
0,4600 der mohte es iemer vrô sîn
0,4601 di künige vâhten under in
0,4602 unz ane den dritten tac
0,4603 sô nieman dâ ne gesach
0,4604 bloedes mannes gebære
0,4605 wie vile der wære
0,4606 di dâ lâgen erslagen
0,4607 daz ne hôrte ich noch nie gesagen
0,4608 der den grôzern schaden dâ gewan
0,4609 daz was Alexander unde sîne man
0,4610 dô Alexander gesach
0,4611 daz dâ sô vile tût lac
0,4612 sîner wîgande
0,4613 alsô getâner schande
0,4614 was er êr vile ungewone
0,4615 vile schiere was er dô komen

0,4616 dâ er Porum gesach
0,4617 vermezzenlîche er zuo ime sprach
0,4618 “des haben wir küninc laster
0,4619 daz unser zweier geste
0,4620 sô lange samet vehten
0,4621 unz di guoten knehte
0,4622 beidenthalp werdent erslagen
0,4623 sô ne mügen wir ez niemer mêr verklagen
0,4624 noch niemer mêr verwinden
0,4625 under unsen ingesinden
0,4626 nû lâzen wir di here stân
0,4627 unde in beidenthalben vride hân
0,4628 unde swer den zebreche
0,4629 daz man ez an ime reche
0,4630 nû nim dû küninc wider mich
0,4631 unde ich ein einwîc wider dich
0,4632 swer daz heil gewinne
0,4633 unde mit genâden komet hinne
0,4634 dem werden des anderen man
0,4635 mit ire dieneste undertân”
0,4636 Porus der rîche
0,4637 der gelobete vroelîche
0,4638 daz Alexander dâr sprach
0,4639 ime was zuo dem kampfe gâch
0,4640 er was vile langer
0,4641 danne der küninc Alexander
0,4642 zwîer klâftere unde mêr
0,4643 Porus was starc unde hêr
0,4644 des getrôste er sich
0,4645 unde gelobete daz einwîc
0,4646 daz wart ime sint ze leide
0,4647 di künige kûme beide
0,4648 des kampfes erbeitten
0,4649 dâr zuo si sich bereitten
0,4650 dô si solten strîten
0,4651 dô stuonten in beiden sîten
0,4652 di here alse dâ gelobet was
0,4653 di hêrren zukten di sahs
0,4654 zesamene si dô sprungen
0,4655 woch wie di swert klungen
0,4656 an der vürsten handen
0,4657 dâ sich di wîgande
0,4658 hiewen alse di wilde swîn
0,4659 dâ was nît under in
0,4660 michel wart der stahelschal
0,4661 daz viur blickete überal
0,4662 dâ si des schildes rande
0,4663 zerhiewen vore di hande

0,4664 si giengen alle wîle
0,4665 wider einander ze bîle
0,4666 wole nützetten di eggen
0,4667 di tiurlîche recken
0,4668 ire ieweder wider den anderen
0,4669 dô dûhte Alexanderen
0,4670 daz er daz bezzer habete
0,4671 Poren liut des erzagete
0,4672 unde ouch von unheile
0,4673 unde verkrîstenne algemeine
0,4674 under des Porus dare sach
0,4675 unde Alexander gap ime einen slac
0,4676 unde tet ime an den stunten
0,4677 eine sô grôze wunden
0,4678 daz der michele man
0,4679 zuo der erde gevallen quam
0,4680 swie gerne er wider wolte streben
0,4681 er ne mohte langer niwet leben
0,4682 er lac dâr zehant tôt
0,4683 daz muose wesen durch di nôt
0,4684 wande ime Alexander
0,4685 selbe mit sînen handen
0,4686 daz houbet von dem bûche sluoc
0,4687 dô hæte er des kampfes genuoc
0,4688 dô Poren here gesach
0,4689 daz ire hêrre tôt lac
0,4690 si ne verzageten niwet umbe daz
0,4691 si vâhten alle desten baz
0,4692 wande dô begunden strîten
0,4693 di here von beiden sîten
0,4694 unde gemischete sich zesamene
0,4695 mit grimme di menige
0,4696 dô huop sich êrest der wîc
0,4697 dâ verlôs manic man den lîp
0,4698 di grünen wîsen wurden rôten
0,4699 der môre lac dâ vile tôt
0,4700 sô tet iz ouch der Kriechen
0,4701 ze gîsele si dâ liezen
0,4702 manigen ellenden gast
0,4703 nehein helm ne was sô vast
0,4704 Alexander ne slüege dâr durch
0,4705 dâ wart gevollt manic vurch
0,4706 mit dem bluote al rôten
0,4707 dâ was di grimmeste nôten
0,4708 di dâr ie dechein man
0,4709 in volcwîge vernam
0,4710 getunget wart di heide
0,4711 dâ vielen di veige

0,4712 unz man ûf si mohte gân
0,4713 dâ wart vile leide getân
0,4714 manigen stolzen manne
0,4715 di niemer mêt quam danne
0,4716 di hêrren von India
0,4717 di holeten grôzen schaden dâ
0,4718 wande Alexander
0,4719 vrumete solich wunder
0,4720 daz es alle di mac jâmer haben
0,4721 di iz iemer gehoeren sagen
0,4722 daz liut von Mauritanie
0,4723 daz habete sich zesamene
0,4724 unde gulten ein herte widergelt
0,4725 dâ vlôz daz bluot über velt
0,4726 di schare si durchbrâchen
0,4727 iren hêrren si dâ râchen
0,4728 unde di Kriechen sluogen si wider
0,4729 dâ viel manic tôt nider
0,4730 dâ viel man über man
0,4731 Alexander doch den sige nam
0,4732 über di grimmigen diet
0,4733 si ne gereten neheines vriden niet
0,4734 unz Alexander gelobete
0,4735 daz nieman in ne schadete
0,4736 ane wîben unde an kinden
0,4737 dô entviengen si daz gedinge
0,4738 unde wurden alle undertân
0,4739 deme hêrren von Macedoniam
0,4740 Alexander in dô urloup gap
0,4741 daz si vuoren an di walstat
0,4742 unde bewareten mit êren
0,4743 Porum iren hêrren
0,4744 bereite wâren si dâr zuo
0,4745 schiere huoben si sich dô
0,4746 dâ si iren hêrren vuntun
0,4747 in den selben stuntun
0,4748 bestateten si hêrlîchen
0,4749 Porum den rîchen
0,4750 unde andere ire holden
0,4751 di si begraben wolten
0,4752 mit êren si di gruoben
0,4753 si volten manige gruoben
0,4754 mit vriunden unde mit mâgen
0,4755 di dâ erslagen lâgen
0,4756 daz sage ich iu ze wâren
0,4757 di dâ gewuntet wâren
0,4758 di vuorten si heim in ire lant
0,4759 ouch beleip dâ manic wîgant

0,4760 biz daz sîne wunden
0,4761 heilen begunden
0,4762 dô Darius was begraben
0,4763 unde Porus erslagen
0,4764 Alexander vuor in ein lant
0,4765 daz was Occidratis genant
0,4766 daz lant is von der sunnen warm
0,4767 daz liut dâr inne daz is arm
0,4768 unde ne hât neheinen übermuot
0,4769 vile mæzlich ist ire guot
0,4770 si gânt nacket allezane
0,4771 unde hânt lützel umbe unde ane
0,4772 ire rîchtuom ist kleine
0,4773 si sint mit zigenbeine
0,4774 alle gewâfenet
0,4775 si ne ruochent wâ si slâfent
0,4776 si ne hânt dorf noch stat
0,4777 swâ si der naht ane gât
0,4778 dâ belîbet mannegelîch
0,4779 ire vihe unde ire wîp
0,4780 di sint von in gescheiden
0,4781 an di breiten heiden
0,4782 si lebent jæmerlîche
0,4783 der küninc von dem rîche
0,4784 dô er rehte vernam
0,4785 daz Alexander in sîn lant quam
0,4786 dô sande er ime engagen
0,4787 sîne boten wole geladen
0,4788 mit sô getâner gâben
0,4789 sô si dâ ze lande pflâgen
0,4790 ouch sande er ime einen brief
0,4791 dâr ane guot unde allez liep
0,4792 âne aller slahte leit
0,4793 an dem brieve er schreip
0,4794 “bist dû komen in mîn lant
0,4795 durch roup oder durch brant
0,4796 oder durch vehte
0,4797 daz salt dû wizzen rehte
0,4798 dû bist ein harte wîs man
0,4799 der sich wole versinnen kan
0,4800 ich wil dû dich versinnes
0,4801 den ruom den dû gewinnes
0,4802 hier der ne ist niht grôzlich
0,4803 Alexander wes müejes dû dich
0,4804 dû vindes hier niht ze nemenne
0,4805 wir ne hân dir niht ze gebenne
0,4806 hier ne ist der schilt noch daz swert
0,4807 iz ne ist der arbeit wert

0,4808 küninc daz dû bist komen here
0,4809 nû salt dû varen andersware
0,4810 daz mac dir gevromen baz
0,4811 in triuwen râte ich dir daz”
0,4812 Alexander las disen brief
0,4813 unde entbôt im er ne quæme niet
0,4814 zuoze in unvridelîche
0,4815 er ne wolte ire rîche
0,4816 niwet zerstoeren
0,4817 gagen in si dô vuoren
0,4818 unde hiezen in willekome sîn
0,4819 Alexander der genâdete in
0,4820 unde sîne wîgande
0,4821 er vrâgete di von dem lande
0,4822 wâ si des jâres wâren
0,4823 ouch vrâgete er si ze wâren
0,4824 wes si sich betrageten
0,4825 unde weliches sites si pflægeten
0,4826 unde alse si ersturben
0,4827 wâ si begraben wurden
0,4828 unde ob si sich pflægen ze grabenne
0,4829 dô begunden si ime sagen
0,4830 “wir ne haben hûs noch bürge
0,4831 unde leben âne sorge
0,4832 wir ne hân ze verliesenne niet
0,4833 wene rehte alse man uns gesihet
0,4834 daz ist di rehte wârheit
0,4835 uns ist in alle zît bereit
0,4836 beide woninge unde grap
0,4837 erweren uns nieman daz ne mac
0,4838 swenne wir ersterben
0,4839 alein wir niet ne werden
0,4840 begraben in nehein grabe
0,4841 einen trôst haben wir doch dâr abe
0,4842 daz uns bedecke der himel”
0,4843 dô ne vrâgete er si nihtes mêt sider
0,4844 dô hiez in Alexander
0,4845 daz si under einander
0,4846 giengen ze râte
0,4847 unde ime einer bete bâten
0,4848 di wolte er in leisten
0,4849 dô begunden si ime eischen
0,4850 daz er in daz wolte geben
0,4851 daz si iemer muosten leben
0,4852 unde niht ne dorften sterben
0,4853 dô wart ime unwerde
0,4854 mit zorne sprach er in zuo
0,4855 wie er daz mohte getuon

0,4856 er müeste selbe sterben
0,4857 wer des über mohte werden
0,4858 diz liut wære dâr an gelîch
0,4859 iz wære allez sterplich
0,4860 er ne solte niht sterben eine
0,4861 iz wære ein dinc gemeine
0,4862 allen liuten in ertrîche
0,4863 dô sprach vile wîslîche
0,4864 einer von dem lande dô
0,4865 zuo deme kûninge Alexandrô
0,4866 ob er selbe ouch solte sterben
0,4867 wâr umbe er an der erden
0,4868 wunder alse manicvalt
0,4869 sô lange hæte gestalt
0,4870 er mohte iz gerne lâzen
0,4871 alles dinges mâze
0,4872 gezimet mannegelîchem
0,4873 Alexander der rîche
0,4874 sprach “dise sache
0,4875 ist uns alsô geschaffen
0,4876 von des oberesten gewalt
0,4877 swaz uns dannen wirdet gezalt
0,4878 daz müezen wir allez üeben
0,4879 daz mere ne mac nieman trûeben
0,4880 iz ne trûebe der wint
0,4881 angst hânt di dâr inne sint
0,4882 die wîle ich vore dem tôde mac genesen
0,4883 wen lâzent ir mich wesen
0,4884 meister von mînen sinnen
0,4885 ich muoz beginnen
0,4886 etewaz daz mir wole tuot
0,4887 hæten si alle iuweren muot
0,4888 di in der werelte wollent wesen
0,4889 waz solte in danne daz leben”
0,4890 er hiez si belîben gesunt
0,4891 dâr nâch in kurzer stunte
0,4892 leit er arbeite genuoc
0,4893 beide berge unde bruoch
0,4894 macheten ime di wege lanc
0,4895 vile selten er gemach vant
0,4896 biz der wunderlîche man
0,4897 mit grôzer arbeite quam
0,4898 der werlt an ein ende
0,4899 in dem ellende
0,4900 wart im ze muote
0,4901 wie er sîner muoter
0,4902 unde sînem meistere geschriben
0,4903 di noete di er erlite

0,4904 in vremeden landen
0,4905 mit sînen wîganden
0,4906 alsus hebet sich der brief
0,4907 dâr an leit unde liep
0,4908 schreip Alexander
0,4909 di er unde manic ander
0,4910 leit in vremedem lande
0,4911 sîner muoter er in sande
0,4912 der schoenen Olympiadî
0,4913 unde sînem meistere Aristotelî
0,4914 wellt ir ein lützel gedagen
0,4915 sô wil ich iu rehte sagen
0,4916 daz an dem brieve geschriben was
0,4917 als ich ez an einen buoche las
0,4918 er quît mir ist ze muote
0,4919 daz ich dir liebe muoter
0,4920 unde mîneme lieben meister
0,4921 vile gerne wille leisten
0,4922 daz ich iu beiden gehiez
0,4923 dô ich iu dâ heime liez
0,4924 vernemet waz hier geschriben stâ
0,4925 unde denket wole dâr nâh
0,4926 wande ich kûnde iu di dinc
0,4927 di mir zevorn komen sint
0,4928 dô ich Darium verwan
0,4929 unde allez daz lant ze Persiam
0,4930 unde ouch di mæren Indiam
0,4931 mir brâhte undertân
0,4932 dannen huop ich mich sân
0,4933 unde mîne vile liebe man
0,4934 ze Caspenporten
0,4935 leides unde vorhten
0,4936 wânete ich wesen âne
0,4937 wir quâmen ze einem wâge
0,4938 dâ liez ich ruowen mîn here
0,4939 durstes wâneten wir uns erwerben
0,4940 dô wir ze dem wazzere quâmen
0,4941 unde iz in dem munt genâmen
0,4942 dô was iz bitter als ein galle
0,4943 ungelabet beliben wir alle
0,4944 dô brâchen wir ûf unse gezelt
0,4945 unde sâhen über ein velt
0,4946 wâ ein schoene stat was
0,4947 di was geheizen Barbaras
0,4948 über daz wazzer eine mîle
0,4949 mîne rîtær al di wîle
0,4950 wolten swimmen in den wâc
0,4951 dar gienc uns der schade nâch

0,4952 kokodrillen quâmen
0,4953 mîner gesellen si nâmen
0,4954 sibene unde zweinzic
0,4955 di verluren dâ den lîp
0,4956 vûre wâr ich iu daz sagen mac
0,4957 wande ich ez selbe ane sach
0,4958 in iren munt si sie âzen
0,4959 di muoste ich varen lâzen
0,4960 dô huop sich mîn heres kraft
0,4961 wande iz rehte was bedâht
0,4962 ûf bî daz wazzer
0,4963 daz êr was bitter
0,4964 daz wart dô süeze unde guot
0,4965 des wart gevröuwet unse muot
0,4966 dô sluogen wir unse gezelt
0,4967 bî dem wâge an daz velt
0,4968 unde macheten michel viur
0,4969 di ruowe wart uns dâ vile sûr
0,4970 wande ûz dem walde quam gegân
0,4971 manic tier vreissam
0,4972 unde vreislich gewürme
0,4973 mit dem begunden wir stürmen
0,4974 vile nâch alle di naht
0,4975 der durst hæte si dare brâht
0,4976 des wazzers wânten si sich laben
0,4977 scorpiones tâten uns grôzen schaden
0,4978 si wâren breit unde lanc
0,4979 unde hæten vreislichen ganc
0,4980 beide wîz unde rôt
0,4981 si tâten uns michele nôt
0,4982 si erbizzen uns manigen man
0,4983 dô quâmen lewen gegân
0,4984 di wâren grôz unde starc
0,4985 mêrre vorhte nie ne wart
0,4986 under neheineme here
0,4987 den lewen muosten wir uns weren
0,4988 dâr nâch quam zuoze uns gegân
0,4989 manic eber vreissam
0,4990 grôzere danne di lewen
0,4991 mit den zanden si hiewen
0,4992 allez daz vore in was
0,4993 daz unser ie dechein genas
0,4994 des habe got danc
0,4995 di zande wâren in lanc
0,4996 einer klâfter oder mêr
0,4997 di tâten uns vile wê
0,4998 dô quâmen elefande
0,4999 manige gegangen

0,5000 trinken zuo dem wâge
0,5001 wir liten ungenâde
0,5002 ouch suochten uns slangen
0,5003 unmâzen lange
0,5004 mit ûf gerihter brust
0,5005 wir liten michel unlust
0,5006 dô quâmen liute gegân
0,5007 alse tiuuele getân
0,5008 si wâren alse affen
0,5009 under den ougen geschaffen
0,5010 si hæten sehs hande
0,5011 lanc wâren in di zande
0,5012 harte müejeten si mîn here
0,5013 mit speren joch mit schozzen
0,5014 di sturben ungenozzen
0,5015 unse nôt di was manicvalt
0,5016 dô branten wir den selben walt
0,5017 daz was durch daz getân
0,5018 daz wir vride muosten hân
0,5019 vore den vreislichen tieren
0,5020 dâr nâch vile schiere
0,5021 sach ich daz griuwelîcheste tier
0,5022 daz sint oder êr
0,5023 ieman mohte geschouwen
0,5024 daz sach ich mit mînen ougen
0,5025 vreissamer tier niemer ne wirdet
0,5026 iz was gezwîget als ein hirz
0,5027 iz hæte drî stangen
0,5028 grôze unde lange
0,5029 ne wære der mîn trôst
0,5030 iz hæte des lîbes erlôst
0,5031 ein michel teil von mînem here
0,5032 sehs unde drîzic wâren dere
0,5033 di iz mit den hornen ersluoc
0,5034 iz was vreislich genuoc
0,5035 ouch sage ich iu ze wâren
0,5036 daz ir vûnvzic wâren
0,5037 di iz ertrat mit den vuozen
0,5038 nû wir ez iu sagen müezen
0,5039 dâr nâch in der næhesten naht
0,5040 des hân ich ouch mir bedâht
0,5041 alse wir ez dâ vernâmen
0,5042 vuhse dar ouch quâmen
0,5043 grôze ûzer mâzen
0,5044 di lîchamen si âzen
0,5045 daz ne mohten wir niwet erwerben
0,5046 ich unde al mîn here
0,5047 in dem velde dâ wir lâgen

0,5048 vliegen wir sâhen
0,5049 alse tûben unde lederswalwen
0,5050 daz ne beviel uns niwet wole
0,5051 si hæten mennischenzane
0,5052 si âzen uns allezane
0,5053 nasen unde ôren
0,5054 hier müget ir wunder hoeren
0,5055 di ros müejeten si dâr zuo
0,5056 dannen huoben wir uns dô
0,5057 an ein velt heizet Aciâ
0,5058 unse gezelt sluogen wir dâ
0,5059 unde ruoweten an dem velde
0,5060 under unsen gezelte
0,5061 vröuweden dâ mîn here pflac
0,5062 wir nâmen solich gemach
0,5063 sô wir dâr vunt
0,5064 dâr nâch in kurzen stunten
0,5065 vuoren wir mit gewalt
0,5066 in einen harte schoenen walt
0,5067 dâ stuonten hôhe boume
0,5068 des nâmen wir alles goume
0,5069 ûf den boumen wuohs allez daz
0,5070 daz daz lantliut az
0,5071 dâ si sich mite nereten
0,5072 di uns daz lant wereten
0,5073 di wâren unmâzlichen grôz
0,5074 ô wê wie starke uns der verdrôz
0,5075 wande iz wâren gîgande
0,5076 unde truogen an ire hande
0,5077 stehelîne stangen
0,5078 unde quâmen uns zuo gegangen
0,5079 vile unvridelîche
0,5080 ich gedâhte wîslîche
0,5081 unde begunden râten
0,5082 waz wir dâr wider tâten
0,5083 wir wochzeten alle ensamen
0,5084 wande si nie mêt ne vernâmen
0,5085 neheines mennischen stimme
0,5086 sô vluhen si vile grimme
0,5087 verre in einen grôzen walt
0,5088 aldâ wurden si gezalt
0,5089 an sehs hundert
0,5090 dô wurden ir gesunderet
0,5091 von den anderen vier unde drîzic
0,5092 di verluren dâ den lîp
0,5093 daz ne wil ich niemer geklagen
0,5094 ouch wart der mîner dâ verslagen
0,5095 rehte vier unde zweinzic

0,5096 drî tage beleip ich
0,5097 aldâ mit mînen mannen
0,5098 dô huop ich mich dannen
0,5099 dô sluogen wir unse gezelt
0,5100 ûf an ein breit velt
0,5101 grôz wunder ich dâ sach
0,5102 des morgenes dô uns quam der tac
0,5103 dô sach ich wahsen boume
0,5104 des nam ich rehte goume
0,5105 di wuohsen harte schône
0,5106 ûzer erde unz an di nône
0,5107 dâr under bluomen unde gras
0,5108 dô di nône liden was
0,5109 dô sunken di boume nider
0,5110 tiefe under der erden wider
0,5111 ûf den boumen wuohs guot vruht
0,5112 dâ begienc ich grôz unzuht
0,5113 ich gebôt mînen knehten
0,5114 daz si mir des obezes bræhten
0,5115 grôz nôt in dâr vone bequam
0,5116 swelich ire daz obez nam
0,5117 der wart sô zerblûwen
0,5118 daz ime daz muoste riuwen
0,5119 daz er ie geboren wart
0,5120 si wurden ouch an der vart
0,5121 mit geiselen sêre zerslagen
0,5122 si ne wisten über wen doch klagen
0,5123 wande si ne gesâhen niemanne
0,5124 doch hôrten si eine stimme
0,5125 di gebôt unde sagete
0,5126 daz nieman ne schadete
0,5127 dem obeze noch den boumen
0,5128 daz si des nâmen goume
0,5129 neweder wâfen noch man
0,5130 würde iz über daz getân
0,5131 dâr umbe solte liden nôt
0,5132 unde den bitteren tât
0,5133 oder schaden vile grôz
0,5134 der des obezes nie ne genôz
0,5135 ouch sâhen wir dâr
0,5136 kleine vogeles daz ist wâr
0,5137 di wâren sanfte gemuot
0,5138 unde ne vorhten niwet den tât
0,5139 grôze nôt er liden solte
0,5140 swer in schaden wolte
0,5141 den brante daz himelviur
0,5142 dem wart daz leben vile sûr
0,5143 ein wunder schouwete ich dâr ouch

0,5144 einen boum âne loup
0,5145 der ne hatte blat noch vruht
0,5146 dâ saz ein schoene vogel ûf
0,5147 deme was sîn houbet
0,5148 ob ir es mir geloubet
0,5149 lûter sô di sunne
0,5150 er was aller vogeles wûne
0,5151 er ist Fenix genant
0,5152 über alle di lant
0,5153 unde über al ertrîche
0,5154 daz wizzet wêrlîche
0,5155 ne ist wan der eine
0,5156 er ne ist ouch niht ze kleine
0,5157 dô wir vuoren bî dem mere
0,5158 dô reit ich ûzer dem here
0,5159 mit drîn tûsent mannen
0,5160 dô huoben wir unsich dannen
0,5161 unde wolten wunder besehen
0,5162 dô sâhen wir verre dannen stên
0,5163 einen hêrlîchen walt
0,5164 daz wunder daz was manicvalt
0,5165 daz wir dâ vernâmen
0,5166 dô wir dâ bî quâmen
0,5167 dô hôrten wir dâr inne
0,5168 manige schoene stimme
0,5169 lîren unde harpfen klanc
0,5170 unde den sîezesten sanc
0,5171 der von mennischen ie wart gedâht
0,5172 wêr er aller zesamene brâht
0,5173 der ne kunde sich dâr zuo niet gegaten
0,5174 vile harte wûnniclich der schate
0,5175 under den boumen dâr was
0,5176 dâ entsprungen bluomen unde gras
0,5177 unde wurze maniger kûne
0,5178 ich wêne ie walt gewûne
0,5179 alsô manige zierheit
0,5180 er was lanc unde breit
0,5181 der selbe walt der lac
0,5182 als ich iu dâr von sagen mac
0,5183 an einer schoenen ouwen
0,5184 dâr muosten wir schouwen
0,5185 manigen edelen brunnen
0,5186 der ûz den walde quam gerunnen
0,5187 lûter unde vile kalt
0,5188 ich unde mîne heleda balt
0,5189 hæten dâ wunderes gemach
0,5190 daz uns ze liebe dâ geschach
0,5191 daz ne wil ich sô niwet verdagen

0,5192 ich ne wil iz iu vlîzlîche sagen
0,5193 der edele walt vrône
0,5194 was wunderlîchen schoene
0,5195 des nâmen wir alles goume
0,5196 hôh wâren di boume
0,5197 di zelgen dicke unde breit
0,5198 nâch der rehten wârheit
0,5199 daz was ein michel wünne
0,5200 dâ ne mohte di sunne
0,5201 an di erde niht geschînen
0,5202 ich unde di mîne
0,5203 wir liezen unse ros stân
0,5204 unde giengen in den walt sân
0,5205 durch den wünniclîchen sant
0,5206 di wîle dûhte uns harte lanc
0,5207 biz wir dare quâmen
0,5208 dâr wir vernâmen
0,5209 waz wunderes dâ mohte sîn
0,5210 vile manic schoene magedîn
0,5211 wir aldâ vunt
0,5212 di dâ in den stunt
0,5213 spileten ûf den grünen klê
0,5214 hundert tûsent unde mêr
0,5215 di spileten unde sprungen
0,5216 hei wie schône si sungen
0,5217 daz beide kleine unde grôz
0,5218 durch den süezlîchen dôz
0,5219 den wir hôrten in den walt
0,5220 ich unde mîne helede balt
0,5221 vergâzen unse herzeleit
0,5222 unde der grôzen arbeit
0,5223 unde allez daz ungemach
0,5224 unde swaz uns leides ie geschach
0,5225 uns allen dô bedûhte
0,5226 als iz wole mohte
0,5227 daz wir genuoc habeten
0,5228 die wîle daz wir lebeten
0,5229 vrôuwede unde rîchheit
0,5230 dâ vergaz ich angest unde leit
0,5231 unde mîn gesinde
0,5232 unde swaz uns von kinde
0,5233 ie leides geschach
0,5234 biz an den selben tac
0,5235 mir dûhte an der stunte
0,5236 ich ne würde niemer ungesunt
0,5237 ob ich dâr iemer müeste wesen
0,5238 sô wære ich garwe genesen
0,5239 von aller angestlîcher nôt

0,5240 unde ne vorhte niwet den tô
0,5241 wollt ir nû rehte verstân
0,5242 wie iz umbe di vrouwen quam
0,5243 wannen si bequâmen
0,5244 oder welich ende si nâmen
0,5245 des mac iu wole besunder
0,5246 nemen michel wunder
0,5247 swanne der winter abe gienc
0,5248 unde der sumer ane gienc
0,5249 unde iz begunde gruonen
0,5250 unde di edelen bluomen
0,5251 in den walde begunden ûf gân
0,5252 dô wâren si vile wole getân
0,5253 licht was ire glîze
0,5254 ire roete unde ire wîze
0,5255 vile verre von in schein
0,5256 bluomen ne wart nie nehein
0,5257 di schoener wesen mohte
0,5258 si wâren als uns bedûhte
0,5259 rehte sinewel als ein bal
0,5260 unde vaste beslozen überal
0,5261 si wâren wunderlîchen grôz
0,5262 alse sich di bluome obene entslôz
0,5263 daz merket an iuweren sinne
0,5264 sô wâren dâr inne
0,5265 megede rehte vollenkomen
0,5266 ich sage iuch als ich ez hân vernomen
0,5267 si giengen unde lebeten
0,5268 mennischensin si habeten
0,5269 unde redeten unde bâten
0,5270 rehte alse si hâten
0,5271 alter umbe zwelif jâr
0,5272 si wâren geschaffen daz is wâr
0,5273 schône an ire lîbe
0,5274 ich ne sach nie von wîbe
0,5275 schoener antlütze mêr
0,5276 noch ougen alsô wole stên
0,5277 ire hande unde ire arme
0,5278 wâren blanc als einem harme
0,5279 unde vuoze unde bein
0,5280 under in ne was nehein
0,5281 si ne pflæge schoener hövischheit
0,5282 si wâren mit zûhten wole gemeit
0,5283 unde lacheten unde wâren vrô
0,5284 unde sunge alsô
0,5285 daz êr noch sint nehein man
0,5286 sô süeze stimme ne vernam
0,5287 mügent ir es getrûwen

0,5288 sô solten dise vrouwen
0,5289 allez an den schate wesen
0,5290 si ne mohten anders niet genesen
0,5291 sweliche di sunne beschein
0,5292 der ne beleip ze lîbe nie nehein
0,5293 daz wunder daz was manicvalt
0,5294 dô ward erschellet der walt
0,5295 von der sûezer stimme
0,5296 di dâ sungen inne
0,5297 di vogele unde di magedîn
0,5298 wie mohte iz wünniclicher sîn
0,5299 vruo unde spâte
0,5300 al ire lîbes gewæte
0,5301 was ane si gewahsen
0,5302 ane hiute unde ane vahse
0,5303 in was getân di varwe
0,5304 nâch den bluomen garwe
0,5305 rôet unde ouch wîz sô der snê
0,5306 dô wir si ze uns sâgen gên
0,5307 zuoze in spilete uns der lîp
0,5308 sus lustsame wîp
0,5309 sint der werlt unkunt
0,5310 nâch mînem here sande ich ze stunte
0,5311 dô si ze mir quâmen
0,5312 unde ouch vernâmen
0,5313 di hêrlîchen stimme
0,5314 dâ vuoren si mit sinne
0,5315 unde sluogen ire gezelt
0,5316 in den walt niht an daz velt
0,5317 dô lâgen wir dâr mit schalle
0,5318 unde vrôuweten unsich alle
0,5319 der seltsænen briute
0,5320 ich unde mîne liute
0,5321 wir wolten dâr belîben
0,5322 unde nâmen si ze wîben
0,5323 unde hatten mêr wûnnen
0,5324 danne wir ie gewunnen
0,5325 sint daz wir wurden geboren
0,5326 ô wê daz wir sô schiere verluren
0,5327 daz michele gemach
0,5328 diz wunder ich allez sach
0,5329 selbe mit mînen ougen
0,5330 des mûgent ir gelouben
0,5331 diz werte als ich iu sage
0,5332 drî mânôde unde zwelif tage
0,5333 daz ich unde mîne heleda balt
0,5334 wâren in dem grünen walde
0,5335 unde bî der schoenen ouwen

0,5336 mit den lieben vrouwen
0,5337 unde wünne mit in habeten
0,5338 unde mit vröuweden lebeten
0,5339 vile jâmerliche uns dô geschach
0,5340 daz ich verklagen niet ne mac
0,5341 dô di zît vollengienc
0,5342 unse vröuwede di zergieñc
0,5343 di bluomen gare verdurben
0,5344 unde di schoenen vrouwen sturben
0,5345 di boume ire loup liezen
0,5346 unde di brunnen ire vliezen
0,5347 unde di vogle ire singen
0,5348 dô begunde twingen
0,5349 unvröuwede mîn herze
0,5350 mit manicvalter smerze
0,5351 vreislich was mîn ungemach
0,5352 daz ich alle tage sach
0,5353 an den schoenen vrouwen
0,5354 ô wê wie si mich rûwen
0,5355 dô ich si sach sterben
0,5356 unde di bluomen verderben
0,5357 dô schiet ich trûric dannen
0,5358 mit allen mînen mannen
0,5359 dô gesach ich unde mîne man
0,5360 eine schoene burc vore uns stân
0,5361 di was gemachet mit sinne
0,5362 ich wære gerne dâr inne
0,5363 dô ne mohte is niwet sîn
0,5364 ich unde daz here mîn
0,5365 wir sâhen einen grôzen man
0,5366 der was vreislichen getân
0,5367 der quam dâr ûz gegangen
0,5368 sîne hût was ime bevangen
0,5369 al mit swînes borsten
0,5370 mich noch mîne vürsten
0,5371 ne wolte er niwet vürhten
0,5372 ime dûhte daz er ne dorfte
0,5373 er wânte daz in nieman
0,5374 mit wîge torste bestân
0,5375 daz liez er wole schînen
0,5376 dô gebôt ich den mînen
0,5377 daz si den man viengen
0,5378 dô si zuoze im giengen
0,5379 er ne vorhte noch ne vlôh
0,5380 âne sorge stuont er dô
0,5381 dô hiez ich eine maget gân
0,5382 schiere unde vüre in stân
0,5383 ich wolte schouwen dâr an

0,5384 ob wære dechein man
0,5385 dem di wîbes minne
0,5386 niet ne bræhte ûz dem sinne
0,5387 dô di maget zuoze ime gienc
0,5388 under sîne arme er si gevienc
0,5389 unde îlete vile balde
0,5390 mit ir zuo dem walde
0,5391 des wurden wir vile unvrô
0,5392 zuo den rossen quâmen wir dô
0,5393 uns wart vile harte gâch
0,5394 vaste îleten wir ime nâch
0,5395 dô wir den man bequâmen
0,5396 unde ime di maget nâmen
0,5397 dô gewan er eine stimme
0,5398 di was harte grimme
0,5399 grôz unde vreislich
0,5400 eines lewen stimme gelîch
0,5401 uns quam von ime michel nôt
0,5402 wande er vorhte den tôt
0,5403 dô ime mîn here zuo gienc
0,5404 dô gebôt ich daz man in vienc
0,5405 unde brâhte in gebunden
0,5406 vûre mich an den stunten
0,5407 ich hiez in brennen in ein viur
0,5408 ime wart sîn leben vile sûr
0,5409 unlange er lebete
0,5410 swie sêre er widerstrebete
0,5411 dô huop ich mich dannen
0,5412 mit allen mînen mannen
0,5413 unde quam an einen hôhen berc
0,5414 dâ ûf stuont ein schoene werc
0,5415 ein hêrlîcher palas
0,5416 der von edelem gesteine was
0,5417 alse wir ez an den buochen haben
0,5418 an den palase was ergraben
0,5419 maniger slahte wunder
0,5420 ein schoene wâc vlôz dâr under
0,5421 von dem palase wâren
0,5422 daz sage ich iu ze wâren
0,5423 ketenen gehangen
0,5424 di wâren vile lange
0,5425 gemachet von golde
0,5426 swer ûf den berc wolte
0,5427 der solte sich halten dâr an
0,5428 als ich mich versinnen kan
0,5429 ouch giengen ûf den berc
0,5430 biz an daz hêrlîche werc
0,5431 zwei tûsent grâte

0,5432 di wâren mit râte
0,5433 von saphîre gemachet
0,5434 sus lustsame sache
0,5435 is al der werlt unkunt
0,5436 ûf den berc quam ich gesunt
0,5437 unde besach den palas
0,5438 wie wole der geziert was
0,5439 di venster wâren dâr inne
0,5440 gemeisteret mit sinne
0,5441 di türe unde glockelîn
0,5442 di wâren allez guldîn
0,5443 dâ gesach ich ein betehûs
0,5444 di türe di gienc selbe ûf
0,5445 dô ich dâr in quam
0,5446 grôz wunder ich dâ vernam
0,5447 ein bette sach ich dâr in stân
0,5448 daz was harte lustsam
0,5449 mit golde gezieret
0,5450 mit gesteine wole gewieret
0,5451 alsô verre sô daz bette gienc
0,5452 ein wînrebe iz al umbevienc
0,5453 di was geworht von golde
0,5454 daz di triubelen wesen solten
0,5455 daz was edele gesteine
0,5456 grôz unde kleine
0,5457 ûf den bette ein man lac
0,5458 sô mîn ouge nie ne gesach
0,5459 mêt sô schoenen alten man
0,5460 michel wunder mich nam
0,5461 wer der man wære
0,5462 er lac an dem gebære
0,5463 als er wære vile rîche
0,5464 er lac vile hêrlîche
0,5465 vile süezlîche er slief
0,5466 ich ne sprach noch ne rief
0,5467 dô ich stuont vore sînen bette
0,5468 ich ne wolte in niwet wecken
0,5469 gezogenlîche ich ime neic
0,5470 den hôhen berc ich dô steic
0,5471 vile gemechlîche nider
0,5472 unde quam zuo mînen liuten wider
0,5473 dô ich nider quam ze tale
0,5474 dô vuoren wir rehte drî tage
0,5475 unde quâmen in ein lant
0,5476 daz was Brasiacus genant
0,5477 der küninc von dem lande
0,5478 sîne gâbe mir sande
0,5479 ouch brâhten mir di lantliute

0,5480 rûhe visches hiute
0,5481 zesamene gebunden
0,5482 an den hiuten stuonten
0,5483 schoene lêbarten mâl
0,5484 ouch brâhten si mir daz is wâr
0,5485 vile manige lamprîden hût
0,5486 ich tar iz wole sagen überlût
0,5487 si wâren sehs klâftere lanc
0,5488 der gâbe sagete ich in danc
0,5489 daz lant liez ich mit vride stân
0,5490 dannen huop ich mich sân
0,5491 mit mînem ingesinde
0,5492 der werlt an daz ende
0,5493 dâ der werlt nabe stât
0,5494 unde der himel umbe gât
0,5495 also umbe di ahsen daz rat
0,5496 dô hôrte ich wâ man sprach
0,5497 ouch hôrte iz mîn here
0,5498 kriechische sprâche in dem mere
0,5498a des wunderte uns ûzer mâzen
0,5498b mîn man sich des vermâzen
0,5498c si wolten swimmen in daz mere
0,5499 rehte zweinzic wâren dere
0,5500 wande si wunder habeten
0,5501 wâ di liute woneten
0,5502 di si hôrten dâr inne
0,5503 mit mennischlîcher stimme
0,5504/5 si wolten swimmen ûf einen wert
0,5506 daz wart in starke bewert
0,5507 von den tieren in dem mere
0,5508 daz wunder schouwete mîn here
0,5509 wâ di zweinzic an der stunte
0,5510 sunken an des meres grunt
0,5511 in der gegenôte
0,5512 stuont ein burc guote
0,5513 Meroves hiez di burc rîche
0,5514 unde was vile hêrlîch
0,5515 si was al umbevangen
0,5516 mit einem velse der was lange
0,5517 di liute von dem lande
0,5518 wâren tiure wîgande
0,5519 unde lebeten hêrlîche
0,5520 unde wâren algelîche
0,5521 einer vrouwen undertân
0,5522 di hiez Candacia
0,5523 si was ein kûninginne
0,5524 unde lebete mit sinne
0,5525 zwêne süne hæte si

0,5526 dô hiez ich dâ bî
0,5527 ûf slân mîn gezelt
0,5528 an ein harte schoene velt
0,5529 dô entbôt ich der vrouwen
0,5530 mîn dienest mit allen triuwen
0,5531 unde sande ir zuo dem mâle
0,5532 ein bilede wole gemâlet
0,5533 nâch Amon mînen gote
0,5534 dô brâhte mir wider ire bote
0,5535 vile hêrlîche gâben
0,5536 unde hiez mir vrâgen
0,5537 ob ich wære als ein ander man
0,5538 unde mir wære undertân
0,5539 di werlt alle biz aldâ
0,5540 dô hiez ir sagen jâ
0,5541 von der gâben wil ich iu sagen
0,5542 di siu mir hiez vûre tragen
0,5543 hundert guldîne gote
0,5544 ouch brâhte mir ire bote
0,5545 anderhalp hundert môre
0,5546 di hâten lange ôren
0,5547 unde wâren alle kinder
0,5548 mînen gesinde
0,5549 gap ich si an ire huote
0,5550 ouch sande mir di guote
0,5551 drîzic guote goltvaz
0,5552 niunzic elfande – unde baz
0,5553 si sande mir pantiere
0,5554 sehszic unde mêre
0,5555 unde hundert lêbarte
0,5556 di dâ loufent harte
0,5557 ouch sande mir di kûningîn
0,5558 vûnf hundert vogellîn
0,5559 sitiche unde spingen
0,5560 di sprechent unde singen
0,5561 unde hundert balken vein
0,5562 nie ne wart holz nehein
0,5563 sô guot noch sô tiure
0,5564 iz ne mac in den viure
0,5565 neheine wîs verbrinnen
0,5566 ouch brâhte durch minne
0,5567 der selben kûninginnen bote
0,5568 Amone mînem gote
0,5569 eine krône wole gezieret
0,5570 unde harte wole gewieret
0,5571 mit edelen gesteine
0,5572 grôz unde kleine
0,5573 als iz di vrouwe wolte

0,5574 zehen ketenen von golde
0,5575 wâren dâr ane gehangen
0,5576 dâ mite was bevangen
0,5577 di krône hêrlîche
0,5578 di kûninginne rîche
0,5579 sande mir ouch ein tier
0,5580 daz was edele unde hêr
0,5581 daz den karbunkel treget
0,5582 unde daz sich vûre di maget leget
0,5583 monosceros ist iz genant
0,5584 der ist lûtzeln in diz lant
0,5585 dâr zuo ne vrûmet nehein jaget
0,5586 man sol iz vâhen mit einer maget
0,5587 sîn gehûrne daz ist vreissam
0,5588 dâ ne mac niwet vore bestân
0,5589 unde dô di gâbe was brâht
0,5590 dô was di vrouwe des bedâht
0,5591 daz si zuo mir sande einen man
0,5592 der was alsô getân
0,5593 daz er konde mâlen
0,5594 der mâlete zuo dem mâle
0,5595 an einer tavelen mînen lîp
0,5596 niht ne ist sô listic sô daz wîp
0,5597 unde ouch ire kint
0,5598 des quam ich in grôz angest sint
0,5599 Candaulus der vrouwen alter sun
0,5600 dâhte waz er mohte tuon
0,5601 er nam sîne wîse man
0,5602 dô er rehte vernam
0,5603 daz ich dare komen was
0,5604 dâ volgete er mir an ein gras
0,5605 unde suochte mich an daz velt
0,5606 dô lac ich under mîn gezelt
0,5607 dô er bî mînem here quam
0,5608 unde mîne wartman
0,5609 sîn wurden geware
0,5610 dô huoben si sich dare
0,5611 unde viengen den helt junc
0,5612 unde brâhten in ze stunte
0,5613 dâr Tholomeus lac
0,5614 der vrâgete in unde sprach
0,5615 waz sîn gewerp wære
0,5616 dô sprach der junchêre
0,5617 Candacis is mîn muoter
0,5618 vernim durch dîne gûete
0,5619 mîn herzeleit daz ich dir klagen
0,5620 ich wolte dîne helfe haben
0,5621 ich hân verloren mîn wîp

0,5622 di mir liep was sô der lîp
0,5623 daz is mir ze unheile komen
0,5624 di vrouwe di hât mir genomen
0,5625 ein küninc der is vermezzen
0,5626 unde ist hier bî gesezzen
0,5627 durch trôst bin ich komen zuo dir
0,5628 unde maht dû des gehelfen mir
0,5629 daz ich si wider gewinnen
0,5630 des lône ich dir mit minnen
0,5631 dô Tholomeus mîn man
0,5632 des hêrren klage vernam
0,5633 sô sweic er vile stille
0,5634 unde gienc mit guoten wille
0,5635 rehte under mîn gezelt
0,5636 dâ ich lac an daz velt
0,5637 unde sagete mir wie iz was komen
0,5638 unde waz er hæte vernomen
0,5639 dô rihte ich mich ûf schône
0,5640 unde gap ime mîne krône
0,5641 unde hiez in sân
0,5642 wider in sîn gezelt gân
0,5643 unde mit sinne handeln sîn dinc
0,5644 ich sprach “dirre jungelinc
0,5645 ne mac dîn niht erkennen
0,5646 Alexander salt dû dich nennen
0,5647 unde jihe des neheine wîs
0,5648 daz dû Tholomeus sîs
0,5649 unde heiz mich dir gewinnen
0,5650 Antigonus salt dû mich nennen
0,5651 unde gebiut mir alse dînem manne
0,5652 daz schiere werde widertân
0,5653 daz der hêrre hât geklaget
0,5654 alse wir haben hier gesaget
0,5655 daz tuon wir mit sinne
0,5656 unde heiz mir ime gewinnen
0,5657 schiere widere sîn wîp
0,5658 alsô liep sô mir sî der lîp”
0,5659 di hêrren beide tâten
0,5660 des si wâren berâten
0,5661 Tholomeus di krône entvienc
0,5662 zuo sînem gezelte er gienc
0,5663 in allen den gebære
0,5664 als er Alexander wære
0,5665 nâch Alexandere er sande
0,5666 Antigonus er in nante
0,5667 dô sprach er zuo Candaulô
0,5668 “gehab dich wole unde wis vrô
0,5669 dîn bete wirdet geleistet

0,5670 dû hâs wole vereischet
0,5671 daz ich Alexander bin genant
0,5672 Macedonia is mîn lant
0,5673 dannen bin ich here komen
0,5674 daz maht dû haben wole vernomen
0,5675 Persen ist mir undertân
0,5676 Parthis unde Indiân
0,5677 di stênt an mîner gewalt
0,5678 ich wil mit dir helt balt
0,5679 hinnen senden disen man
0,5680 der dir wole gehelfen kan
0,5681 ich gibe ime heres alsô vile
0,5682 alse er es selbe nemen wile
0,5683 er ist Antigonus genant
0,5684 den vüere in daz selbe lant
0,5685 dâ dîn wîp is inne
0,5686 er veret mit grôzen sinne
0,5687 er gewinnet dir widere dîn wîp
0,5688 oder er verlieset den lîp”
0,5689 dô wænete Candaulus
0,5690 daz mîn man Tholomeus
0,5691 Alexander wære
0,5692 des vröuwete sich der mære
0,5693 dô gewan der helt guot
0,5694 einen vroelîchen muot
0,5695 daz er soliche helfe gewan
0,5696 dô gereitte sich manic man
0,5697 von mînen gesinde
0,5698 dô vuoren wir mit dem kinde
0,5699 dô sagete ich vile stille
0,5700 mînen liuten mînen wille
0,5701 di mich wole erkanten
0,5702 daz si alle nanten
0,5703 mich Tholomeus
0,5704 dô iz geahet was alsus
0,5705 daz verwandelet was mîn name
0,5706 selbe vuorte ich mînen vane
0,5707 mîn volc ich bereitete
0,5708 Candaulus uns leitete
0,5709 ze Bala vüre di veste
0,5710 sô getâner geste
0,5711 wâren si vile ungewone
0,5712 als in dô wâren komen
0,5713 ire stat sluzzen si zuo
0,5714 ze râte giengen dô
0,5715 di heledē vermezzen
0,5716 di dâ wâren besezzen
0,5717 unde sprâchen al besunder

0,5718 si næme michel wunder
0,5719 waz daz here wolte
0,5720 oder waz iz dâr solte
0,5721 der küninc der was ûz gevaren
0,5722 mit einer kreftigen scharen
0,5723 ûf einen sînen genôz
0,5724 dô wart der angest vile grôz
0,5725 di in der stat wâren
0,5726 daz sage ich iu ze wâren
0,5727 dô si in allen sîten
0,5728 daz here gesâhen rîten
0,5729 über di marke
0,5730 dô vorhten si starke
0,5731 daz Porus dannoch lebete
0,5732 unde dâr zuo strebete
0,5733 mit sînes heres kreften
0,5734 in ire muote si dâhten
0,5735 daz er si stoeren solte
0,5736 unde er loesen wolte
0,5737 di vrouwe wande er was ire mâc
0,5738 dâr ich was gevarn nâch
0,5739 nû vernemet rehte waz ich iu sage
0,5740 dâr nâch über drî tage
0,5741 Candaulus mich bat
0,5742 daz wir riten vûre di stat
0,5743 dâ di vrouwe was inne
0,5744 daz tâten wir mit sinne
0,5745 dô wir dar quâmen
0,5746 unde iz jene vernâmen
0,5747 di in der stat wâren
0,5748 si giengen offenbâre
0,5749 an ire zinnen stân
0,5750 unde vrâgeten uns sân
0,5751 von ire brustwere
0,5752 umbe daz unkündige here
0,5753 wannen daz komen wære
0,5754 ouch vrâgeten si mêre
0,5755 waz si uns hæten getân
0,5756 unde ob wir si bestân
0,5757 mit urliuge solten
0,5758 wir sageten daz wir wolten
0,5759 ire stat gare zerbrechen
0,5760 unde an in rechen
0,5761 beide an ire êre unde an ire lîbe
0,5762 daz si Candaulis wîp
0,5763 dâr in hæten gevâhen
0,5764 unde dâr zuo sîne liebe man
0,5765 daz ne würde schiere widertân

0,5766 sô müesten si iemer schaden hân
0,5767 dô di burgære
0,5768 vernâmen diz mære
0,5769 unde als iz in di burc quam
0,5770 michel angest si des nam
0,5771 ûf brâchen si daz palas
0,5772 dâ di juncvrouwe inne was
0,5773 zuo uns sanden si nider
0,5774 unde gâben uns di vrouwe wider
0,5775 dô liezen wir ire stat stân
0,5776 unde vuoren dannen sân
0,5777 mit hêrren Candaulô
0,5778 dem was sîn herze vile vrô
0,5779 der sprach offenbære
0,5780 daz ich des gewis wære
0,5781 wolte ich mit ime heim komen
0,5782 ich gewünne es michelen vromen
0,5783 von im unde von sîner muoter
0,5784 er weste si in den güeten
0,5785 si solte mir mîner arbeit
0,5786 mit liebe lônên âne leit
0,5787 dô entbôt ich Tholomeô
0,5788 daz ich mit Candaulô
0,5789 wolte heim ze lande
0,5790 durch daz ich erkante
0,5791 unde mit listen ervûnte
0,5792 wie iz dâ ze lande stüente
0,5793 unde ouch daz ich ersæhe
0,5794 welicher site man dâ pflæge
0,5795 dô wir dannen solten rîten
0,5796 des weges in beiden sîten
0,5797 di hôhesten berge ich gesach
0,5798 mit wârheit ich daz sagen mac
0,5799 dâr ie dechein man
0,5800 in diser werelt zuo quam
0,5801 unde di hier an der erden
0,5802 ie mohten geworden
0,5803 dô vrâgete ich mit listen
0,5804 di liute di ez wole wisten
0,5805 waz ûf den bergen wære
0,5806 di sageten offenbære
0,5807 dâr ûf wâren besunder
0,5808 manicvalte wunder
0,5809 tier di wâren eislich
0,5810 unde wûrme vile vreislich
0,5811 ich sach dâ lange boume
0,5812 des nam ich alles goume
0,5813 daz obez daz dâr ûf wuohs

0,5814 daz was sô unmâzlîchen grôz
0,5815 daz ich es niet ne tar sagen
0,5816 ir möhtet es iuweren spot haben
0,5817 wande iz diuhte iu ungeloubelich
0,5818 wîntriubelen di sach ich
0,5819 von den mac ich iu sagen
0,5820 di ne mohte ein man niht getragen
0,5821 ouch sach ich dâ nûzze
0,5822 grôz unde niwet lützel
0,5823 grôzer si wâren
0,5824 danne pfedemen ze wâren
0,5825 ouch sach ich dâ trachen
0,5826 unde andere manige sachen
0,5827 unde manige grôze slange
0,5828 grôze unde lange
0,5829 ûf den boumen sâzen affen
0,5830 unde wilde merekatzen
0,5831 unde vreislich gevügele
0,5832 daz hæte dâ sîn gesidele
0,5833 vernemet noch mêr waz ich iu sage
0,5834 dô wir gevuoren vûnf tage
0,5835 dô sâgen wir vore uns stân
0,5836 ein burc di was wole getân
0,5837 dâr ûf stuont ein palas
0,5838 dâ Candacis inne was
0,5839 di pflac grôzer güete
0,5840 di was Candaulis muoter
0,5841 dô si hæte vernomen
0,5842 daz ire sun was wider komen
0,5843 unde sîn wîp brâhte
0,5844 vile liebe si sich gedâhte
0,5845 engagen uns si dô gienc
0,5846 mit grôzen êren si uns entvienc
0,5847 ûf ire houbete si truoc
0,5848 eine krône von golde sô guot
0,5849 daz nie nehein man
0,5850 neheine bezzere gewan
0,5851 si selbe was harte lustsam
0,5852 von rehtem prîse wole getân
0,5853 si ne was ze kurz noch ze lanc
0,5854 mir was in mînen gedanke
0,5855 alsô wole ze muote
0,5856 als ich mîne muoter
0,5857 gesæhe vore anderen wîben
0,5858 alsô wole was mînem lîbe
0,5859 die edele kûninginne
0,5860 vrâgete dô mit sinne
0,5861 umbe den man iren sune

0,5862 di mit ime was komen
0,5863 wande si gerne vernæme
0,5864 von welichen lande er quæme
0,5865 unde waz sîn gewerp wære
0,5866 Candaulus der mære
0,5867 antwurte sîner muoter sus
0,5868 “der hêrre heizet Antigonus
0,5869 unde is geboren von Kriechlante
0,5870 den hæte mit mir gesant
0,5871 der rîche Alexander
0,5872 here zuo unsen lande
0,5873 zuo dînem hûse nie ne quam
0,5874 sô rehte biderbe ein man
0,5875 von rehte muoz ich in loben
0,5876 wande er is harte wole gezogen
0,5877 unde hât einen kiuschen lîp
0,5878 er gewan mir widere mîn wîp
0,5879 diz habe in dînen sinnen
0,5880 unde danke es ime mit minnen
0,5881 unde mit gûeten
0,5882 Candacis trûtmuoter”
0,5883 dô entvienc mich mit minnen
0,5884 di edele kûninginne
0,5885 unde kuste mich an mînen munt
0,5886 unde leitte mich ze stunte
0,5887 in ein schoene palas
0,5888 daz von onichinô geleget was
0,5889 di siulen wâren reine
0,5890 von edelem gesteine
0,5891 daz dach daz was guldîn
0,5892 manic wunder stuont dâr in
0,5893 di spanbette wâren
0,5894 daz sage ich iu ze wâren
0,5895 von geliuterten golde
0,5896 als iz di vrouwe wolte
0,5897 dâr ûfe lâgen bettewât
0,5898 von rôtem golde wole genât
0,5899 di tavele dâ si zuo saz
0,5900 sô si geswæslîchen az
0,5901 di was von elfenbeine
0,5902 gezieret mit gesteine
0,5903 di benke wâren rôt golt
0,5904 noch mêr ir vernemen sulet
0,5905 der palas was hêre
0,5906 geziert mit manigen êren
0,5907 obene di swibogen
0,5908 wâren mit golde überzogen
0,5909 di manicvalten wunder

0,5910 di obene unde under
0,5911 dâr ane stuonten ergraben
0,5912 di ne mac iu nieman gesagen
0,5913 ein wâc ouch dâr under vlôz
0,5914 der was mæzlîchen grôz
0,5915 orpimentô gelîch
0,5916 nâch dem golde verwete er sich
0,5917 dâ was michel wûinne
0,5918 swenne sô di sunne
0,5919 obene an den palas schein
0,5920 sô schein daz golt al eine
0,5921 unde der wâc dâr under
0,5922 daz dûhte mir grôz wunder
0,5923 dô ich ez rehte besach
0,5924 vûre wâr ich daz sagen mac
0,5925 dâ was liutes ein michel maht
0,5926 dô machete eine wirtschafft
0,5927 di rîche kûninginne
0,5928 mit grôzeme sinne
0,5929 iren lieben kinden
0,5930 unde iren ingesinden
0,5931 ze êrest unde ze lezzeste
0,5932 hiez si irere geste
0,5933 vile harte vlîzlîchen pflegen
0,5934 unde hiez uns genuoc geben
0,5935 alles des wir wolten
0,5936 unde des wir haben solten
0,5937 beide ich unde mîne man
0,5938 siu selbe unser ware nam
0,5939 der edelen kûninginnen sal
0,5940 der was als ich iu sagen sal
0,5941 dâr si ze muose inne gienc
0,5942 sô si liebe geste entvienc
0,5943 hêrlich unde reine
0,5944 gezieret mit gesteine
0,5945 nidene unde ouch obene
0,5946 was er wole ze lobenne
0,5947 dâ di vrouwe ze tavelen saz
0,5948 alse si tranc unde az
0,5949 dâ hienc ein tiure umbehanc
0,5950 der was breit unde lanc
0,5951 von edelen golde durchslagen
0,5952 mit sîden wâren dâr in getragen
0,5953 vogeles unde tiere
0,5954 mit manicvalten ziere
0,5955 unde mit – maniger slahte varwe
0,5956 daz merkete ich allez garwe
0,5957 man mohte dâr an schouwen

0,5958 rîtar unde vrouwen
0,5959 obene unde nidene
0,5960 mit wunderlîchen bilede
0,5961 zuo den enden unde an den orten
0,5962 wâren tiure borten
0,5963 unde elfenbeinîne krapfen
0,5964 di hangeten an den ricken
0,5965 alse man zôch den umbehanc
0,5966 manic goltschelle dâr an erklanc
0,5967 der umbehanc was hêrlich
0,5968 ime ne wart nie nehein gelîch
0,5969 den meisterte Candacis
0,5970 wande si was listic unde wîs
0,5971 di rîche küniginne
0,5972 mit iren tiefen sinne
0,5973 ouch sach ich dâ ze stunten
0,5974 daz vore ire tavele stuonten
0,5975 zwei edele kerzestallen
0,5976 von lûteren kristallen
0,5977 dâ was gesazt inne
0,5978 manic schoene gimme
0,5979 obene stuonten ouch dâr an
0,5980 daz schouwete dâ manic man
0,5981 zwei liehte karbunkel
0,5982 di naht ne was nie sô tunkel
0,5983 si liuhten sô di sterren
0,5984 nâch unde verre
0,5985 unde sô daz man in den sal
0,5986 wole gesach überal
0,5987 in allen enden
0,5988 alse dâ vackelen brenten
0,5989 sus hêrlîche
0,5990 was di vrouwe rîche
0,5991 alle zît berâten
0,5992 in ire kemenâte
0,5993 was genâde unde heil
0,5994 dâ ne gebrast nehein teil
0,5995 des dâ wesen solte
0,5996 unde des man haben wolte
0,5997 ouch wil iu sagen mêre
0,5998 von der küniginnen hêre
0,5999 wie ire spil was getân
0,6000 sô si ze muose solte gân
0,6001 mitten in ire palase
0,6002 ein schoene tier geworht was
0,6003 daz was allez golt rôt
0,6004 alse si ez selbe gebôt
0,6005 daz tier was vile hêrlich

0,6006 eineme hirze gelîch
0,6007 an sîn houbet vorne
0,6008 hatte iz tûsent horne
0,6009 ûf aller horne gelîch
0,6010 stuont ein vogel hêrlich
0,6011 ûf dem tiere saz ein man
0,6012 schoene unde wole getân
0,6013 der vuorte zwêne hunde
0,6014 unde ein horn ze sînem munde
0,6015 nidene an dem gewelbe
0,6016 lâgen viere unde zweinzic blâsebelge
0,6017 ze aller belge gelîche
0,6018 giengen zwelif man kreftic
0,6019 sô si di belge drungen
0,6020 di vogeles schône sungē
0,6021 an deme tiere vorn
0,6022 sô blies ouch der man sîn horn
0,6023 sô galpeten ouch di hunde
0,6024 ouch lûtete an der stunten
0,6025 daz hêrlîche tier
0,6026 mit der stimmen als ein pantier
0,6027 dem gêt under stunte
0,6028 ein âtem ûz dem munde
0,6029 sûezer denne wîrouch
0,6030 der vrouwen dienest werte ouch
0,6031 von prîme biz ze nône
0,6032 sô di vrouwe schoene
0,6033 Candacis ze muose gienc
0,6034 sô stuonten dâr an einen rinc
0,6035 tûsent jungelinge
0,6036 von iren ingesinde
0,6037 di pflâgen hêvischheite vile
0,6038 mit aller slahte seitspile
0,6039 unde vûnf hundert junchêren
0,6040 di mit allen êren
0,6041 des hoves wole pflâgen
0,6042 unde wazzer gâben
0,6043 unde di dâ ware nâmen
0,6044 der geste di dâ quâmen
0,6045 ouch mohte man dâ schouwen
0,6046 vûnf hundert juncvrouwen
0,6047 wole gewahsen unde smal
0,6048 unde ritterlich überal
0,6049 schoene under den ougen
0,6050 mit guldînen bougen
0,6051 di truogen an ire lîp
0,6052 manigen schoenen samît
0,6053 beide grüne unde rôt

0,6054 als iz di vrouwe gebôt
0,6055 alse di harpfen klungen
0,6056 di juncvrouwen sungen
0,6057 unde tanzeten unde trâten
0,6058 hei wie wole daz tâten
0,6059 dô si es begunden
0,6060 wande si ez wole kunden
0,6061 unde alse di vrouwe lustsam
0,6062 über hov solte gân
0,6063 vüre si giengen getwerge
0,6064 zuo der herberge
0,6065 di wâren alle wole gezogen
0,6066 daz merket vüre ungelogen
0,6067 di truogen pfellîne wât
0,6068 di was mit golde wole genât
0,6069 si truogen grâ unde bunt
0,6070 mir ne wart nie mêr kunt
0,6071 nehein vrouwe sô lustsam
0,6072 unde alse rehte wole getân
0,6073 si was vore allen wîben
0,6074 an vrûmicheit unde an ire lîbe
0,6075 vore allen vrouwen ûzerkoren
0,6076 si gienc in allen bevorn
0,6077 di in den gezîten
0,6078 in der werlt wâren wîten
0,6079 des næhesten morgenes vruo
0,6080 di vrouwe leitte mich dô
0,6081 in eine andere kemenâten
0,6082 di di geworht hâten
0,6083 di wâren listige man
0,6084 dâ stuonten rôte steine an
0,6085 di liuhten sô di sterren
0,6086 nâch unde verre
0,6087 des nahtes was dâr inne tac
0,6088 unde von liehte michel gemach
0,6089 dô leitte mich di kûningîn
0,6090 di dritte kemenâten in
0,6091 di was vile hêrsam
0,6092 mit uns ne gienc nieman
0,6093 wan wir einigen zwei
0,6094 von edelem holze aspindei
0,6095 was daz gewerke
0,6096 daz solet ir rehte merken
0,6097 daz holz daz is tiure
0,6098 iz ne mac in den viure
0,6099 neheine wîs verbrinnen
0,6100 dô leitte si mich dannen
0,6101 in eine kemenâten hôh

0,6102 di was gemachet alsô
0,6103 von starken balken veinen
0,6104 grôzen unde niwet kleinen
0,6105 di meisterte di vrouwe
0,6106 man mohte dâr ane schouwen
0,6107 manige list besunder
0,6108 dâ wâren gesazt under
0,6109 starker redere viere
0,6110 starker elfentiere
0,6111 sehs unde drîzic
0,6112 daz was vile hêrlich
0,6113 zugen di kemenâten
0,6114 diz hatte al berâten
0,6115 di wîse küniginne
0,6116 ich dâhte in mînem sinne
0,6117 dô ich diz allez besach
0,6118 dô huop ich an unde sprach
0,6119 “wolte got der guote
0,6120 hæte ich unde mîn muoter
0,6121 dise kemenâten
0,6122 alsus wole berâten
0,6123 mit disen elfanden
0,6124 heim ze Kriechlante”
0,6125 zehant dô ich alsus sprach
0,6126 di künigin mich ane sach
0,6127 unde sprach “Alexander
0,6128 daz wære ein michel wunder
0,6129 hætes dû alsus lîhte
0,6130 mir nû mîn gestifte
0,6131 mit dînen worten benomen
0,6132 unde wær iz ze Kriechen komen
0,6133 mit sus sanfter arbeit
0,6134 wænes dû iz ne wære mir leit”
0,6135 vile harte ich underquam
0,6136 dô ich der vrouwen wort vernam
0,6137 unde ich gehôrte mînen namen
0,6138 dô begunde ich vûrhten unde schamen
0,6139 sich verwandelede garwe
0,6140 mîn sin unde mîn varwe
0,6141 dô sprach si “Alexander
0,6142 nimet dich des wunder
0,6143 daz ich dich hier nenne
0,6144 vile wole ich dich erkenne
0,6145 daz salt dû noch beschouwen”
0,6146 dô leitte mich di vrouwe
0,6147 in eine kemenâte
0,6148 dâ si behalten hâte
0,6149 ein bilede nâch mir getân

0,6150 dannen abe ich iu gesaget hân
0,6151 vile leide ich mir gedâhte
0,6152 dô di vrouwe brâhte
0,6153 daz bilede ze liehte
0,6154 unde ze mînem anesihte
0,6155 daz hatte in iren handen
0,6156 si sprach “Alexander
0,6157 nû dû dîn bilede hâst gesehen
0,6158 nû muost dû mir von rehte jehen
0,6159 daz ich dich wole erkenne
0,6160 wande ich dich rehte nenne
0,6161 ich weiz wole wer dû bist
0,6162 dich ne hilfet neheine dîne list
0,6163 di dû kanst helet balt
0,6164 dû ne stês an mîner gewalt
0,6165 waz hilfet dir nû dîn kraft
0,6166 unde daz dû sigehaft
0,6167 über manic lant wære
0,6168 Persiam di mære
0,6169 hâst dû zerstoeret
0,6170 unde Indiam zervüeret
0,6171 Partos überwunden
0,6172 nû hât dich betwungen
0,6173 âne vehten ein wîp
0,6174 waz hilfet dir nû manic strît
0,6175 den dû lange hâs getân
0,6176 nû maht dû rehte wole verstân
0,6177 daz nû nieman ne lebet
0,6178 swenne er sich ze hôch verhebet
0,6179 swie ime di sælden volgen
0,6180 werdent si ime verbolgen
0,6181 si ne kêre zornlîche wider
0,6182 unde wirfet den rîchen dâr nider
0,6183 alsô schiere sô den armen
0,6184 des muoz ich dich warnen
0,6185 ouch hâst dû ez selbe wole gesehen
0,6186 wilt dû der wârheite jehen”
0,6187 mîn zorn mich dâr zuo twanc
0,6188 daz ich mich kârte zuo der want
0,6189 von der kûninginnen
0,6190 dô wart si wole innen
0,6191 mîner ungebære
0,6192 unde vrâgete waz mir wære
0,6193 ich sprach mir wære vile zorn
0,6194 daz ich hette verloren
0,6195 beide witze unde sin
0,6196 “daz ich nû sus vertoeret bin
0,6197 daz ist mir vile unwert

0,6198 ich hæte gerne mîn swert
0,6199 ich wolte dich ze tôde slân
0,6200 sê wie torstes dû mich vâhen
0,6201 sol ich aber hin komen
0,6202 unde wirdet iz danne vernomen
0,6203 dâ heime ze mînem lande
0,6204 sô habe ich es iemer schande
0,6205 daz mich betwungen hât ein wîp
0,6206 wâr zuo sol mir nû der lîp
0,6207 er is mir unmære”
0,6208 dô sprach di vrouwe hêre
0,6209 “ne zûrne niuwet helt guot
0,6210 unde habe manlîchen muot
0,6211 ich bin an dir inne
0,6212 worden grôzer sinne
0,6213 unde grôzer wîsheit
0,6214 ne lâ dir niwet wesen leit
0,6215 daz ich dich alsus hân ervarn
0,6216 dir ne schadet neheiner muoter barn
0,6217 dû ne salt den vrouwen
0,6218 neheine wîs drôuwen
0,6219 noch slân noch schelten
0,6220 ich ne wil dich niwet melden
0,6221 gehabe dich wole unde wis vrô
0,6222 dû hâs Candaulô
0,6223 wider gewonnen sîn wîp
0,6224 daz beheltet dir den lîp
0,6225 erkanten dich di liute
0,6226 dich ne ernerte hiute
0,6227 von dem tôde nehein man
0,6228 wande dir ist vile gram
0,6229 Caracter mîn junger sun
0,6230 wande dû erslüege Porum
0,6231 den vater sînes wîbes
0,6232 dû ne darft dînes lîbes
0,6233 rehte neheine sorge haben
0,6234 dir ne mac nieman hier geschaden”
0,6235 dô leitte siu mich vürebaz
0,6236 dâ ire slâfgadem was
0,6237 dâr inne hienc ein umbehanc
0,6238 der was breit unde lanc
0,6239 dô sich der umbehanc entlouch
0,6240 dô quam dâr ûz der bezziste rouch
0,6241 den ie dechein man
0,6242 umbe ein bette vernam
0,6243 ire bette stuont hêrlîche
0,6244 di kûninginne rîche
0,6245 bescheinte mir ire wille

0,6246 dô minnete ich si stille
0,6247 si sprach dô ich si gewan
0,6248 ze wîbe ich wære ire man
0,6249 daz ich mîn trûren lieze stân
0,6250 mir ne würde arges niwet getân
0,6251 dô bat mich di vrouwe guot
0,6252 daz ich getrôste iren muot
0,6253 unde schiere wider quæme
0,6254 unde ich ir benæme
0,6255 den vreislîchen smerzen
0,6256 den si an ire herzen
0,6257 durch mich lîden solte
0,6258 dô sprach ich daz ich wolte
0,6259 vile schiere zuo ir komen wider
0,6260 dô giengen wir nider
0,6261 dâ ire sûnen wâren
0,6262 dâ sprach si offenbâre
0,6263 zuo den junchêrren
0,6264 “mit wie getânen êren
0,6265 wir disen wîgande
0,6266 gelônen âne schande
0,6267 dem boten des kûninges
0,6268 wære hier iht soliches
0,6269 des er nemen wolte
0,6270 vile gerne man ez ime solte
0,6271 geben unde in lâzen
0,6272 varen sîne strâze”
0,6273 des antwurte der jungelinc
0,6274 Character der vrouwen junger kint
0,6275 “ich wil ime eine gâbe geben
0,6276 di ime hiute gêt an daz leben
0,6277 mit mînem swerte einen slac
0,6278 den er verwinnen niet ne mac
0,6279 Alexandrô ze leiden
0,6280 wande er sluoc mînen eidem
0,6281 des bin ich iemer unvrô”
0,6282 sus antwurte ime dô
0,6283 Candaulus unde sprach
0,6284 “swer ime hier tuot decheinen slac
0,6285 mir ne breste daz swert
0,6286 er wirdet eines grôzeren gewert
0,6287 von mînes selbes handen
0,6288 wande er rach mînen anden
0,6289 unde gewan mir widere mîn wîp
0,6290 ich wil ime hiute sînen lîp
0,6291 gesunt alhier behalten
0,6292 sol es gelücke walten”
0,6293 Character zuo sînem bruoder sprach

0,6294 “mir is vile harte ungemach
0,6295 daz dû den wilt vore stân
0,6296 des hêrre mir hât getân
0,6297 harte vile ze leide
0,6298 er sluoc mir mînen eidem
0,6299 dâr umbe wil ich hiute geben
0,6300 mîn lîp umbe sînen leben
0,6301 oder kiesen mit ime den tôt
0,6302 wande ich stuont in grôzer nôt
0,6303 vore sînem hêrren Alexanderen
0,6304 daz wirdet ime nû ze schanden”
0,6305 dô wart mir vile leide
0,6306 di junchêrren beide
0,6307 griffen zuo den schilden
0,6308 dô sprach di vrouwe milte
0,6309 Candacis di kûninginne
0,6310 mit michelen sinne
0,6311 zuo mir verholenlîche
0,6312 Alexander helt rîche
0,6313 dû salt durch den willen mîn
0,6314 hiute lâzen werden schîn
0,6315 ob dû bist alsô wîs
0,6316 alse man saget daz dû sîs
0,6317 sô scheit mit listen disen strît
0,6318 in der selber zît
0,6319 sprach ich zuo den junchêrren
0,6320 “des hettet ir lûtzel êre
0,6321 slûeget ir einen ellenden man
0,6322 ouch wær iz übele getân
0,6323 iz ne was nie reht
0,6324 daz sicheineme knehte
0,6325 oder sicheineme boten
0,6326 dechein hêrre missebûte
0,6327 iz ne wære des wert
0,6328 daz ieman sîn swert
0,6329 über mich hier erzûge
0,6330 ich bin mînes hêrren herzoge
0,6331 er hiez mich vûeren sînen vanen
0,6332 hæte ich iu gedienet wole dâr ane
0,6333 des wære mir nû nôt
0,6334 ich lige noch ungerne tôt
0,6335 lâzent mir den leben hân
0,6336 daz ist iu bezzer getân
0,6337 sô wil ich iu sweren daz
0,6338 daz ir es getrûwet deste baz
0,6339 ich bringe iu Alexanderen
0,6340 unde mit ime niemanne anderen
0,6341 vile schiere an iuwere gewalt

0,6342 unde lâzet ir danne den helt balt
0,6343 genesen sô tuot ir wole
0,6344 den tôt ich noch ungerne dole”
0,6345 dô sprach di vrouwe rîche
0,6346 zuo iren kinden lieplîche
0,6347 “ir ne sulet niwet schaden
0,6348 mînem gaste den ich haben
0,6349 er ist ein unschuldic man
0,6350 iu hât leide getân
0,6351 sîn hêrre Alexander
0,6352 der veret hier in dem lande
0,6353 sendet disen hêrren
0,6354 wider mit iuweren êren
0,6355 woltet ir an einen gaste
0,6356 tuon iuwer laster
0,6357 des würde after lande
0,6358 gebreitet iuwer schande”
0,6359 sus behielt ich den lîp
0,6360 daz vile listige wîp
0,6361 ne sagete niemanne daz
0,6362 daz ich Alexander was
0,6363 nâch dise sûeze wort
0,6364 wart garwe zerstôrt
0,6365 unser aller vîantschaft
0,6366 unde wart ein stæte vriuntschaft
0,6367 zuo mir von den hêrren
0,6368 unde gâben mir mit êren
0,6369 hêrlîche gâbe
0,6370 golt âne wâge
0,6371 unde einen halsberc guot
0,6372 des wart gevrôuwet mîn muot
0,6373 wande er was maniger marke wert
0,6374 den ne mohte spere noch swert
0,6375 durchsnîden noch durchstechen
0,6376 noch nieren durchbrechen
0,6377 noch der wâfene nehein
0,6378 daz di sunne ie beschein
0,6379 si gâben mir nochdan
0,6380 eine gâbe vile hêrsam
0,6381 di was mir wole ze danke
0,6382 einen sô guoten mandel
0,6383 daz nie nehein man
0,6384 neheinen bezzeren gewan
0,6385 ouch gap mir ze minnen
0,6386 di liebe kûninginne
0,6387 eine guote krône
0,6388 di was vile schoene
0,6389 von einem adamande hart

0,6390 mit allen vlîze gewarht
0,6391 si sprach si wære mir reht
0,6392 wande ich wære ein guot kneht
0,6393 lîbes unde guotes
0,6394 unde eines harten muotes
0,6395 dô leitte mich mit sinne
0,6396 di rîche küniginne
0,6397 heimelîche in ire behalt
0,6398 in eine kruft di was alt
0,6399 gerne gienc ich mit ir
0,6400 dô sagete si mir
0,6401 wie dâ gote sâzen
0,6402 zuo iren tische unde âzen
0,6403 dô ich dô dâr in quam
0,6404 di wârheit ich dâ vernam
0,6405 dâ vant ich gote manige
0,6406 di sâzen dâ zesamene
0,6407 al ne müget ir es niet gelouben
0,6408 in liuhten di ougen
0,6409 alse brinnente liehtvaz
0,6410 harte ervorhte ich mich daz
0,6411 ein der gote der gruoze mich
0,6412 der sprach “ganc here unde sich
0,6413 wilt dû beschouwen wunder
0,6414 sô ganc her vürder under”
0,6415 dô ich dâr under in quam
0,6416 grôz wunder ich dâr vernam
0,6417 ein genibele was dâ vile grôz
0,6418 vile starke mich des verdrôz
0,6419 ouch liuhten dâ sterren
0,6420 nâch unde verre
0,6421 dâ sach ich einen grôzen man
0,6422 der was alse ein got getân
0,6423 sîn gesidele was hêrlich
0,6424 der redete vile wider mich
0,6425 der got alsus ze mir sprach
0,6426 “dô ich dich allerlezzest sach
0,6427 ze Libien des ne ist niht lanc
0,6428 nû habe michelen danc
0,6429 daz dû ze mir bist komen”
0,6430 ich sprach “des næme ich gerne vromen
0,6431 ob dû mir sagen woltes
0,6432 wie lange ich leben solte
0,6433 wiste ich wêrlîche daz
0,6434 mir wære lange desten baz
0,6435 beide naht unde tac
0,6436 sô stürbe ich ouch âne ungemach”
0,6437 dô antwurte mir der got

0,6438 unde sprach ich sage dir âne spot
0,6439 daz nehein erdische man
0,6440 sînen tût wîzen ne kan
0,6441 wande iz ne wære ime niwet guot
0,6442 er ne wûrde niemer wole gemuot
0,6443 iz ne quæme ime niwet rehte
0,6444 swanne er dâr ane dæhte
0,6445 ime ne wære niwet deste baz
0,6446 wane als er stûrbe al den tac
0,6447 wente ich sage dir ein dinc
0,6448 daz salt dû wîzen jungelinc
0,6449 eine stat hât dû gebûwet
0,6450 di hât dû wole verniuwet
0,6451 di heizet Alexandria
0,6452 man sol dich noch begraben dâ
0,6453 niwet mêr ne sprach er mir zuo
0,6454 wider ûz gienc ich dô
0,6455 zuo den junchêren
0,6456 di liezen mich mit êren
0,6457 ouch schiet ich mit minnen
0,6458 von der kûninginnen
0,6459 di kuste ich an iren munt
0,6460 unde hiez si belîben gesunt
0,6461 unde quam zuo mînen mannen
0,6462 dâ wart ich wole entvagen
0,6463 vile wole si mîn pflâgen
0,6464 wande si mich gerne sâgen
0,6465 dannen vuoren wir dô
0,6466 durch berge di wâren hôh
0,6467 unde sluogen unse gezelt
0,6468 ûf an ein breit velt
0,6469 unde hiez brieve schrîben
0,6470 zuo den urlîuges wîben
0,6471 di sîn Amazones genant
0,6472 Amazonia hiez ire lant
0,6473 ich entbôt ire kûninginnen
0,6474 mîne holde minne
0,6475 in mînen brieve
0,6476 unde harte vile ze liebe
0,6477 unde hiez daz si mir sande
0,6478 den zins von iren lande
0,6479 dô mîn bote dar quam
0,6480 unde si von ime den brieve genam
0,6481 unde si rehte gelas
0,6482 daz dâr in geschriben was
0,6483 dô antwurte ime mit sinne
0,6484 der vrouwen kûninginne
0,6485 waz wil der mære wîgant

0,6486 here in unser megede lant
0,6487 mit alsô kreftigem here
0,6488 beginnen wir ime di rîche weren
0,6489 unde erslehet er uns danne alle samen
0,6490 des mac er iemer sich geschamen
0,6491 wande er hât es lützel êre
0,6492 ouch sage ich dir mêre
0,6493 man wendet iz ime ze schanden
0,6494 hier unde in allen landen
0,6495 daz er mit sînen knehten
0,6496 wider megede wolte vehten
0,6497 gibet uns aber got daz heil
0,6498 daz wir daz bezzere teil
0,6499 gewinnen inne den strîte
0,6500 des sal er denken enzît
0,6501 unde wirdet er danne sigelôs
0,6502 sô ist er iemer êrenlôs
0,6503 under sînen genôzen
0,6504 kleinen unde grôzen
0,6505 wil er vridelîche
0,6506 komen in unse rîche
0,6507 wir dienen ime mit êren
0,6508 diz sage dîneme hêrren
0,6509 mit sus getânen urbote
0,6510 quam wider zuo mir mîn bote
0,6511 engagen mir dô sande
0,6512 di vrouwe von dem lande
0,6513 megede driu tûsent
0,6514 di truogen pfellîn gewant
0,6515 daz was ein hêrlich schare
0,6516 vûre mir quâmen si gare
0,6517 vile gezogenlîche
0,6518 unde nigen mir algelîche
0,6519 mit magetlîchen sinnen
0,6520 dô entvienc ich si mit minnen
0,6521 dô sprach der vrouwen eine
0,6522 di was ein maget reine
0,6523 “heil sî dir küninc hêr
0,6524 beide nû unde iemer mêr
0,6525 dir entbiutet unse vrouwe
0,6526 âne valsch mit rehter triuwe
0,6527 ire dienst unde allez lieb
0,6528 si hât gesant dir einen brief
0,6529 unde hêrlîche lînwât
0,6530 pfellel unde zindât”
0,6531 dô dankete ich der vrouwen
0,6532 der minnen unde der triuwen
0,6533 unde der grôzen liebe

0,6534 dô greif ich zuo dem brieve
0,6535 selbe ich dâr inne las
0,6536 daz dâr an geschriben was
0,6537 wie sich di vrouwen trageten
0,6538 unde sich bewaret habeten
0,6539 vüre andere wîgande
0,6540 di bî iren lande
0,6541 wâren gesezzen
0,6542 rîche unde vermezzen
0,6543 “swie gewaltic si wâren
0,6544 si bewarten wole ze wâren
0,6545 daz si ie roup oder brant
0,6546 gestiften in unse lant
0,6547 sint daz Cyrus erstarp
0,6548 der ouch mit urlouge warp
0,6549 der quam ze einen stunten
0,6550 mit grôzer samenungen
0,6551 gevaren in unse marke
0,6552 unde urlougete uns starke
0,6553 des verlôs er den lîp
0,6554 den sluoc ein urlouges wîp
0,6555 geheizen Cassandra
0,6556 di was in unsem lande dâ
0,6557 kûningîn unde vrouwe
0,6558 daz sagen wir dir in triuwen”
0,6559 dô ich den brieve dô gelas
0,6560 als er mir geschriben was
0,6561 unde ich ouch hâte gehôrt
0,6562 dirre schoenen juncvrouwen wort
0,6563 dô trôste ich di magedîn
0,6564 ich sprach “ir sulet gewis sîn
0,6565 wande ir ez wole sulet ervaren
0,6566 daz ich here bin gevarn
0,6567 daz ne sal iu vrouwen komen
0,6568 ze neheinen unvrûmen
0,6569 ich tet iz durch di schulde
0,6570 daz ich ervaren wolte
0,6571 di manicvalten wunder
0,6572 di mir dicke besunder
0,6573 von iu wâren gesaget
0,6574 sage dîner vrouwen maget
0,6575 daz si mit genâden sî
0,6576 unde von allen sorgen vrî
0,6577 ich bin ire stâtige vriunt
0,6578 sage ir daz siu sî gesunt”
0,6579 di vrouwen kuste er an iren munt
0,6580 dô huoben si sich an der stunte
0,6581 unde vuoren heim ze lande

0,6582 mîne wîgande
0,6583 di wurden inniclichen vrô
0,6584 dannen vuoren wir dô
0,6585 sint ervuor ich manic lant
0,6586 manic wunder ich ervant
0,6587 daz ich sach unde vernam
0,6588 vile dicke mir ouch missequam
0,6589 hier endet sich der brief
0,6590 dâr ane leit unde liep
0,6591 Alexander schreip
0,6592 di er in vremeden landen leit
0,6593 unde den er heim sande
0,6594 sîner muoter ze lande
0,6595 der vrouwen Olympiadi
0,6596 unde sînem meistere Aristotelî
0,6597 sint ervuor er genuoc
0,6598 beide velt unde bruoch
0,6599 unde lant unde walt
0,6600 ouch ervuor sint der helt balt
0,6601 ze steten unde bûrgen
0,6602 mit vrôuweden unde mit sorgen
0,6603 sint muoste er entwîchen
0,6604 den armen unde den rîchen
0,6605 des wart sîn gewalt
0,6606 vile verre gezalt
0,6607 in allen ertrîche
0,6608 über manigen küninc rîche
0,6609 di in alle êreten
0,6610 unde sînen lop mêreten
0,6611 unde ime zins sanden
0,6612 alle von iren landen
0,6613 des ne dûhte ime alles niht genuoc
0,6614 sîn hôchmuot in dâr zuo truoc
0,6615 daz er sich hiez wîsen
0,6616 gegen dem paradîse
0,6617 daz wolte er betwingen
0,6618 unde zins ouch dannen bringen
0,6619 von den engelischen koeren
0,6620 hier müget ir tumpheit hoeren
0,6621 wie er des begunde
0,6622 an der selben stunte
0,6623 vrâgete er sîne holden
0,6624 waz si ime râten wolten
0,6625 wie er dâr zuo solte komen
0,6626 daz er daz mohte gevromen
0,6627 daz er mit here quæme dare
0,6628 dâ er di engelische schare
0,6629 mohte betwingen

0,6630 unde ime undertænic bringen
0,6631 dô sprâchen sîne vürsten
0,6632 di ez getuon torsten
0,6633 wande si wîs wâren
0,6634 si rieten im offenbâre
0,6635 daz er sich vile rehte
0,6636 hier umbe bedæhte
0,6637 unde mit genâden lebete
0,6638 unde wider gote niht ne strebete
0,6639 sô tæte er wîslîche
0,6640 dô sprâchen algelîche
0,6641 di tumben jungelinge
0,6642 zuo disem tegedinge
0,6643 “küninc Alexander
0,6644 wir râten dir ein ander
0,6645 dû salt gedenken helt balt
0,6646 dise liute di sîn alt
0,6647 unde unlustic unde laz
0,6648 di dir haben gerâten daz
0,6649 daz dû hier belîbes
0,6650 si vürhten des lîbes
0,6651 heiz dich hêrre wîsen
0,6652 zuo den paradîse
0,6653 daz salt dû betwingen
0,6654 mit dînen jungelingen
0,6655 dâr solen wir dir helfen zuo
0,6656 beide spâte unde vruo
0,6657 jô hâst dû dînes willen
0,6658 offênlîche unde stille
0,6659 erworben ein vile michel teil
0,6660 wir lâzen ez hêrre ane daz heil
0,6661 unde îlen dâr hine varen
0,6662 mit einer hêrlîchen scharen
0,6663 wande wir haben ein michel here
0,6664 wir sulen mit schilde unde mit spere
0,6665 dînen willen erwerben
0,6666 oder genendiclîchen sterben”
0,6667 Alexandrô dûhte in sînen muote
0,6668 der tumber liute rât guot
0,6669 daz was ein michel tumpheit
0,6670 des quam in manic arbeit
0,6671 der tobente wüeterîch
0,6672 der was der hellen gelîch
0,6673 di daz apgründe
0,6674 begenet mit iren munde
0,6675 unde den himel zuo der erden
0,6676 unde ir doch niht ne mac werden
0,6677 daz si iemer werde vol

0,6678 si is daz ungesatlîche hol
0,6679 daz weder nû noch nie ne sprach
0,6680 “diz ist des ich niht ne mac”
0,6681 alsô tete Alexander
0,6682 di vromete manic wunder
0,6683 der quam durch sîne giricheit
0,6684 in vile michel arbeit
0,6685 er ne wolte niwet sûmen
0,6686 er begunde iz dâr rûmen
0,6687 unde vuor dannen
0,6688 mit allen sînen mannen
0,6689 über berc unde tal
0,6690 unde manigen stîc smal
0,6691 dâ er muoste stürmen
0,6692 mit vreislîchen wûrmen
0,6693 unde von den tieren
0,6694 dô hoffete er daz er schiere
0,6695 quæme ûz der nôt
0,6696 iedoch vorhte er den tôt
0,6697 swie stoltzmüete sô er was
0,6698 daz er dâ genas
0,6699 daz was gotes wunder
0,6700 dô gerou besunder
0,6701 allen di dâ wâren
0,6702 stille unde offenbâre
0,6703 di tumpliche herevart
0,6704 wande si liten manigen sturm hart
0,6705 von starken gewitere
0,6706 daz treip si dicke widere
0,6707 in ire ungewalt
0,6708 des verzwîvelte der helt balt
0,6709 der müelîche Alexander
0,6710 unde vile manic ander
0,6711 manic jungelinc gemeit
0,6712 di vart di vart di was vile leit
0,6713 Alexandrô zuo dem mâle
0,6714 swie er ez dô verhæle
0,6715 durch werltlîche schande
0,6716 wær er dô ze lande
0,6717 er ne quæme niemer mêr dâr
0,6718 daz sulet ir wizen vûre wâr
0,6719 wande si liten ungemach
0,6720 beide naht unde tac
0,6721 von donere unde von blicke
0,6722 er manete sîne dicke
0,6723 daz si balde vuoren
0,6724 er hiez si starke rüeren
0,6725 biz si dar quâmen

0,6726 dâ si volc vernâmen
0,6727 unde gemach vuntē
0,6728 dâr nâch in kurzen stuntē
0,6729 quâmen si an eine pflûme
0,6730 grôz unde gerûme
0,6731 di was Eufrates genant
0,6732 di liute di er dâr vant
0,6733 beide kleine unde grôz
0,6734 di sageten ime daz iz vlôz
0,6735 ûz dem paradîse
0,6736 dô hiez er mit spîsen
0,6737 sîne schif bereiten
0,6738 er ne wolte niwet beiten
0,6739 daz der wunderlîche man
0,6740 hiez daz wart schiere getân
0,6741 dô si ze schiffe quâmen
0,6742 ire ruoder si nâmen
0,6743 unde swaz si haben solten
0,6744 wande si varen wolten
0,6745 in di starke vlûme
0,6746 dô mohten si vile kûme
0,6747 wider dem strâme iht gevarn
0,6748 dô leit dâ maniger muoter barn
0,6749 angest unde pîne grôz
0,6750 wande daz wazzer starke vlôz
0,6751 ouch müejeten daz gesinde
0,6752 di vreislîchen winde
0,6753 unde doner unde blicke
0,6754 ouch nôtte si dicke
0,6755 regen hagel unde snê
0,6756 in wart dicke vile wê
0,6757 von unrechten gewitere
0,6758 daz treip si sêre widere
0,6759 si liten michel arbeit
0,6760 si mohten ire manheit
0,6761 niwet vile dâ geniezen
0,6762 dô sâhen si vliezen
0,6763 dâr in obez unde loup
0,6764 daz vile süezlîchen rouch
0,6765 daz loup was breit unde lanc
0,6766 di dâ woneten in daz lant
0,6767 dahten ire hûs dâ mite
0,6768 des was dare lantsite
0,6769 des obezes si wole genuzzen
0,6770 ouch quam dâ mite gevlozzē
0,6771 manic schoene bluome
0,6772 gele unde grüene
0,6773 der viengen di hêrren vile

0,6774 unde hæten si zuo einem spile
0,6775 dô di helede gemeit
0,6776 erliten michel arbeit
0,6777 di mit dem wâge strebeten
0,6778 dô rou in daz si lebeten
0,6779 dô Alexander daz gesach
0,6780 dô trôste er si unde sprach
0,6781 gehabet iu wole helede guot
0,6782 unde habet manlîchen muot
0,6783 daz ist di rehte wârheit
0,6784 wir haben michel arbeit
0,6785 nû gehabet lange
0,6786 dâr ûz an dem lande
0,6787 unde ouch in disen wâge
0,6788 vile michel ungenâde
0,6789 erliten lanc stücke
0,6790 geschæhe uns daz gelücke
0,6791 daz wir mit sicheiner wîs
0,6792 betwûngen daz paradîs
0,6793 unde di dâ wonent inne
0,6794 sô solten wir mit sinne
0,6795 unde ouch mit grôzen êren
0,6796 heim ze lande kêren
0,6797 unde leben vroelîche
0,6798 ich gelobe iu triuwelîche
0,6799 mir werde wole oder wê
0,6800 daz ich sint niemer mêr
0,6801 ne wille mit here
0,6802 noch mit schilde noch mit spere
0,6803 neheine burc mêr gewinnen
0,6804 noch urlouges beginnen
0,6805 sint lâze ich ez allez an daz heil
0,6806 er nam behalben dô ein teil
0,6807 sîner heimelîchen holden
0,6808 mit den er sprechen wolte
0,6809 den sagete er vile stille
0,6810 allen sînen willen
0,6811 zehant si dâr swuoren
0,6812 daz si mit im vollenvuoren
0,6813 iz gie ze schaden oder ze vromen
0,6814 swie ez joch dâr umbe mohte komen
0,6815 si wolten mit ime belîben
0,6816 ze tôde unde ze lîbe
0,6817 dô vuoren si mit sorgen
0,6818 den âbent unde den morgen
0,6819 unde erliten manige grôze nôt
0,6820 vile dicke sâgen si den tôt
0,6821 vore iren ougen gereit

0,6822 manic recke gemeit
0,6823 lebete dâ mit pînen
0,6824 Alexander hiez dô sînen
0,6825 daz si balde vûeren
0,6826 unde ire lide rûeren
0,6827 dô wart dâ manic wârer helet
0,6828 genoetet unde gequelet
0,6829 wande si rûejeten unde schielten
0,6830 daz si den lîp behielten
0,6831 swanne ze grôz was ire nôt
0,6832 unde si wânten wesen tôt
0,6833 sô wurfen si ûz ire anker
0,6834 mit manigen gedanken
0,6835 wâren si dicke bevâhen
0,6836 waz si mohten ane gân
0,6837 alse si danne geruoweten
0,6838 dâr nâch si sich müejeten
0,6839 unde vuoren aber ûf baz
0,6840 vûre wâr sagen ich iu daz
0,6841 sô si ie langer vuoren
0,6842 sô si müeder wâren
0,6843 dô di vile tumbe
0,6844 lange gevuoren umbe
0,6845 in dem wâge erre
0,6846 dô quâmen si sô verre
0,6847 daz die jene gesâgen
0,6848 di der schiffe pflâgen
0,6849 verjen unde stiuren
0,6850 eine hêrlîche mûren
0,6851 di was lanc unde breit
0,6852 des wurden di hêrren gemeit
0,6853 sumelîche vile unvrô
0,6854 wande di mûre was vile hôh
0,6855 gebûwet vile reine
0,6856 von edelen gesteine
0,6857 lange si dô vuoren
0,6858 bî der hôhen mûren
0,6859 unde ne mohten nehein ende
0,6860 an der steinwende
0,6861 niergen gevinden
0,6862 doch quam daz ingesinde
0,6863 über lanc ze einer tûre
0,6864 dâ riefen si lange vore
0,6865 dô begunden si bôzen
0,6866 slân unde stôzen
0,6867 mit grôzem unsinne
0,6868 di sêlen dâr inne
0,6869 unde di engelische schare

0,6870 di ne nâmen des neheine ware
0,6871 iedoch quam ein alt man
0,6872 zuo der türe gegân
0,6873 der vrâgete si waz si wolten
0,6874 si sageten daz si solten
0,6875 lâzen ire singen
0,6876 unde zins bringen
0,6877 irem hêrren Alexandrô
0,6878 der man vrâgete si dô
0,6879 wer Alexander wære
0,6880 dô sageten si ime ze mære
0,6881 iz wære der Alexander
0,6882 dem nehein man ander
0,6883 an allen ertrîche
0,6884 lebete gelîche
0,6885 er wære rîche unde guot
0,6886 unde hæte manlîchen muot
0,6887 küene unde êrhaft
0,6888 getriuwe unde wârhaft
0,6889 unde hæte michelen gewalt
0,6890 ime wære velt unde walt
0,6891 unde lant unde mere
0,6892 unde maniges rîchen küniges here
0,6893 al biz dâr undertân
0,6894 dô antwurte der alte man
0,6895 unde sprach “ir müezet beiten
0,6896 biz daz ich iuch bereiten
0,6897 ich wil an disen stunten
0,6898 mînen gesellen künden
0,6899 iuweres hêrren willen”
0,6900 dô gienc er dannen stille
0,6901 unde merrete niwet lange
0,6902 unde quam wider gegangen
0,6903 er sprach “nû merket wole
0,6904 di wort di ich iu sagen sol
0,6905 ir sulet sagen alsô
0,6906 dem hêrren Alexandrô
0,6907 wie lange er alsus wil leben
0,6908 unde nâch ungenâden streben
0,6909 er was übele bedâht
0,6910 daz er mit sîner heres kraft
0,6911 heim suochte di gotes kint
0,6912 di enbinnen diser mûren sint
0,6913 ouch sulet ir ime sagen
0,6914 er mohte gerne mêr gedagen
0,6915 von solicher unmâze
0,6916 unde varen sîne strâze
0,6917 wil her den lîp behalten

0,6918 sô vare hine balde
0,6919 unde ob er wille genesen
0,6920 sô sal er ôtmüete wesen
0,6921 er weiz daz wole âne wân
0,6922 er hât vile übeles getân
0,6923 wider got ist er schuldic
0,6924 unde got is vile gedultic
0,6925 klaget er ime sîne schulde
0,6926 got gibet ime sîne hulde
0,6927 wil er sich niht bekêren
0,6928 sîn schade wirdet destе mêre
0,6929 wes wænet Alexander
0,6930 ein man ist als ein ander
0,6931 beide vleisch unde bein
0,6932 sehet bringet ime disen stein
0,6933 er is vile tiure
0,6934 starc is sîn natûre
0,6935 iz wizzen lützel liute
0,6936 waz der stein bediute
0,6937 den gebet ime an sîne hant
0,6938 unde heizet ime diz lant
0,6939 vile harte schiere rûmen
0,6940 er ne sol niwet sûmen
0,6941 unde saget ime dâ mite
0,6942 daz er wandele sîne site
0,6943 swanne ime wirdet bescheinet
0,6944 waz der stein meinet
0,6945 sô muoz er sich gemâzen
0,6946 des ne mac er niht gelâzen”
0,6947 sân nâch disen worten
0,6948 gienc jener von der porten
0,6949 unde di boten kârtен dô
0,6950 wider ze Alexandrô
0,6951 unde gâben ime den stein
0,6952 ouch wurden si des enein
0,6953 daz si ime sageten
0,6954 waz si vernomen habeten
0,6955 unde wie ez in was komen
0,6956 dô er daz hæte vernomen
0,6957 dô gienc er ze râte
0,6958 waz er dâr umbe tæte
0,6959 dô rieten di wîsen
0,6960 di in solten wîsen
0,6961 daz er sich bereitte
0,6962 unde niht langer dâ ne beitte
0,6963 unde begunde iz dâr rûmen
0,6964 unde vüere in di vlûmen
0,6965 wider heim ze lande

0,6966 dô sprâchen di wîgande
0,6967 di stolzen jungelinge
0,6968 ir ne hât zuo disen dingen
0,6969 uns niet wole gerâten
0,6970 di iuch daz sprechen tâten
0,6971 di wâren übele bedâht
0,6972 als ir iz ouch hât vûre brâht
0,6973 unse hêrre Alexander
0,6974 der sol tuon ein ander
0,6975 er sol heizen stiuren
0,6976 sîn volc zuo der mûren
0,6977 wir sîn guote knechte
0,6978 wir sulen si ane vehten
0,6979 di mûre sulen wir brechen
0,6980 unse hêrre der sol rechen
0,6981 dâr an sînen anden
0,6982 iz wirdet in ze schanden
0,6983 daz si in heim hiezen varn
0,6984 der ne geniset nehein barn
0,6985 der dâ wonent innen
0,6986 müezen wir es beginnen
0,6987 dô sprach der listige man
0,6988 “wollet ir es mînen rât hân
0,6989 sô râte ich uns daz bezziste
0,6990 wir sulen dise veste
0,6991 mit allen êren lâzen
0,6992 unde varen unse strâze
0,6993 wande si ist sô vast
0,6994 daz si ne vûrhtent niht ein bast
0,6995 uns noch alle di nû leben
0,6996 al wolten si dâr zuo streben
0,6997 wande di dâr inne sint
0,6998 daz sint di wâren gotes kint
0,6999 di beschirmet selbe got
0,7000 wande si leisten sîn gebot
0,7001 dâr umbe hât er in gegeben
0,7002 daz unzeganclîche leben
0,7003 ich ne wil iz niwet langer helen
0,7004 wir sulen uns alle bevelhen
0,7005 den sêlen unde der engele scharen
0,7006 daz si uns ruochen bewarn
0,7007 daz wir sunder müejicheit
0,7008 unde âne aller slahte herzeleit
0,7009 unde sunder werltschande
0,7010 komen heim ze lande”
0,7011 di hêrren kârten dô wider
0,7012 unde vuoren daz wazzer nider
0,7013 dô si quâmen an daz lant

0,7014 ûz giengen si zehant
0,7015 unde rûmeten dâr schiere
0,7016 si muosten mit den tieren
0,7017 unde mit den wûrmen
0,7018 in den wege stûrmen
0,7019 doch quâmen si über lanc
0,7020 wider heim ze Kriechlant
0,7021 dô was dâr manic Krieche
0,7022 alsô kranc unde alse siech
0,7023 als er wære verslagen
0,7024 den muoste man ze bette tragen
0,7025 daz genuzzen si der herevert
0,7026 daz ir ie gedâht wart
0,7027 daz rou si dô ze spâte
0,7028 dô hiez der küninc drâte
0,7029 wîte sagen mære
0,7030 ob dechein man wære
0,7031 der ime mohte bescheinen
0,7032 di kraft von dem steine
0,7033 dem wolte er wole lôn
0,7034 daz swuor er bî der krônen
0,7035 vile manige dare quâmen
0,7036 dô si daz vernâmen
0,7037 di sageten daz si wisten
0,7038 di natûren unde di liste
0,7039 von edelen gesteine
0,7040 grôz unde kleine
0,7041 eteslîche jâhen
0,7042 dô si in gesâhen
0,7043 iz wære ein edele jâchant
0,7044 ein ander sagete zehant
0,7045 iz wære ein karbunkel
0,7046 der naht ne wære nie sô tunkel
0,7047 er ne liuhte als ein sterre
0,7048 nâhe unde verre
0,7049 der dritte sprach alsus
0,7050 “iz ist ein topatius”
0,7051 der vierde “ein bêryllus”
0,7052 der vünfte “ein onichinus”
0,7053 der sehste “ein ametiste”
0,7054 er kante wole sîne liste
0,7055 der sibende sprach “ich bin gewis
0,7056 iz sî ein rehter jaspis”
0,7057 der ahtode sprach “er is sô schîr
0,7058 iz ist ein edele saphîr”
0,7059 der niunde “ein crisolitus”
0,7060 der zehende “ein crisoprassus”
0,7061 der einlifte “ein bdellius”

0,7062 der zwelifte “ein sardonius”
0,7063 sus sprâchen si besunder
0,7064 manigvalten wunder
0,7065 doch ne wiste ir neheiner
0,7066 di kraft von dem steine
0,7067 noch sîn geslehte
0,7068 si tâten unrehte
0,7069 daz si solten liegen
0,7070 si wânten betriegen
0,7071 den küninc listicliche
0,7072 dô sagete man wêrlîche
0,7073 dem hêrren Alexanderen
0,7074 von einem anderen
0,7075 der wære ein jude vile alt
0,7076 sîn wîsheit wære manicvalt
0,7077 unde wonete in sînem lande
0,7078 zehant er nâch dem sande
0,7079 dô der alte daz vernam
0,7080 dô hiez er daz man ime gewan
0,7081 liute di in solten tragen
0,7082 er was sô komen zuo sînen tagen
0,7083 daz er niet ne mohte gân
0,7084 daz hatte im daz alter getân
0,7085 dô truoc man den alten
0,7086 ze hove vile balde
0,7087 dô in der küninc gesach
0,7088 dô gruozte er in unde sprach
0,7089 “mir is gesaget daz dû sîs
0,7090 in vile manigen dingen wîs
0,7091 unde künnes manige grôze list
0,7092 unde daz dû der wîsesten bist
0,7093 under dînen genôzen ein
0,7094 nû beschouwe rehte disen stein
0,7095 unde zeige mir rehte
0,7096 sînen art unde sîn geslehte
0,7097 unde sîne natûre
0,7098 man saget mir er sî tiure”
0,7099 der jude nam in in di hant
0,7100 schiere hæte er erkant
0,7101 sîn natûre unde sînen art
0,7102 er sprach nû ne ist noch nie ne wart
0,7103 nehein sîn gelîche
0,7104 in allen ertrîche
0,7105 er is tiure unde guot
0,7106 er gibet harte stolzen muot
0,7107 unde den alten di jugent
0,7108 er hât vile manige tugent
0,7109 des sal man mir getrûwen

0,7110 ouch müget ir ez wole schouwen
0,7111 wande als ir ez selbe habet gesehen
0,7112 sô müezet ir mir jehen
0,7113 der rehten wârheite
0,7114 dô hiez er ime bereiten
0,7115 eine wâge mit sinne
0,7116 einehalp dâr inne
0,7117 legete er den tiuren stein
0,7118 manigen guldînen zein
0,7119 in di anderen schale
0,7120 der stein zukte si ze tale
0,7121 swie swâr sô si wâren
0,7122 daz sage ich iu ze wâren
0,7123 dô hiez er daz man solte
0,7124 mêt legen zuo dem golde
0,7125 durch daz man ervûnte
0,7126 waz der stein kunde
0,7127 dô sîn gebot was ervolt
0,7128 dô swebete obene daz golt
0,7129 der stein swebete under
0,7130 daz was ein michel wunder
0,7131 diz ist doch daz ir merken solet
0,7132 swaz man legete ûf daz golt
0,7133 daz swebete allez obene
0,7134 diu schale zôch ie nidene
0,7135 mit dem tiuren steine
0,7136 er was ze mâzen kleine
0,7137 alse eines mennischen ouge
0,7138 dô hiez der jude tougen
0,7139 mit dem golde rûmen
0,7140 unde legete eine pflûmen
0,7141 unde erde ein kleine
0,7142 wider deme steine
0,7143 dâ daz golt êr lac
0,7144 dâ der küninc zuo sach
0,7145 der wîse Alexander
0,7146 unde manic man ander
0,7147 dâr zôch an der stunte
0,7148 di vedere ze grunde
0,7149 unde di erde di dâ bî lac
0,7150 ir iegelîcher dô jach
0,7151 mannelich besunder
0,7152 diz wære ein michel wunder
0,7153 dô sprach der jüdische man
0,7154 “wollent ir ez rehte verstân
0,7155 sô hiez got machen
0,7156 sus wunderlîche sachen
0,7157 dem küninge ze lêren

0,7158 er erhuop sich grôzer êren
0,7159 ouch sît ir algemeine
0,7160 gemanet mit dem steine
0,7161 daz ir iuch nihtes ne verhebet
0,7162 al di wîle di ir lebet
0,7163 bewaret iuch von der giricheit
0,7164 wande si machet manige herzeleit
0,7165 wande swer sô giric wille wesen
0,7166 wie mac der iemer genesen
0,7167 der lebet mit sorgen
0,7168 den âbent unde den morgen
0,7169 wie er des beginne
0,7170 daz er iemer gewinne
0,7171 allez daz ime zuo veret
0,7172 daz verslindet er unde verzeret
0,7173 unde ne wirdet doch niemer vol
0,7174 er is daz hellische hol
0,7175 daz noch nie ne wart sat
0,7176 noch niemer werden ne mac
0,7177 als er gar verslindet
0,7178 swaz im zuo gewendet
0,7179 nû sehet waz is iz danne
0,7180 niwet anders wan ein kranc man
0,7181 der gelîchet dem steine
0,7182 der in der wâgen eine
0,7183 sich selben nider drückete
0,7184 unde daz golt ûf zückete
0,7185 ir wâret unwîse
0,7186 daz ir daz paradîse
0,7187 wântet ervehten
0,7188 doch wolte iuch unse trehtîn
0,7189 lâzen besunder
0,7190 schouwen sîne wunder
0,7191 doch ne müget ir niemer daz bewaren
0,7192 ir ne müezet hine varen
0,7193 unde müezet verderben
0,7194 unde wislîche sterben
0,7195 sô müezet ir werden
0,7196 gemenget zuo der erden
0,7197 sus solet ir hine rûmen
0,7198 sô gelîchet ir der pflûmen
0,7199 di nider mit der erden gienc
0,7200 dâr si in der wâgen hienc
0,7201 unde ûf zückete den stein
0,7202 nû ne ist iuwer nehein
0,7203 er ne habe gehoeret rehte
0,7204 des steines geslehte
0,7205 sîne lîhte unde sîne swære

0,7206 beide vile offenbâre
0,7207 nû merket waz ich iu künden
0,7208 ir sulet von iuweren sünden
0,7209 iuch schiere bekêren
0,7210 unde sulet êren
0,7211 in allen iuweren herzen got
0,7212 unde leistet gerne sîn gebot
0,7213 ir sulet in minnen
0,7214 mit allen iuweren sinnen
0,7215 der iuch geworden hiez
0,7216 unde iuch biz here liez
0,7217 von sînen genâden leben
0,7218 unde der iuch allen hât gegeben
0,7219 sin unde wîstuom
0,7220 êre unde rîchtuom
0,7221 unde liute unde lant
0,7222 nû stêt an iuweres hêrren hant
0,7223 der hier gagenwürtic is
0,7224 des sît ir alle gewis
0,7225 manic künincrîche
0,7226 nû merket algelîche
0,7227 swaz er hât oder kan
0,7228 sô ne ist er niwet wene ein man
0,7229 sô muoz er verderben
0,7230 unde ze jungeste sterben
0,7231 er mac iemer niwet leben
0,7232 waz hilfet ime sîn lange streben
0,7233 ze lezzest muoz er doch werden
0,7234 gemischet zuo der erden
0,7235 diz merke ouch Alexander
0,7236 noch mêt danne ein ander
0,7237 unde ledige von vreisen
0,7238 witewen unde weisen
0,7239 unde kêre dîn gemüete
0,7240 an aller slahte güete
0,7241 sô dir begrîfe der tût
0,7242 daz dich ledige von der nôt
0,7243 got von himelrîche
0,7244 unde dich in sîn rîche
0,7245 mit sînen holden bestate
0,7246 unde sîner genâde dich gesate”
0,7247 dô dise wîslîche wort
0,7248 der küninc hæte gehôrt
0,7249 dô tet er hêrlîchen
0,7250 unde gap grôzlîchen
0,7251 dem alten unde mit sinnen
0,7252 unde sande in mit minnen
0,7253 mit êren âne schande

0,7254 wider heim ze lande
0,7255 unde dâhte an sîne lêre
0,7256 sint vürder mêre
0,7257 die wîle er hæte den lîp
0,7258 unde êrete man unde wîp
0,7259 baz danne er dâr vore tete
0,7260 unde wandelte sîne site
0,7261 unde sîn gemüete
0,7262 in aller slahte güete
0,7263 unde pflac guoter mâzen
0,7264 ouch begunde er lâzen
0,7265 urlouge unde girigheit
0,7266 unde was mit zühten gemeit
0,7267 unde berihte sîn rîche
0,7268 vile hêrlîche
0,7269 niwet langer wene zwelif jâr
0,7270 daz sulet ir wizzen vüre wâr
0,7271 dô wart ime vergeben
0,7272 sint ne mohte er niwet leben
0,7273 wande ime sîn houbet gare zerspielt
0,7274 niwet mêr er behielt
0,7275 alles des er ie beranc
0,7276 wene erden siben vuoze lanc
0,7277 alse der armeste man
0,7278 der in die werlt ie bequam
0,7279 nû ist diz liet ze ende komen
0,7280 alle di ez habet vernomen
0,7281 beide man unde wîp
0,7282 denket an den êwigen lîp
0,7283 unde an daz êwige leben
0,7284 dâr nâch sulet ir iemer streben
0,7285 lâzet alle giricheit
0,7286 unde habet iemer arbeit
0,7287 umbe daz himelrîche
0,7288 got der ist sô rîche
0,7289 er mac iu wole gelônen
0,7290 mit der himelischen krônen
0,7291 büezet iuwer sünden
0,7292 wande ir ne wizzet niwet di stunten
0,7293 daz ir hine sulet varn
0,7294 durch daz sulet ir iuch bewarn
0,7295 di wîle di ir hier sît
0,7296 unde vürhten got in alle zît
0,7297 daz ir mit vrôuweden müezet varn
0,7298 zuo der himelischen scharen
0,7299 beide hêrren unde vrouwen
0,7300 unde ir dâ müezet schouwen
0,7301 unde haben daz êwige lôn

0,7302 deum deorum in Sion